

Ki nga

PINGGULAULA

nu nga Peneligan ni Isukristu

Mendadi kig libru kini, sumpat ditu sala libru mibetang dinig *Begu Pasad* kini, *Ki Gempia Petenday Sinulat ni Lucas*. Kig dua' buuk libru kini, suminulat dun si Lucas, piwitanen duni metaas getaw, si Teofilo.

Iini miukit dini Nga Pinggulaula *kini*, su nga mibianan nu nga peneligan ni Isus sampay su ginukit nilan, *dekag na pitubu' puli' si Isus muka' pilentu iin ditu gekbus langit*. Iinig baalen nu nga peneliganen kia, migukit ilan di Gempia Petenday mekatag dini Isus, adun sumalig diniin su nga getaw. Su kepalus ni Isus muli' ditu gekbus langit, migukit di Gempia Petenday su nga peneliganen dia da laak Jerusalem sampay diag lumibut benwa. Laak sa' minibeniben, sinigwag nilan su Gempia Petenday tu tibuuk prubinsya Judea sampay tu nga melayu' benwa. Tiga'wan, sinigwag nu nga peneligan ni Isus su Gempia Petenday tu tibuuk lumbang.

Muka' pagid miukit dinig libru kini ki kengapu' nug Balakat nu Megbebaya' di nga peneligan ni Isus. Bena' mingapu' dinilan kig Balakat nu Megbebaya' kia, iin nai migabang dinilan adun menibelu' ilan megukit muka' ginuungan ilan menggulaula nga mekesalebu'.

Naa iinig bekna inukitan nu Gempia Petenday, ki nga getaw Judea. Mendadi duuni getaw, ngalanan si Pablo, tindu' nu Megbebaya' peneligan ni Kristu adun pengukitanen di Gempia Petenday ki ngag lain bansa nu getaw, sa'itada su nga kana' getaw Judea. Melaun sinulat ni Pablo mipungan dinig *Begu Pasad kini*. Iini pigwali ni Pablo di nga sulaten, *gempantek pu' ki kepatay ni Isus, ganti' di kepatay nu kelaun getaw dinig dibabaw lumbang, pia ta' bensaay dun, kana' nu nga getaw Judea da laak*.

Si Lucas, su suminulat dig libru kini, taang dun duma ni Pablo saananen mpanaw tu nga melayu' benwa adun megukit di Gempia Petenday. Kaas taang dun, sa'itada dia Kapitulu 16 bu' 20 muka' 27, gemiten ni Lucas su penggelal "ami," tu'us dun pu' minita' gupia ni Lucas atawaka mibiananen su pengukitenen.

Piuna

1 ¹Dini'a, pegbesaan Teofilo, ki sinulat kini, genat dini Lucas. Naa sug bekna sinulatu kitu dini'a, iini miukit dun su kelaunan pinggulaula ni Isus muka' pitulu'en ²sampay di gendaw nu kepelentu diniin nu Megbebaya' ditu gekbus langit. Mendadi kini si Isus, su nda' pa pelentu ditug langit, pimitulu'anen su nga pimili'en peneliganen. Su pitulu'en dinilan kia, miksekat di ginuung nug Balakat nu Megbebaya'. ³Naa genat di kepatayen gikteb di paat pulu' gebii, melaun gupia pitu'usen di nga peneliganen kia pu' mitubu' puli'ig lawasen. Midua' mata nilan si Isus, muka' pingukitanen ilan mekatag di Keglekaunutan nu Megbebaya'.

⁴Mendadi, su selian ni Isus dumuma pa di nga peneliganen kia, tinitulu'anen ilan, laungen, “Ndi' amu pa pegawa' dini Jerusalem, pegelatay pa niu mateng su tinalu'u diniu kiin, su tulung pinasad nu Megbebaya'.” ⁵Pu' kiin, misuunan niu pu' si Juan kitu, migbunag laak tubig diniu. Mendadi ndi' maiben, ma'niin bunagan amu peluman, pu' mengapu' diniu kig Balakat nu Megbebaya'.

Pilentu si Isus tu Gekbus Langit

⁶Naa duuni gendaw mikpungun na pelum ditu ni Isus su nga peneliganen. Kali' ilan saak diniin, “Sir, nemun ini ki ketindeg mu dig bansa ta Israel su Keglekaunutan?”

⁷Kali' pektalu' si Isus, “Su Gama'u laak, iini suunanen su gendaw nu kelaun mpenggulaula, pu' iini megbaya' dun. Yamu, ndi' niu mesuunan. ⁸Laak dagid sa' mengapu' na diniu kig Balakat nu Megbebaya', begayan amu niin ginuung. Tumakesi' amu dayun dinaan. Tumakesi' amu dini Jerusalem muka' di tibuuk Judea, tu Samaria, sampay tu tibuuk lumbang.”

⁹Bena' mideksu'en telu'ay, pilentu na dayun si Isus ditu gekbus langit. Saanan megbantay su nga peneliganen, milinged na gabun si Isus, ndi' na nilan dayun maita'.

¹⁰Mendadi selian nu nga peneligan ni Isus megangag ditug langit, mitekaw duunig dua' tawan pegindeg dia gupid nilan, gemputi'i penepeten nilan. ¹¹Laung nug dua' tawan kia, “Yamu nga getaw Galilea, mauma dema amu mimegangag tug langit? Si Isus kiin, mpuli' da dini. Adin su kelentunen minita' niu kini, ma'antu dadema ki kelusaden puli'.”

Su Sinukli dini Judas

¹²Tubus itu, minuli' ditu Jerusalem su nga peneligan ni Isus genat ditug Bentud nu nga Gayu Olibo. Su pekilayu' nug bentud kia muka' su Jerusalem, sala kilumitru. ¹³Bena' minateng su nga peneliganen tug balay pektulugan

nilan, minaik ilan dayun tu sugud nilan diag ditaas. Ilan si nga Pedro, si Juan, si Santiago, si Andres, si Felipe, si Tomas, si Bartolome, si Mateo, si Santiago bata' ni Alfeo, si Simon su piningalan dun Gembelu' Megukit, muka' si Judas bata' nu sala Santiago. ¹⁴Sug launan nilan kia, miksyalabuuk ilan menamal menenabi. Duminuma dadema dinilan su ngag libun kampu' ni Maria su gina' ni Isus, sampay su nga pated ni Isus.

¹⁵Naa nda' maiben, duuni gendaw mikipungun puli' su nga mikpetuud dini Isus kia, duun saani megatus bu' dua' pulu' tawan ilan. Mendadi migindeg si Pedro, kali' pektalu' dinilan, ¹⁶“Yamu nga kepetedan ku, subay minuud ki pisulat nug Balakat nu Megbebaya' dini David dengantu ditu Misulat Talu' nu Megbebaya' mekatag dini Judas, su minunut tu nga getaw duminaap dini Isus. ¹⁷Begudiin si Judas kiin, дума ta di pikumpungan ta, muka' pimili' dadema ni Isus megabang dig baalen ta.”

¹⁸(Pu' su tinindan dini Judas ditug limbungen kia, piksaluy dun ni Judas lupa'. Milabu' dayun si Judas diag lupa'en kia, migbetui tianen, miliwasagi tinainen. ¹⁹Naa nda' maiben, misuunan nu kelaun getaw dia Jerusalem su mipenggulaula kia ni Judas, kaas piningalan nilan dun sug lupa' kia, Akeldama, guluganen “Lupa' nu Kegbinasa di Getaw.”)

²⁰Laung padun ni Pedro, “Pu' kiin, duuni misulat ditu pisulat nu Megbebaya' piningalan dun ngag Bebat, ma'nini'.^a

‘Belenganig balayen,
nda'i pegbenwa dun.’

Muka' duun pa pagidi misulat,

‘Lain tawan nai sumukli dig baalenen.’

²¹“Naa mendadi,” maa' laung padun ni Pedro, “kagina ma'antu, subay duunig lain tawan sukli dini Judas. Melengas pemili'en tai sala tawan suminalabuuk na dinita su keduma dinita ni Isus ²²genat di kebunag ni Juan diniin tubig sampay di gendaw nu kepelentu diniin tu gekbus langit. Ki mpemili' ta, megabang dayun dinita tumakesi' di ketubu' puli' nu Kaunutan ta si Isus.”

²³Mendadi, pinindeg dayun nu nga peneliganig dua' tawan, si Jose muka' si Matias. Lain ngalan ni Jose kia, si Barsabas. (Sala pa ngalanan, si Justo.) ²⁴Minenabi dayun si nga Pedro, laung nilan, “Uu Kaunutan Megbebaya', suunan mu sug delendeman nu tiba'an getaw. Sa' ma'antu, paita' mu dinami ki pimili' mu sukli dini Judas, sa' adin dun dig dua' tawan kini. ²⁵Iin nai mbaal peneligan mu mekesukli di kelaun baalen ni Judas bilengen, pu' si Judas kiin, minuli' na ditu guli'anen.”

²⁶Piktali dayun ni nga Pedro sa' ta' taway duni mpemili' dig dua' tawan kia. Iini mipemili', si Matias. Iin dayuni mitektub ditu sepulu' bu' dua' tawan peneligan ni Isus.

^a 1:20 Kig Bebat kini, iin su piningalan dun nu getaw Judea begudiin Salmos, sug bibat ilan adun pektamuy tug Diwata.

Su Kelusad nug Balakat nu Megbebaya'

2 ¹Naa bena' sungu mateng su keglinggwang nug lumpuk nu getaw Judea piningalan dun Pentecostes, mikipungun di salabuuk balay su nga mikpetuud dini Isus. ²Mendadi bena' migingkud ilan dia, mitekaw nilan medengegi maa' migbegembuti metikteg genus genat tug langit, mileep dia seled balay kia. ³Muka' minita' nilani maa' liga' gapuy, mitukid dayun melabu' dinilan. ⁴Dayun ilan pengepu'ay nug Balakat nu Megbebaya', launan nilan. Diadia mikektalu', masi' sala nai pikebitanen, pu' miksekat dig Balakat nu Megbebaya' kia.

⁵Naa duuni nga getaw Judea pegbebenwa dia Jerusalem mikpetuud gupia ditu Megbebaya', genat ilan di kelaun benwa dig dibabaw lumbang. ⁶Ilan, bena' midengeg nilan ki gelang diag balay kia, minampu' dailan dema dia. Bena' mikineeg ilan di talu' kia nu nga peneligan, diadia midengegen sug daniin pikebitan, misasaw dayuni ginaa nilan. ⁷Misebu'an ilan pati', laung nilan, "Ki getaw kini mektalu', lumbus ilan laak getaw Galilea! ⁸Naa sa' ma'nia, mauma dema ini, midengeg ta dinilanig launan pikebitan ta? ⁹Pu' ita, getaw Partia ita, getaw Media, getaw Elam. Duuni getaw genat di Mesopotamia, duuni getaw Judea, getaw Capadocia, getaw Ponto muka' getaw Asia, ¹⁰getaw Frigia, getaw Panfilia, getaw Ehipto, getaw Libya sakup Cirene, muka' duuni megbebenwa dini genat tug Roma. ¹¹Duuni getaw Judea tantu muka' su laak miginetaw na Judea. Duuni getaw Creta muka' getaw Arabia. Digid launan ta, medengeg tai nga pikebitan ta kini, pigukit dun nu nga getaw Galilea kini ki nga mekesalebu' gulaula nu Megbebaya'!" ¹²Sa' ma'nia, misebu'an ilan lamug milibuleng ilan, kali' ilan peksinaakay, "Alanduni guluganen ki mipenggulaula kini?"

¹³Laak sug duma getaw, piksudi'an nilan su nga mikpetuud dini Isus, laung nilan, "Baa, migbebulek laak ilan!"

Su Kegwali ni Pedro

¹⁴Laak dagid si Pedro, migindeg, ilan nu ngag dumanen sepulu' bu' sala tawan. Tuminubang si Pedro ditu nga getaw minampu', minekeg dayun mektalu', laungen, "Yamu nu nga samau getaw Judea muka' launan niu migbebenwa dini Jerusalem, talentenay niui talu'u kini, pu' ulugen ku diniu ki mipenggulaula kini. ¹⁵Ki nga getaw kini, kana' ilan migbebulek, maa' nug delendeman niu dun, pu' ginenga' menaik pa laaki gendaw. ¹⁶Sinangkali' ki mipenggulaula kini, iin su kenuud na tu'u nu pisulat dengantu nu Megbebaya' ditu Talu'en, su sinulat nu pimuunanen si Joel, laungen,

¹⁷'Sa' sungu melengkebig benwa,' maa' laung nu Megbebaya',
'pepengapu'u kig Balakatu tu kelaun bansa nu getaw.

Kaas su nga sumumpat diniu libun laki, ukiten nilan dayun ki pemuun ku dinilan.

Su ngag begu getaw, duuni paita'u dinilan mekesalebu', muka' su mekegulang, duun dademai peteginepu dinilan.'

¹⁸ Laung nu Megbebaya', 'Metuud ia, su nga sesugu'en ku libun laki, pepengapu'u dinilan kig Balakatu di gendaw kiin, adun pelaktag nilan su pemuun ku dinilan.

¹⁹ Paita'u demai nga mekesalebu' tu'us dig langit muka' nga mekesalebu' penggulaula dig benwa. Metua'ig dugu', muka' gapuy, bu' melabung gebel.

²⁰ Su gendaw, dulem.

Sug bulan, palasen maa' dugu'.

Tubus itu, mateng ki mekesalebu' Gendaw kiin, su Gendaw nu Kengkukumu tu tiba'an getaw, naan su Kaunutan Megbebaya'.

²¹ Mendadi adin su getaw mekpaingabang dinaan nu Kaunutan Megbebaya', guunen ku iin.' ”

²² Laung padun ni Pedro, “Mendadi yamu nu nga samau getaw Israel, talentenay niui talu'u diniu. Kini si Isus, getaw Nazaret, pinilala diniu pu' bigayan iin nu Megbebaya' pegbaya', pu' melaun ginuung muka' tu'us pinggulaula nu Kaunutan Megbebaya' pebian diniin. Kia, misuunan niu gupia, pu' midua' mata na niu. ²³ Mendadi si Isus kiin, pibunu' niu di nga kana' megbasa tu Megbebaya', pilansang niu di kurus. Laak dagid sa' kana' genat tu Megbebaya', pia su kedaap niu dun, ndi' niu sia megaga. ²⁴ Dagid pitubu' puli' nu Megbebaya' si Isus, biluyen di kelegenayen, pu' ndi' megdadi mbilin iin di gengkeman nu kepatay. ²⁵ Ma'antu dadema su sinulat dengantu ni David mekatag diniin ditu Misulat Talu' nu Megbebaya', laungen,

‘Tatapu maita' su Kaunutan di gedapan ku, tatapu niin penendingay, kaas ndi'u mendek.

²⁶ Mendadi gempiai ginau, liliagu gupia.

Naan, pia kilawanu, mekpedatengu ndi' melasakig lawasu,

²⁷ ndi' mu belengen su gimuuu ditug baya'.

Meseligan sesugu'en mau, kaas ndi' mu begay melasak diag lebengig lawasu.

²⁸ Pisuun mu dinaan kig dalan pangay tu ketubu' nda'i tamanen.

Ndi' mau na pesuay, kaas liliagu gupia.’ ”

²⁹ Laung padun ni Pedro, “Mendadi yamu kepetedan ku, talu'u tu'u diniu pu' ki megdedengeg ginepu'ay ta si Adi' David, suunan ta pu' minatay iin dakus libeng. Su pantiunen, deksu' nemun dia pa, nda' pa peglaat.^b ³⁰ Laak si David kia, pimuunan nu Megbebaya'. Misuunanen su

^b 2:29 Iini piulugan dun ni Pedro, kagina dia pa sug bangkay ni Adi' David, ndi' mesu'at pu' iini pisugatan dia sinulat kia, si David.

gempagen pinasad nu Megbebaya' diniin pu' tendu'en nu Megbebaya' ki sala tawan sapu'en meglegadi', maa' ni David kia. ³¹Mendadi misuunan ni David ki penggulaulaan nu Megbebaya' dig binaya' gebii bu' gendaw. Kaas suminulat si David mekatag di ketubu' puli' nu Tindu' nu Megbebaya' Meglekaunutan, laungen,

'Nda' belengay ditug baya' su gimouden,
muka' nda' melasak diag lebengig lawasen.' ”

³²Laung padun ni Pedro, “Naa si Isus kiin, pitubu' puli' nu Megbebaya'. Launan nami kini, miketakesi' ami gupia di ketubu'en puli'. ³³Mendadi, pilentu na si Isus tu gupid nu Gama'en Megbebaya' ditu gekbus langit, di dapit lintunen. Pipengapu' dun nu Gama'en Megbebaya' sug Balakaten, maa' dadema nu pinasaden. Mendadi adin su minita' niu dini nandaw muka' ki midengeg niu, iin su tinulung dinami nug Balakat nu Megbebaya'.

³⁴“Laak suunan ta pu' si David, kana' iini lumintu kia ditu gekbus langit. Pu' si David, iin sungkini suminulat dun ma'nini',

'Tinalu' nu Kaunutan Megbebaya' ditu Kaunutan ku,
Pegingkuda dini gupidu, dini dapit lintuu,

³⁵sampay di gendaw pelebaun ku ya'a daagen mu
su nga kuntra mu.' ”

³⁶Diksu' ni Pedro, “Mendadi pesuun ku dema tu'u diniu nga samau getaw Israel, kini si Isus, sug linansang niu di kurus, iin tu'ui su gilal nu Megbebaya' Tindu'en Meglekaunutan, muka' gilalen dadema su Kaunutan!”

³⁷Naa bena' midengeg nu nga getaw minampu' dia su tinalu' kia ni Pedro, milegenan ilan pati'.^c Sinaak nilan dini nga Pedro, “Plii lai, mekenduta' nami dun?”

³⁸Kali' sembag si Pedro dinilan, “Saladua' diniu, subay meksikesuun amu, muka' mekpebunag amu tubig tu'us di kesakup niu dini Isukristu, adun pedesunen su sala' niu. Begay dayun diniu, pengepu'an amu nug Balakat nu Megbebaya'. ³⁹Pu' pinasad nu Megbebaya', pengepu'an amu nug Balakaten muka' pengepu'anen dadema su nga gembata' niu, sampay su nga melayu' getaw, pia adini ginggat nu Kaunutan ta Megbebaya' sumakup diniin.”

⁴⁰Naa melaun pai tinalu' ni Pedro ditu nga getaw mipungun dia. Tinitulu'anen ilan, laungen, “Pekpesuay amu tu nga melaat getaw nemun, pu' adun ndi' amu mpeduma di ginukuman dinilan!”

⁴¹Naa su nga mikpetuud ditu talu' ni Pedro, mikpebunag ilan dayun tubig. Su gendaw kia, duun saani telu ngibu tawan midugang ditu pikumpulan nu nga sakup ni Isus. ⁴²Minamal ilan dayun mektu'un,

^c 2:37 Iini milegenan ilan dun, pu' migbiksu' ilan ditu kepatay nilan dini Isus.

pitu'unan ilan nu nga peneligan ni Isus, suminalabuuk dailan dema dinilan. Dumingan ilan maan ditug lebungan gindan tu kepatay ni Isus, muka' migduma dailan dema menenabi.

Su Pigbetad nu nga Mikpetuud dini Isus

⁴³Naa melaun ginuung muka' mekesalebu' tu'us pinggulaula nu nga peneligan ni Isus. Misebu'an dun pati' sug launan getaw. ⁴⁴Ki ngag launan mikpetuud, miksalabuuk ilan gupia, muka' adin sug duuni sukaten, migbegay ditu nda'ig daniin. ⁴⁵Su ngag дума, piksaluyenig lupa'en muka' pimetangen, dayunen begayay dun su genda'i kwartanen, bigayen duni sukal diniin. ⁴⁶Gendawgendaw mikpungun ilan ditug Balay Penedapan tu Megbebaya', muka' dia ngag balay nilan, dumingan dailan dema maan ditug lebungan gindan tu kepatay ni Isus. Pikilas nilan dema su nga gaan nilan, muka' gempia gupiai ginaa nilan. ⁴⁷Inal nilan su Megbebaya', muka' pigbesaan ilan pagid nu nga kelaun getaw. Muka' gendawgendaw, adin su migawen nu Kaunutan Megbebaya', midugang di pikumpungan nu nga mikpetuud.

Piuli'an ni Pedroi Pilung

3 ¹Naa duuni gendaw si Pedro muka' si Juan, pegangay ilan ditug Balay Penedapan tu Megbebaya', pu' betad nilan mangay ilan menenabi sa' meginenga' menaugi gendaw. ²Naa dia genga'an nu Penedapan piningalan dun su Melengas Genga'an, duuni getaw pilung, mipilung sikna mbata'en. Ki pilung kini, gendawgendaw pegbuligan nu ngag dumanen dia mesempel genga'an nu Penedapan kia, adun menengi limus ditu nga getaw suled dia. ³Naa mendadi ki pilung kia, bena' minita'en si Pedro muka' si Juan sungu suled dia, minengi dayun limus dinilan. ⁴Pingenlengan ni Pedro muka' ni Juan, laung dayun ni Pedro, "Pegbentayay mu ami!" ⁵Migbantay dinilan su pilung, pu' laungen dun, begayan. ⁶Laak dagid kali' pektalu' si Pedro, "Naa nda'iduni kwartau bulawan atawaka pelata, dagid adin sug duun dinaan, iinig begayu dini'a. Miksekat di pegbaya' ni Isukristu su getaw Nazaret, talu'u dini'a, panawa!"

⁷Piguidan ni Pedro ki pilung kini dig lintu kemeten, biwaten dayun. Tekaw mipeduunan sekegi gek suden. ⁸Mikpalintuk dayun ki pilung, mikepanawpanaw na. Migdunut dayun dini Pedro muka' dini Juan suled tu Penedapan tu Megbebaya', migleksuleksu muka' migenal tu Megbebaya'.

⁹Naa su ngag launan getaw dia, minita' nilan su kamun pilung, mikepanaw na, dunut inalen su Megbebaya'. ¹⁰Bena' mi'ilala nilan pu' iin su miging kud menengi limus ditu Melengas Genga'an, mipati' ilan mesebu'ay ditu mipenggulaula diniin.

Su Kegwali ni Pedro tu Penedapan tu Megbebaya'

¹¹Naa dia Penedapan tu Megbebaya', duuni sala balay piningalan dun nu getaw su silungen, Silung ni Salomon. Naa dia Silung ni Salomon kia, su kamun pilung, ginapusen si Pedro muka' si Juan. Migdedali' dayun mekpungun dia su nga getaw. ¹²Mendadi si Pedro, bena' minita'en su nga getaw mipungun, laungen dinilan, "Yamu nu nga getaw Israel, mauma dema misebu'an amu di mipenggulaula kini? Mauma pelum penentengan niu ami? Laung niu dun ba, mekepanaw nai getaw kini miksekat di ginuung nami atawaka su kepagen nu kekpetuud nami? ¹³Su Megbebaya', su piktamuy nu ginepu'ay ta si Abraham, si Isaac, muka' si Jacob, puun diniin migleep sug dengegan nu Sesugu'enen si Isus. Laak dagid kini si Isus, pigwakil niu ditu gubirnadur si Pilato, dayun niu pemelaway ditu gedapan nu gubirnadur. Pia beluyen sia ni Pilato, tigel niu si Pilato, ndi'en beluyen. ¹⁴Pimilas niu si Isus, ki mekesuun muka' leliagen dun su Megbebaya', pu' inubug niu dini Pilato, beluyeneni memunu'an, sabaya' ni Isus. ¹⁵Su puun nu ketubu', pinatay niu. Dagid pitubu' puli' iin nu Megbebaya'. Yami kini, miketakesi' ami dun. ¹⁶Mendadi si Isus kia, miksekat di pegbaya'eni sekeg nu pilung kini minita' niu. Miuli'ani getaw kini miksekat di kesalig nami dini Isus. Midua' mata na niu nandaw, launan niu."

¹⁷Kali' padun pektalu' si Pedro, "Mendadi, yamu nu kepetedan ku, suunan ku pu' su kekpatay niu dini Isus, yamu nu nga kaunutan niu, nda' niu mesuunay sa' ta' alanduni gasalen. ¹⁸Laak minuud dun su pisulat dengantu nu Megbebaya' ditu Talu'en, su sinulat nug launan pimuunanen pu' ki Tindu'en Meglekaunutan, subay mayan dig lesayan. ¹⁹Kaas peksikesuun amu, lingay amu ditu Megbebaya', adun ugasanen su nga sala' niu. ²⁰Sa' meksikesuun amu, tatap dayun pepianay nu Kaunutan Megbebaya'i ginaa niu, muka' pelusadenen su Tindu'en Meglekaunutan si Isus, su gandang pimili'en megabang diniu. ²¹Laak dagid subay pegelatan pa ni Isus ditu gekbus langit su gendaw pegupianan nu Megbebaya' su gekleb langit bu' lupa', ki pisuun nu Megbebaya' dengantu pebian di nga pimili'en pimuunanen. ²²Pu' sinulat ni Moises, laungen, 'Sugu'en nu Kaunutan Megbebaya' diniu ki pemuunanen maa' dinaan, ki samataw ta dig bansa ta. Ki pemuunanen kia, adin su telu'enen, talentenay niu. ²³Adin su ndi' mektalenten diniin, ukuman nu Megbebaya' di patay, adun mbeleng ditu piglegetawan nu Megbebaya'.' ²⁴Naa su kelaun pimuunan nu Megbebaya', genat dini Samuel sampay di nga mibinaya' pa diniin, mikpesuun ilan di gulaula nemun.

²⁵"Naa, yamui sapu' nu nga pimuunanen kia. Adin su pinasad nu Megbebaya' dinilan, pinasad dadema diniu. Iini pinasad nu Megbebaya' dini Abraham, laungen, 'Ki sapu' mu kiin, pepiananen sug launan

bansa di tibuuk lumbang.’ ” ²⁶Diksu' ni Pedro, “Naa bekna, sinugu' nu Megbebaya' diniu su Sesugu'enen, adun pepianan amu niin, saladua' diniu, peteliudenen tu sala'en.”

**Si Pedro muka' si Juan tu Gedapan nu nga
Metaas Gukum nu Getaw Judea**

4 ¹Naa selian ni Pedro muka' ni Juan megwali ditu nga getaw mipungun dia, luminabet dinilan su ngag belian nu getaw Judea muka' su nga Saduseo kampu' nu nga kaunutan nu nga pegingat tu Penedapan tu Megbebaya'. ²Naa ki nga getaw kini minateng, melaati ginaa nilan, pu' midengeg nilan pigukit ni nga Pedro tu nga getaw pu' mitubu' puli' si Isus. Kaas iini delendeman nilan, mbuus peglegintuuden nu nga getaw, metubu' puli'i nga minatay getaw. ³Mendadi dinaap nilan si nga Pedro, dayun nilan pikutay pa deli', pu' gebii na. ⁴Laak melaun getaw mikedengeg ditu kegwali ni nga Pedro, mituudan ilan dun. Su nga mikpetuud, midepet na saan lima ngibu tawan.

⁵Naa bena' miglegendaw, mipungun dia Jerusalem su nga kaunutan nu getaw Judea, su nga gukum, muka' su nga mekpetu'un di Misulat Palinta nu Megbebaya'. ⁶Minampu' dadema dinilan su Tampusan Metaas Belian si Anas muka' si Caifas, si Juan, si Alejandro, sampay su kelaun beta'an ni Anas. ⁷Mendadi ki nga kaunutan kini, bena' inagak nilan si nga Pedro dia gedapan, sinaakan nilan dayun, laung nilan, “Ki pinggulaula niu kia kalabung, kenduta'i kebaal niu dun? Ta' taway duni mikpebaya' diniu adun mekenggulaula amu di ma'antu kalabung?”

⁸Mendadi kini si Pedro, pingepu'an nug Balakat nu Megbebaya' di sembagen. Kali' pektalu' si Pedro, “Yamu nga kaunutan muka' gukum, ⁹sa' saakan niu ami mekatag di kepia tu pilung kia, muka' sa' saaken niu dinami kenduta'i kauli'ayen, ¹⁰naa melengas sembagen ku amu, adun mesuunan niu dakus mesuunan nu kelaun getaw Israel. Mikegindeg ki getaw kini di gedapan niu saba' miuli'an miksekat di ginuung ni Isukristu, getaw Nazaret, kig linansang niu di kurus, laak pitubu' puli' nu Megbebaya'. ¹¹Kini si Isus, iini pisugatan ditu Talu' nu Megbebaya', laungen,

‘Kig batu pimilas niu nu nga megbaal balay,
iini mibaal tampusan gempagen gentudan nug balay.’ ”^d

¹²Laung pa ni Pedro, “Mendadi, nda'idunig lain mekegawen dinita, subay si Isus. Pu' nda'idunig lain getaw dig dibabaw lumbang pipegbaya' nu Megbebaya' adun guunen ita niin, subay laak si Isus. Nda'iduni kegawen dinita subay pebian diniin.”

^d 4:11 Si Isus, pitanggi' ditug batu pimilas nu getaw megbaal balay, pu' pimilas iin nu nga getaw Judea, asa iini tindu' nu Megbebaya' tampusan metaas.

¹³Naa mendadi ki nga gukum kini, bena' minita' nilan si Pedro muka' si Juan gembelu' gupia sumbag, asa maika'i mitu'unan nilan, misebu'an ilan dun gupia. Mi'ilala nilan dayun pu' pigdumanan ilan ni Isus. ¹⁴Naa nda' maolakay nu nga gukum su simbag ni Pedro, pu' ki miuli'an kia, dia ma pegindeg gupid ni nga Pedro. ¹⁵Sa' ma'antu, ki nga gukum kini, pipegua' nilan deli' si nga Pedro dia pengukuman, adun peksebutsebuten nilan ki ginukuman nilan dia mipenggulaula. ¹⁶Laak laung nilan, "Ta' alandun maig baalen ta di nga getaw kiin? Pu' ndi' ta ma dema mpemilas ki mekesalebu' pinggulaula nilan kiin, pu' misuunan nug launan getaw dini Jerusalem. ¹⁷Tumu' pemaagen ta laak ilan, ndi' na nilan sembayan ki ngalan ni Isus kiin, pia tu sala tawan, adun ndi' mesigwag di nga getawi gukiten nu mipenggulaula kini."

¹⁸Mendadi, sinabi puli' nu nga kaunutan si Pedro muka' si Juan. Pimaag nilan dayun, adun nda'idun nai pegukit nilan, nda'iduni pektu'un nilan, sembayan nilan su ngalan ni Isus kiin. ¹⁹Dagid sumimbag si Pedro muka' si Juan, laung nilan, "Naa, yamui petitenga' dun, sa' alanduni gempia di pegita'en nu Megbebaya'. Mekpetuud ami diniin, atawaka mekpetuud ami diniu? ²⁰Pu' ndi' nami metigel sa' ndi' nami pegukiten tu nga getaw ki minita' nami muka' ki midengeg nami mekatag dini Isus."

²¹⁻²²Naa pisilutan sia nu nga kaunutan si nga Pedro, laak ndi' mesu'at, pu' mbuus sumugut dini nga Pedro su nga getaw, kagina migleep di nga kelaun getaw sug dengegan nu Megbebaya' saba' nu pilung kia miuli'an, minayan na paat pulu'i taunen. Ma'antu, pingimeekan pati' nu nga kaunutan si nga Pedro, muka' biluy ilan dayun.

Minenabi su nga Mikpetuud adun Meksibelu' ilan Megukit

²³Naa dekap biluy si Pedro muka' si Juan, mipuli' ilan ditu ngag дума nilan, inukit nilan dayun ditug launan ki tinalu' dinilan kia nu nga kaunutan nug belian muka' nu ngag дума kaunutan nu getaw Judea.

²⁴Mendadi bena' midengeg nu nga mikpetuud, miksalabuuk ilan dayun menenabi ditu Megbebaya', laung nilan, "Uu Megbebaya', ya'ai Mikleb tug langit, Miwat tug lupa', Minunag tug dagat, Minaglis tu tubig, muka' Mitang dig lumaun bitang dun! ²⁵Ki ginepu'ay nami si David, sesugu'en mu, pisulat nug Balakat mu, laungen,

'Mauma dema mimelu' su nga kana' getaw Judea?

Mauma dema iini delendeman nu nga samatawu su ndai' gatagen?

²⁶Su nga gadi' dema dig lumbang kini, mingandam ilan,

su nga kaunutan padun, mikpungun ilan,

adun lumpakan nilan su Kaunutan Megbebaya' muka' su Tindu'en

Meglekaunutan.' "

²⁷Kali' gusay penenabi su nga mikpetuud, "Naa, uu Megbebaya', mikpungun na tu'u dinig lunsud kini si Herodes muka' si Poncio

Pilato, kampu' nu nga getaw Israel muka' su nga kana', suminugut ilan kumuntra ditu pimili' Sesugu'en mu si Isus, su Tindu' mu Meglekaunutan. ²⁸Laak dagid sug launan mipenggulaula nilan kia, lumbus dani'a pegbaya' muka' delendeman mpenggulaula. ²⁹Mendadi nandaw, uu Kaunutan, talentenay mu su kengimeek nilan dinami, yami nga sesugu'en mu, muka' begay mu dinami meksibelu' ami megukit tu talu' mu. ³⁰Peduma mu dun pagid paita' di nga getaw su ginuung mu mekpauli' dun su nga megladu, muka' menggulaula mekesalebu' muka' tu'us pebian di pegbaya' nu pimili' Sesugu'en mu si Isus.”

³¹Mendadi bena' mitubus menenabi su nga mikpetuud, mikelegyug sug balay piglumpukan nilan. Dayun ilan gela' pengepu'ay nug Balakat nu Megbebaya'. Minibelu' ilan dayun megukit tu talu' nu Megbebaya'.

Pinungun su Kelaun Gimu nu nga Mikpetuud

³²Naa su pikumpungan nu nga mikpetuud, miksyalabuuk ilan dig delendeman sampay di ginaa. Nda'iduni minangken nga pimetangen, miktinebangay laak ilan. ³³Su nga peneligan ni Isus, bigayan ilan ginuung tumakesi' di ketubu' puli' nu Kaunutan si Isus, muka' migela' pepianay nu Megbebaya' su nga mikpetuud. ³⁴Nda'i sala tawan di pikumpungan nilan nda'iduni kulangen, pu' adin sug duunig lupa'en atawaka balayen, piksaluyen, dayunen uitay su galinen ³⁵pigwakil ditu nga peneligan ni Isus. Pikilas nilan dayun, adin sug duuni kulangen, bigayan nilan di sukal diniin.

³⁶Mendadi duuni getaw Cipre ngalanen si Jose, sapu' ni Levi, piningalan dun nu nga peneligan ni Isus si Bernabe, (guluganen “Su Metau Mekamu'amu”). ³⁷Si Bernabe, duunig lupa'en piksaluyen, dayunen pigwakil su galinen ditu nga peneligan ni Isus.

Si Ananias muka' si Safira

5 ¹Laak duuni getaw ngalanen si Ananias, su sawanen si Safira. Kini si nga Ananias, duunig lupa' nilan piksaluy nilan. ²Dagid duuni sinawad dun ni Ananias su galinen, sinangu' dadema nu sawanen. Dayun uitay ni Ananias su galinen ditu nga peneligan ni Isus, pigwakilen dinilan. ³Dagid sinaak ni Pedro diniin, “Ananias, mauma dema pinulaya ni Satanas, adun migbalusa tug Balakat nu Megbebaya'? Miksawada dun su galin nug lupa' niu kiin. ⁴Naa su nda' mu pa peksaluy, ya'ai metau dun. Muka' sa' piksaluy mu, ya'a da gusayi megbaya' dun su galinen. Naa, mauma dema midelendem mu menggulaula ma'niin? Kana' laak nu kilawani piglimbungan mu, su na Megbebaya'!”

⁵Lemen laak midengeg ni Ananiasi tinalu' kia ni Pedro, miseksud dayun, mitigbak. Mindek dayun pati' su nga mikedengeg dun. ⁶Dekag minatay si Ananias, migbuat su ngag begu getaw, pigupianan nilan dayun sug bangkayen, iwit nilan diag liu, inangay nilan dayun lebengay.

⁷Mendadi, duun saani telu uras, minateng su sawa ni Ananias, laak nda'en suunayi mipenggulaula. ⁸Miktalu' si Pedro dini Safira kini, "Pesuun mu dinaan sa' iin baig launen, ki galin nug lupa' niu."

"Wa'a," simbag ni Safira, "daal daitu."

⁹Kali' pektalu' si Pedro diniin, "Mauma dema amu dua', midelendem niu pengindanan niu sug Balakat nu Megbebaya'? Naa, diin na bisuangan kiin su nga getaw miblebeng tu sawa mu mundiin. Pedumaan ka nilan lebengay!" ¹⁰Mitekaw dayun meseksud ki sawa ni Ananias kia, mitigbak pagid. Sumiled dia su ngag begu getaw kia. Bena' minita' nilan pu' minatay dadema iin, iwit nilan diag liu, dayun nilan lebengay, ditu dadema gupid nug lebeng nu sawanen. ¹¹Bena' midengeg nu pikumpungan nu sakup ni Isus ki mipenggulaula kia, migela' ilan mendek. Ma'antu dadema su taman mikedengeg dun, sakup sa' kana'.

Nga Mekesalebu' Penggulaula muka' Tu'us

¹²Naa su nga peneligan ni Isus, melaun mekesalebu' penggulaula muka' tu'us binaal nilan di pegita'en nu nga getaw. Tatap mekpungun su nga kelaun mikpetuud ditu Penedapan tu Megbebaya', dia Silung ni Salomon. ¹³Pigbesaan gupia nu nga getaw su nga suminakup dini Isus, laak pia ma'antu, mindek lumamug dinilan su ngag дума getaw. ¹⁴Laak minamal ilan gupia megdugang, pu' melaun gupia getaw mikpetuud tu Kaunutan si Isus, libun laki. ¹⁵Kaas su nga migladu, iwit nug dumanen dia nga karsada, pibelilid nilan di sampuyuan atawaka di gikam adun pulu' sug дума dun, mbianan ilan nug lingu laak ni Pedro. ¹⁶Melaun getaw mikpungun ditu nga peneligan ni Isus dia Jerusalem genat di ngag lumibut lunsud, peguiten nilan dia su nga pegladu muka' nga piglegetan menenulay. Mendadi miuli'an ilan dayun, launan nilan.

Piglegetan su nga Peneligan ni Isus

¹⁷Naa kagina ma'antu, ki Tampusan Metaas Belian nu getaw Judea muka' ki ngag dumanen di pikumpungan nu nga Saduseo, misigi ilan pati' ditu nga peneligan ni Isus. ¹⁸Mendadi dinaap nilan si nga Pedro muka' pinikutan nilan. ¹⁹Dagid su gebii kitu, duun masi'i sesugu'en nu Megbebaya' getaw langit minuka' tu pirusuan, inagaken dayun si nga Pedro gumawas dia. Kali' pektalu' dinilan, ²⁰"Naa, puli' amu ditu Penedapan tu Megbebaya'. Pegindeg amu dia, pegukit amu dayun ditu nga getaw mekatag dig begu ketubu' kini." ²¹Bena' midengeg nu nga peneligan ni Isus kia, pituud nilan dayun. Bena' dali' endaw, milapus ilan mpanaw ditu Penedapan, mikpetu'un ilan dayun dia.

Mendadi ki Tampusan Metaas Belian kia muka' ki ngag dumanen, pinsabi nilan su tibuuk Pikumpungan nu Metaas Gukum nu getaw Judea. Bena' migela' ilan mpungun, piangay nilan sia su nga peneligan ni Isus

dia pirisuan. ²²Laak dagid sa' minateng dia pirisuan su nga pegingat tu Penedapan tu Megbebaya', nda' na nilan metaangay su nga peneligan ni Isus. Mipuli' ilan dayun ditu nga gukum, kali' ilan pegukit dinilan, ²³“Sa' minateng ami ditu pirisuan, mitaangan nami, pimegenan pa tekepay. Su nga megingat di pirisuan, dia dailan bisuanganen. Laak bena' pinuka' nami, nda'idun nai getaw diag dialem!” ²⁴Naa, apelai. Bena' midengeg nu nga kaunutan nug belian kini muka' nu kaunutan di pegingat tu Penedapan, milibuleng ilan gupia, sa' ta' alandun pai mpenggulaula dig binaya' gebii bu' gendaw. ²⁵Naa segay nilan mesebu'ay dun, duuni getaw minateng, laungen dinilan, “Ki nga pinikutan niu kiin, dia dailan dibaluy nu Penedapan kini, mikpetu'un ilan tu nga getaw!” ²⁶Sa' ma'nia, inangay dayun nu nga megingat kia su nga peneligan ni Isus, dinunutan ilan nu kaunutan nilan. Laak nda' nilan penedegay si nga Pedro, pu' mendek ilan mbuus betuun ilan nu nga getaw miktabu' dia.

²⁷Mendadi bena' inagak dia su nga peneligan ni Isus, pinindeng ilan dia gedapan nu Pikumpungan nu nga Gukum, sinaakan ilan dayun nu Tampusan Metaas Belian. ²⁸Kali' pektalu' su Metaas Belian, “Naa mendadi, pimeek nami amu gupia pu' ndi' niu sembayani ngalan kini sa' mekpetu'un amu! Naa bentayay pa daan niu, su pigukit niu, mileep na dini Jerusalem! Muka' pingelegan niu ami, laung niu yamii mikpatay di getaw kiin!”

²⁹Kali' sembag si nga Pedro, “Subay mekpetuud ami tu Megbebaya', sabaya' diniu. ³⁰Pu' su Megbebaya' pektemuyen nu nga ginepu'ay ta, iini mikpetubu' puli' dini Isus kiin, su pinatay niu, linansang niu di kurus. ³¹Mendadi kini si Isus, pitaas dadema nu Megbebaya', pi'ingkuden di gupiden dapit lintunen adun iini meglekaunutan muka' meglegawen, adun ebanan ita niin nga getaw Israel meksikesuun muka' pedesunen ita niin di nga sala' ta. ³²Naa, yami kenii miketakesi' di ketubu'en puli'. Miketakesi' dun padun sug Balakat nu Megbebaya', su pepengepu'en nu Megbebaya' di nga mekpetuud dini Isus.”

³³Mendadi ki nga gukum kini, bena' midengeg nilan su sembag kia ni nga Pedro, mitutung ilan gangit, taginaa nilan dun, pepatay nilan su nga peneligan kia. ³⁴Dagid migindegi sala tawan gukum, ngalanen si Gamaliel, iini sala tawan di pikumpungan piningalan dun Pariseo. Mekpetu'un si Gamaliel di Misulat Palinta nu Megbebaya', pegbesaan gupia nu nga kelaun getaw. Migindeg dia gedapan nu nga gukum si Gamaliel, sinugu'en dayun pegua'en deli' dia si nga Pedro. ³⁵Bena' mipalus ilan, kali' pektalu' si Gamaliel dia nga gukum, “Mendadi yamu nga samau getaw Israel, peksiba'an ta ki gulaula ta di nga getaw kiin, adun ndi' ita melapang. ³⁶Pu' misuunan ta pu' begudiin, duuni getaw ngalanen si Teudas, inangkenen metaasi gelalen. Duun saani paat gatus tawan suminakup dayun diniin. Laak binunu' iin, dayun mipelak su nga

kelaun sakupen, mibulugan na laak. ³⁷Mendadi tubus itu, duuni getaw Galilea ngalanen si Judas. Su timpu pa nu kenlista tu nga getaw, melaun getaw suminakup dini Judas kia. Laak minatay dadema, mipelak dayun su nga kelaun sakupen.” ³⁸Laung pa ni Gamaliel, “Naa mendadi talu' u diniu nandaw, ndi' ta pulegen ki nga getaw kiin. Petuyangen ta nailan! Pu' sa' genat laak di kilawani penggulaulaan nilan kini, mbulugan laak. ³⁹Dagid sa' genat tu Megbebaya', naa ndi' ta maulakan. Mbuus mpengetuan ta su Megbebaya'!”

Mendadi, sinangu' nu nga gukum su tinalu' kia ni Gamaliel. ⁴⁰Dekag sinabi puli' su nga peneligan ni Isus kia, pimbadas ilan muka' pimaag dinilan ki keksambay nilan dini Isus, dayun ilan beluyay. ⁴¹Naa su nga peneligan ni Isus, bena' mikegua' ilan dia Pikumpungan nu nga Gukum, liliag ilan gupia, kagina mipemilang ilan nu Megbebaya' mbantang pepiidan saba' nu kesakup nilan dini Isus. ⁴²Genat itu, dia ngag balay mesama ditu Penedapan tu Megbebaya', gendawgendaw minimal ilan mekpetu'un muka' megwali di Gempia Petenday mekatag dini Isus, su Tindu' nu Megbebaya' Meglekaunutan.

Su Pitu Tawan Megabang di nga Samasakupen

6 ¹Naa selian megdugang su nga mikpetuud dini Isus, duuni nga sakupen miksual. Su ngag дума sakup, getaw Judea, laak mektalu' ilan pikebitan nu nga getaw Grecia, muka' duun dademai sakup mektalu' ilan pikebitan nu getaw Judea. Naa laung nu nga sakup kia mektalu' pikebitan nu getaw Grecia, gendawgendaw sa' pekilasan su ketubu'an, duuni ngag balulibun dinilan meleksawan. ²Mendadi, sinabi nu nga sepulu' bu' dua' tawan peneligan ni Isus su tibuuk pikumpungan nu nga mikpetuud. Bena' mipungun ilan, kali' pektalu' su nga peneligan, “Ndi' mpia mundang ami megukit di talu' nu Megbebaya', adun mekegilas ami di ketubu'an. ³Iini melengas, uu Mingumpated, pemili' amu di ngag дума niu pitu tawan, iini pemili' niu ki melengasig dengeganen, muka' pingepu'an nug Balakat nu Megbebaya' dakus mekesuun gupia. Sa' mpemili' na niu, tendu'en nami ilan dayun mekilas di ketubu'an. ⁴Naa yami dema, menamal dami menenabi muka' megukit di talu' nu Megbebaya'.”

⁵Sinangu' dayun nu tibuuk pikumpungan nu nga sakup ki tinalu' kia nu nga peneligan ni Isus. Pimili' nilan dayun si Esteban, sala tawan suminalig gupia tu Megbebaya' muka' pingepu'an nug Balakaten. Pimili' nilan pagid si nga Felipe, si Procoro, si Nicanor, si Timon, si Parmenas muka' si Nicolas getaw Antioquia, kana' getaw Judea laak miginetaw Judea. ⁶Mendadi ki pitu tawan pimili' nilan, inunutan ilan dayun tu gedapan nu nga peneligan ni Isus. Pinenebian ilan dayun nu nga peneligan ni Isus muka' dipenan ilan, tu'us tindu' ilan mekilas di ketubu'an.

⁷Ma'antu, minamal megdugang su nga mikedengeg ditu talu' nu Megbebaya' pigukit nu nga peneligan ni Isus. Migdugang dayun gupia su nga sakup ni Isus dia Jerusalem, melaun dademaig belian nu nga getaw Judea mikpetuud dun.

Su Kedaap dini Esteban

⁸Naa si Esteban kia, tinulungan gupia nu Megbebaya' muka' bigayanen ginuung, kaas melaun mekesalebu' pinggulaula muka' tu'us binaalen di gedapan nu nga getaw. ⁹Dagid kini si Esteban, siwal nu sakup di sala simbaan nu getaw Judea, su Simbaan nu nga Gulipen Pibeluy, (iini piningalan dun). Ki nga sakup di simbaan kia, getaw Cirene sug дума, dayun duun pagidi getaw Alejandria, getaw Cilicia, muka' getaw Asia. ¹⁰Dagid ilan kini, nda' ilan kegaga di telisebutay ni Esteban miksekat tug Balakat nu Megbebaya'. ¹¹Sa' ma'nia, tinindanan nilani nga getaw megukit dig balus, adun telu'en nilan, “Midengeg nami si Esteban kiin, mimilas tu palinta ni Moises sampay mikсуди' tu Megbebaya'!” ¹²Ma'nia, sinasaw nilani ginaa nu nga getaw kampu' nu nga kaunutan nu getaw Judea muka' su nga mekpetu'un di Misulat Palinta nu Megbebaya'. Mendadi, dinaap nilan si Esteban, iwit nilan dayun tu gedapan nu Pikumpungan nu Metaas Gukum. ¹³Dekag minateng ilan ditu, duuni sinabi nilan nga tumakesi' dig balus mekatag dini Esteban kia. Kali' dayun pektalu' su tumakesi' kia, “Ki getaw kini, tatap menampalaksa tu Penedapan ta tu Megbebaya' muka' tu Palinta nu Megbebaya' pisulaten dini Moises. ¹⁴Midengeg nami ki tinalu'en pu' ki Penedapan tu Megbebaya' kini, geba'en daw ni Isus kiin getaw Nazaret, dakus pelinenen daw padun su kelaun betad ta pingumbilin dinita ni Moises!” ¹⁵Sa' ma'nia, tintengan gupia si Esteban nu ngag launan kaunutan kia. Pegita' nilan dun su mulu'en, maa' danu sesugu'en nu Megbebaya' getaw langit.

Su Pimentalu' ni Esteban

7 ¹Mendadi, sinaakan nu Tampusan Metaas Belian si Esteban, laungen, “Metuud kali'ig dinangat nilan kini mekatag dini'a?” ²Kali' pektalu' si Esteban, “Yamu nga Mekegulang muka' yamu nga Mingumpated, pekineegay niui telu'en ku kini! Su megdedengeg Megbebaya' pektemuyen ta, mikpaita' ditu ginepu'ay ta si Abraham su diin pa Mesopotamia, su nda' pa kegbenwa si Abraham tu Haran. ³Miktalu' su Megbebaya' diniin, ‘Pegawa'a dig daan benwa mu kini muka' di ngag beta'an mu, uli'a dig lain benwa, ki paita'u pa dini'a.’ ⁴Mendadi sa' ma'antu, migawa' tu'u si Abraham dig daan benwanen, sug benwa nu getaw Caldea, muka' minuli' tu Haran. Selian nilan dia, minatay su gama' ni Abraham, iin pa pibundas nu Megbebaya' si Abraham dini

pegbenwanan ta nandaw. ⁵Laak nda'ig lupa' bigay nu Megbebaya' dini Abraham, pia laak ma'niin palad. Laak dagid pinasad nu Megbebaya' diniin, kig benwa kini, begayen pa diniin, adun daniin benwa muka' danu nga sapu'en. Asa nda'idun paig bata' ni Abraham di gendaw kia. ⁶Mikталu' su Megbebaya' dini Abraham, 'Su sapu' mu, muli' pailan dig lain benwa, ki kana' danilan benwa. Baalen ilan gulipen ditu dakus pelaatan ilan sampay paat gatus taun. ⁷Laak dagid sug bansa nu getaw mengulipen dinilan, ukuman ku. Kaas tubus itu, mekegawa' ilan dig benwa kitu, muli' ilan dinig benwa kini, adun mektamuy ilan dinaan dini.' ”

⁸Laung padun ni Esteban, “Naa muka' tubus itu, tinalu' pa pagid nu Megbebaya' dini Abraham pu' su ngag bata'en, di kewalu endawen genat kegetawen, subay sirkunsisuun, tu'us di pasad kia nu Megbebaya' dinilan.^e Sa' ma'antu, su kegetaw nug bata'en si Isaac, di kewalu endawen, sinirkunsisu tu'u ni Abraham si Isaac. Ma'antu dadema su pinggulaula ni Isaac tug bata'en si Jacob. Dayun su pelum sepulu' bu' dua' tawan bata' ni Jacob, su nga ginepu'ay ta kitu, pima'nia ilan dadema ni Jacob.

⁹“Mendadi sala tawan bata' ni Jacob, iin si Jose. Naa kini si Jose, mingimbegu gupia diniin su nga gulangbata'en. Sa' ma'antu, piksaluy nilan iin, dayun iwit nu mingulipen dun ditug Ehipto. Dagid ibangan nu Megbebaya' si Jose diag Ehipto, ¹⁰ginawenen dayun dig launan kelegenayen. Pipianan gupia nu Megbebaya', kaas liliag dini Jose su gadi', pu' di pegita'en dun, mekesuun gupia si Jose. Sa' ma'nia, binaal dayun nu gadi' si Jose kaunutan di tibuuk benwa Ehipto, sampay diag balay nu gadi'.”

¹¹Maa' laung padun ni Esteban, “Naa nda' maiben, binianan gutem kig benwa Ehipto kia sampay su Canaan, milegenan dun gupia su getaw. Su ginepu'ay ta si nga Jacob dia Canaan, nda'iduni sukatan nilan gaan. ¹²Mendadi bena' midengeg ni Jacob duun daw iin ditug Ehipto, sinugu'en su ngag bata'en memuku ditu. Iinig bekna keditu nu nga ginepu'ay ta. ¹³Dayun di kedua' deksu' nilan mpanaw ditug Ehipto, mikpailala dinilan si Jose. Misuunan dayun nu gadi', pated ilan ni Jose. ¹⁴Tubus itu, pimuunan ni Jose su gama'en si Jacob muli' dia, sampay su nga kelaun beta'anen, pitu pulu' bu' lima tawan ilan. ¹⁵Naa sa' ma'nia, minuli' ilan tu'u ditug Ehipto. Ditu na dayun minatay si Jacob, sampay su nga ginepu'ay ta kitu. ¹⁶Laak iwit puli' ditu Canaan, dia dapit Siquem, su ngag bangkay nilan, dayun libeng tug lebengan sinaluy dengantu ni Abraham di ngag bata' ni Hamor, getaw Siquem.

^e 7:8 Sug betad sirkunsisu, tinitulu' nu Megbebaya' tu nga getaw Judea. Su gambata' laki, sa' walu endaw genat di kegetawen, tebia' tuli'en, pu' guluganen, tu'us pu' getaw Judea, sa'itada getaw mektamuy tu Megbebaya'.

17“Mendadi sa' sungu mateng su kenuud nu pinasad kiin nu Megbebaya' dini Abraham, miksilaun na gupia diag Ehipto su getaw nug bansa ta. 18Laak di timpu kia duunig lain gadi' meglekaunutan diag Ehipto, su nda' maukitay ditu tindeg dengantu ni Jose, 19kaas pilaatanen su ginepu'ay ta. Sinugu'en dinilan peliuun dig balay su nga gembata' nilan, sug begu pa pegigetaw, adun sia mematay.”

20Laung padun ni Esteban, “Naa su timpu kitu, migigetaw si Moises, piabata' gupia di pegita' dun nu Megbebaya'. Kini si Moises, telu bulan pegingatay nu mekegulanganen diag balay nilan, 21dayun nilan peliuy dia. Laak dagid minita' bata' nu gadi', libun, dayunen beta'ay. 22Piktu'unan dayun si Moises dig launan betad nu getaw Ehipto. Sa' migineken na, metau gupia megyaga, dakus mekesuun su gulaulanen.

23“Naa bena' paat pulu' nai taun ni Moises, midelendemen laawanen su kebetang nu nga samanen getaw Israel. 24Mendadi selianen ditu nilan, minita' ni Moises sala tawani getaw Israel pilaatan getaw Ehipto. Sinugutan dayun ni Moises, pinatayen su getaw Ehipto. 25(Laung dun ni Moises, mesuunan dayun nu nga samanen getaw Israel, iini pimili' nu Megbebaya' gumawen dinilan. Laak nda' nilan mesuunayi ginangayen kia.) 26Naa bena' migendaw puli', duun pelumi midetengan ni Moises dua' tawan miksual, lumbus getaw Israel. Pimaag ilan dayun ni Moises, piksuden ilan sia, laungen dinilan, ‘Baa lai, mauma dema meksual amu, asa megbeta'an damu?’ 27Laak su mikpelaat tug dumanen, tinuluden si Moises, laungen diniin, ‘Ya'a, bigayan ka ba pegbaya' dinami? Gukuma ba dinami? 28Petain mau pa padun,’ sinaak padun nu getaw kia dini Moises, ‘maa' nu pinatay mu su getaw Ehipto kalabung?’ 29Bena' midengeg ni Moises, minawa' dayun diag Ehipto, miglaguy tug benwa Midian. Segayen megbenwa tu Midian, duun naig bata'en dua' tawan, lumbus laki.

30“Naa mendadi,” laung pa ni Esteban, “bena' paat pulu' taun ditu Midian si Moises, duuni gendaw, ditu si Moises limawa' mesempel dig Bentud Sinai. Selianen dia, duuni mikpekita' diniin sesugu'en nu Megbebaya' getaw langit. Ki getaw langit kini, mitua' dia titenga' nu sala puun sigbet migliga'. 31Misebu'an dun gupia si Moises. Kali' pekpesempel di sigbet kia, pigipusen sug liga', midengegen su talu' nu Kaunutan Megbebaya'. 32Kali' pektalu', ‘Naan su Megbebaya’, su pektemuyen nu nga ginepu'ay mu si Abraham, si Isaac muka' si Jacob.’ Sinaaban dayun si Moises, ndi' mekaku' megbantay dun. 33Maa' laung padun nu Kaunutan Megbebaya' diniin, ‘Luas mu su sepatus mu kiin, pu' kig lupa' kiin ginindegan mu, danaan dain. 34Naa mendadi,’ maa' laung padun nu Megbebaya', ‘minita'u dema tu'u su meliget kelegenay nu nga piglegetawan ku. Midengegu pa pagid sug degu nilan, kaas mitua'u adun gumawen dinilan di kaulipen dinilan. Mendadi ya'a, Moises, ya'ai sugu'en ku mpanaw ditug Ehipto.’ ”

³⁵Maa' laung padun ni Esteban, “Naa kini si Moises, ki pimilas kiin nu nga getaw Israel, su tilu'an nilan begudiin, ‘Nda'i pegbaya' mu dinami, muka' kana'a gukum dinami,’ iin masi' tu'u su sinugu' nu Megbebaya' meglekaunutan dinilan muka' gumawen dinilan, kaas ibangan si Moises nu getaw langit, su mikpaita' diniin dia sigbet migliga'. ³⁶Naa sa' ma'antu, iwit tu'u ni Moises su nga getaw Israel memegawa' diag Ehipto. Melaun mekesalebu' pinggulaula muka' tu'us binaal ni Moises ditug Ehipto muka' tu Gempula Dagat sampay ditug limawa', paat pulu' taun ilan ditug limawa' kia. ³⁷Mendadi kini si Moises, iini mikталu' tu nga getaw Israel ma'nini'. ‘Duun pai tendu'en nu Megbebaya' pemuunanen diniu, ma'niin dinaan, sama da niu dema getaw Israel.’ ³⁸Kaas si Moises, iinig duma nu nga getaw Israel mipungun ditug limawa', ki ginepu'ay ta, muka' iin dademaig duma nu getaw langit mikталu' diniin ditug Bentud Sinai. Iin pa paduni pigwekilan talu' nu Megbebaya' nda'i kebelengen, adun pengumbilinen dinita.”

³⁹Laung padun ni Esteban, “Laak dagid pia ma'antu, su nga ginepu'ay ta, nda' ilan pekpetuud dini Moises. Mimilas ilan diniin, pu' migindaw nilan su kebetang nilan ditug Ehipto. ⁴⁰Kaas laung nu getaw Israel dini Aaron, ‘Baalay mu ami ngag ledawan mekpenulu' dinami bianan nami. Pu' si Moises kiin,’ laung nilan, ‘su miguit dinami memegawa' ditug Ehipto, naa nda' nami suunay sa' adin dun.’^f

⁴¹“Mendadi ma'antu, binaalan ilan tu'u ni Aaron ledawan ma'niin palas nati baka, iini pingilakan nilan dayun. Liliag ilan gupia dia pimbaalbaar nilan kia. ⁴²Sa' ma'antu, tiliudan ilan dayun nu Megbebaya', pituyang ilan niin mektamuy ditu ngag bitun tug langit, maa' dadema nu sinulat nu nga pimuunan nu Megbebaya' ditu Misulat Talu'en, laungen, ‘Yamu nu nga getaw Israel! Kana' naani piktamuy niu, kana' naani pingilakan niu guliden, saanan nu kepanaw niu kiin paat pulu' taun ditug limawa'.

⁴³Pegeguiten niu sug lepintaw binaal luna bitangan ledawan, ngalanen si Moloc,

muka' sug binaal niu ledawan nug diwata niu bitun, ngalanen si Repan, lumbus pimbaalbaar laak niu, adun pektemuyen niu.

Kaas iini puunanen, pua'en ku amu dig benwa kini, penguiten amu dayun ditu dapit dibaluy nug benwa Babilonia.’ ”

⁴⁴Laung padun ni Esteban, “Mendadi, saanan nu ginepu'ay ta ditug limawa', ditu nilan sug Lepintaw nu Takesi' binaal luna, iini pengedapan nilan tu Megbebaya'.^g Kig lepintaw kia, binaal maa' nu tinitulu' dun

^f 7:40 Si Moises, ditu pa ditaas nug Bentud Sinai, selian nu Megbebaya' megwakil nu palintanen diniin. ^g 7:44 Sug Lepintaw nu Takesi', mitakesi'an dun pu' dia pegbenwa su Kaunutan Megbebaya'. Pu' pinasaden tu nga getaw Judea, ndi' nailan belengan niin.

nu Megbebaya' dini Moises, ma'niin gupia nug lendasan pinita' diniin. ⁴⁵Naa bena' miawi' na nu ginepu'ay ta si Josue kig benwa kitu, pu' piawa' na nu Megbebaya' su ngag lain bansa, iwit nilan sug lepintaw kitu pinusaka' dinilan nu nga gama' nilan. Dia dayun sug lepintaw, sampay di gendaw ni David. ⁴⁶Naa si David kia, liliag gupia diniin su Megbebaya', kaas mikpekilelaat si David ditu Megbebaya', iin siai megbaal balay pegbenwanan nu Megbebaya', su pektemuyen ni Jacob kitu. ⁴⁷Laak iini migbaal dun, si Salomon na.”

⁴⁸Laung padun ni Esteban, “Laak dagid su Tampusan Metaas Megbebaya', ndi'en pegbenwananig balay binaal nu kilawan. Iini sinulat dengantu nu pimuunan nu Megbebaya' ditu Misulat Talu'en, laungen,

⁴⁹ ‘Gingkudan ku sug langit, laung nu Kaunutan Megbebaya', muka' bendayan ku sug lumbang.

Metau bamu megbaal balay mbantang dinaan?

Duun bai pelelian ku?

⁵⁰ Kana' ba naani migbaal dun sug launan bitang di gekleb langit bu' lupa?' ”

⁵¹Mendadi, miktalu' pa padun si Esteban tu nga gukum kia, “Naa yamu pa di nga getaw, meketegas gupiai gulu niu! Sug delendeman niu, maa' nug delendeman nu nga kana' getaw Judea! Ndi' niu talentenan su tinalu' nu Megbebaya'! Mesama damu di nga ginepu'ay niu, pu' tatap niu pemilasay sug Balakat nu Megbebaya'! ⁵²Duun bai sala tawan pimuunan nu Megbebaya' dengantu, nda' peglegetay nu nga ginepu'ay niu? Binunu' nilan su nga pimuunanen mekpetenday pedaan tu ketua' nu mekesuun Sesugu'enen. Mendadi yamu pelum, bena' mitua' nain diniu, tinipu niu muka' binunu' niu. ⁵³Yamui pigwekilan nu sesugu'en nu Megbebaya' getaw langit tu Palintanen, dagid nda' niu dunutay!”

Su Kebatu dini Esteban

⁵⁴Naa ki nga gukum kini, bena' midengeg nilan su tinalu' kia ni Esteban, mingkiget ilan di ngisi nilan, saba' mitutung ilan gangit diniin. ⁵⁵Dagid kini si Esteban, pingepu'an nug Balakat nu Megbebaya'. Migangag tug langit, minita'en di tiag su kelengas nu pegbaya' nu Megbebaya', muka' minita'en pa pagid si Isus pegindeg dia dapit lintu nu Megbebaya'. ⁵⁶“Tayay pa daan!” laung ni Esteban. “Pegita'en ku sug langit mipuka', muka' kig Bata' nu Kilawan pegindeg dia dapit lintu nu Megbebaya'!”

⁵⁷Mendadi ki nga gukum kini, mimeksay ilan tanan dunut tinimpeng nilani telinga nilan. Pigbatak nilan dayun si Esteban, ⁵⁸dindel nilan dayun ditug liu nug lunsud nilan. Dayun betuay si Esteban nu nga tuminakesi' kia dig balus. Su nga migbatu dun, binilin nilani nga suub nilan di gedapan nu sala tawan begutaw, ngalanen si Saulo. ⁵⁹Pinemalan

nilan dayun betuay si Esteban kini. Si Esteban, minenabi, laungen, “Uu Kaunutan Isus, dawat mu su gimuudu!”⁶⁰ Minginlulud dayun si Esteban muka' minekeg menenabi, laungen, “Uu Kaunutan Megbebaya! Sa' mesu'at, ndi' mu pemilangayi sala' nilan kini!” Mideksu' telu'ay, migetus nai ginaa ni Esteban.

8

¹Naa si Saulo kia, sinangu'en su kepatay dini Esteban kia.

Mikpeleget si Saulo tu Pikumpungan nu Sakup ni Isus

Naa mendadi su gendaw kia, pikpuunan gupia peglegetay su pikumpungan nu nga mikpetuud dini Isus dia Jerusalem. Ki nga piglegetan kia, mipelak ilan dayun di tibuuk Judea muka' Samaria, iin laaki mibilin dinilan dia Jerusalem su nga sepulu' bu' dua' tawan peneligan ni Isus.² Naa duuni nga getaw mikpetuud gupia tu Megbebaya', miglebeng ilan tug bangkay ni Esteban, lilekan nilan gupia iin.

³Mendadi si Saulo kia, piglegetanen pati' su pikumpungan nu sakup ni Isus. Minamal suled di ngag bilayan, pimintengen su nga mikpetuud libun laki, dayunen uitay dia pirisuan.

Pingukit tu Samaria su Gempia Petenday

⁴Laak su nga mipelak kiin, pia adin ilan mekangay, minamal ilan megukit di Gempia Petenday.⁵ Si Felipe kiin, minangay dig lunsud sakup Samaria, pigukiten tu nga getaw ditu pu' si Isus su Tindu' nu Megbebaya' Meglekaunutan.⁶ Bena' midengeg nu melaun getaw su ginukit ni Felipe muka' minita' nilan su mekesalebu' pinggulaulanen, piktalentenan nilan gupia su talu'en.⁷ Melaun menenulay pingutidan ditu getaw piglegetan nilan, menekeg mektegas su menenulay selian nilan mautid. Melaun dadema getaw miuli'an minatay seputul lawasen, sampay ngag duma mipilung.⁸ Sa' ma'nia, liliag gupia su nga getaw Samaria kia.

⁹Naa diag lunsud kia duuni getaw mensaled, ngalanen si Simon. Kini si Simon, miniben na mesebu'ay su nga getaw Samaria ditu penggulaulanen. Inangkenen metaasi tindegen.¹⁰ Nda'ig datu' nda'i pusuk, migela' mektalente diniin su nga getaw dia. Laung nilan, “Su ginuung nu getaw kiin, ginuung nu Megbebaya'. Su gelalen, ‘Su Mekesalebu' Ginuung.’”

¹¹Tinalentenan gupia nu nga getaw si Simon, pu' miniben nailan mesebu'ay tu nga kenaleden.¹² Laak dagid bena' mikpetuud ilan ditu Gempia Petenday ginukit ni Felipe mekatag di Keglekaunutan nu Megbebaya' dakus mekatag dini Isukristu, suminakup ilan dayun tu Megbebaya', binunagan ilan dayun tubig, libun laki.¹³ Sampay si Simon kini, mikpetuud na pagid. Tubus bunagay tubig si Simon, migduma dini Felipe. Sa' minita'en su nga mekesalebu' mipenggulaula muka' tu'us, misebu'an dun gupia si Simon.

¹⁴Naa su nga peneligan ni Isus ditu Jerusalem, bena' midengeg nilan pu' dinawat na nu getaw Samaria su Gempia Petenday nu Megbebaya',

sinugu' nilan si Pedro muka' si Juan meditu Samaria. ¹⁵Bena' minateng ditu si Pedro muka' si Juan, pinenebian nilan su nga mikpetuud dini Isus dia, adun pengepu'an ilan nug Balakat nu Megbebaya'. ¹⁶Pu' nda' pa lusad di nga getaw kia sug Balakat nug Megbebaya', binunagan ilan laak tubig, tu'us di kesakup nilan dini Isus. ¹⁷Mendadi bena' pindepenan ni Pedro muka' ni Juan su nga getaw Samaria kia, pingepu'an ilan dayun tu'u nuug Balakat nu Megbebaya'.

¹⁸Naa kia si Simon, bena' minita'en pu' sa' depenan nu nga peneligan ni Isus su nga mikpetuud, pengepu'an ilan dayun nug Balakat nu Megbebaya', miktulun sia si Simon kwarta dini nga Pedro. ¹⁹Kali' pektalu' dinilan, "Sa' mesu'at, begayay niau di ginuung niu kiin, adun sa' duuni getaw depenan ku, pengepu'an ilan dadema nug Balakat nu Megbebaya'."

²⁰"Baa, ukuman ka nu Megbebaya'," simbag ni Pedro, "ya'a muka' su kwarta mu kiin! Masi' delendeman mu, kig begay nu Megbebaya', megdadi seluyay? ²¹Nda'ig labet mu dun su penggulaulaan nami. Pu' kig delendeman mu kiin, ndi' pia di pegita'en nu Megbebaya'. ²²Pegbiksu'ay mui melaat delendeman mu kiin. Penenebiay mu sa' megdadi, pedesunen ka nu Megbebaya' dig delendeman mu melaaten. ²³Pu' misuunan ku migbaya' gupia dig delendeman mu su kengimbegu mu, mibaluda nu sala' mu."

²⁴Laung dayun ni Simon dini Pedro muka' dini Juan, "Kelelaat penenebiay niau tu Kaunutan Megbebaya', ndi' na mpenggulaula ki kelaun tinalu' niu kia."

²⁵Tubus itu, tuminakesi' si Pedro muka' si Juan ditu nga getaw, muka' migukit ilan di talu' nu Kaunutan si Isus. Bena' mitubus, minuli' ilan ditu Jerusalem. Selian nilan dig dalan pegangay dia Samaria, inukit da nilan dema su Gempia Petenday dia melaun lunsud mibianan nilan.

Si Felipe muka' su Trisuriru Getaw Etiopia

²⁶Naa mendadi si Felipe kiin, duuni sesugu'en nu Megbebaya' getaw langit suminugu' diniin, laungen, "Pengikpesa, angaya dia dapit gilidan gendaw, dia karsada pegangay ditu Gasa genat dini Jerusalem." (Ki karsada kia, mikebian di meliwag limawa'.) ²⁷Sa' ma'nia, bena' mideksu' mektalu' su getaw langit, migbuat si Felipe, mipanaw tu'u. Naa duuni getaw Etiopia, metaas pegwekilan ni Candace, sug libun meguit tu getaw Etiopia, trisurirunen. Ki trisuriru kini, miditu Jerusalem mektamuy tu Megbebaya'. ²⁸Mendadi sa' minuli' pelum ditug Etiopia, suminakay prada, dunut pegbasa libru, su Misulat Talu' nu Megbebaya' pisulaten dengantu tu pimunaanen si Isaias. ²⁹Mendadi selian nu trisuriru megbasa dun, kini pelum si Felipe, tilu'an nug Balakat nu Megbebaya', laungen, "Pekpesempela di prada kia, tenduga dun." ³⁰Pingeted dayun ni Felipe

su prada, muka' midengegeni getaw kia, pegbesaanen su sinulat kia nu pimuunan nu Megbebaya' si Isaias. Sinaakan dayun ni Felipe su trisuriru, laungen, “Mesabut mu dai pigbasa mu kiin?”

³¹Kali' sembag ki getaw Etiopia kia, “Kenduta'i kesabutu dun, subay duuni megluas dun dinaan?” Inggaten dayun si Felipe menaik megingkud dia gupiden. ³²Iinig binasanen ditu Misulat Talu' nu Megbebaya', laung,

“Ki getaw kini, sug betaden, ma'niin betad karniru egaken tu pektiti'an dun,

ma'niin dema betad nati karniru, ndi' megenga' sa' untingan.

Pu' selian piglegetan, nda'iduni talu'en.

³³Pipiidiidan iin, kana' bantang su ginukuman diniin.

Nda'i mekengasal dunig liwatan,

pu' pipeleki gumulen.”

³⁴Laung nu getaw Etiopia dini Felipe, “Naa sa' megdadi, ki sinulat kini, pesuun mu dinaan sa' ta' taway duni misugat ini nu pimuunan nu Megbebaya'. Iinen da su suminulat dun, atawaka lain tawan saan?”

³⁵Mendadi si Felipe, pikpuunanen pegweliay su sinulat kia, dayunen pegukit dia trisuriru su Gempia Petenday mekatag dini Isus. ³⁶Naa muka' kebaal nilan mundas dia karsada, midepet nailan di tubig. Miktalu' su trisuriru, “Naa, tayay pa daan, duuni tubig. Mabu' megdadi, bunaganu tubig.”

³⁷[Kali' sembag si Felipe, “Megdadi da bunagan ka dun, sa' gela'en mui ginaa mu di keketuud mu.”

Kali' sembag, “Aa, naa, mikpetuudu lai. Mituudanu dun pu' si Isukristu, iinig Bata' nu Megbebaya'.”]

³⁸Pitenlen dayun nu trisuriru su prada. Minaug ilan dua', dayun minlusad ilan tu tubig. Binunagan dayun ni Felipe su trisuriru. ³⁹Bena' guminawen ilan dia tubig, inabay dayun si Felipe nug Balakat nu Megbebaya' megawa' dia. Nda' na maita' nu trisuriru. Minundas nain, mipati' na leliagay.

⁴⁰Naa si Felipe, dia na mitanda' lunsud Asoto. Genat diag Asoto, minundas tu Cesarea. Adin su ngag linunsudan gembiananen, pengukiten ni Felipe dia su Gempia Petenday.

Su Kesakup ni Saulo dini Isus (Pinggulaula 22:6-16; 26:12-18)

9 ¹Laak si Saulo kiin, penemalanen sida'ay su nga sakup nu Kaunutan si Isus, pemetainen ilan sia. ²Sa' ma'nia, miditu si Saulo Tampusan Metaas Belian nu getaw Judea, minengi diniin sulat uitenen tu nga kaunutan di nga simbaan nu getaw Judea tug lunsud Damasco, adun sa' duuni maita'en dia, sakup nug Bianan nu Kaunutan si Isus, daapenen sia libun laki, penguitenen dayun puli' ditu Jerusalem.

³Naa mendadi kini si Saulo, sa' sungu na mesebang diag lunsud Damasco kia, masi' mitiagan tekaw tiag genat tug langit. ⁴Mibelilid diag lupa' si Saulo, muka' duuni midengegen talu', laungen, "Saulo! Mauma dema peglegetan mau?"

⁵"Sir, ta' taway dun ka?" sinaak ni Saulo.

Kali' sembag su pektalu' kia, "Naa la'a si Isus, su peglegetan mu. ⁶Naa pegbuata, bundasa diag lunsud kia. Sa' mateng ka, telu'an ka dayun ta' alanduni gempia baalen mu."

⁷Naa su nga tendug ni Saulo, tuminlen ilan, nda' ilan pektalu'talu', pu' midengeg nilan ki tingeg kia, laak nda'i minita' nilan. ⁸Migbuat si Saulo, laak bena' mingmata, masi' ndi' mekengita'. Kaas inulipit laak nu ngag dumanen mundas diag Damasco. ⁹Telu gebii ndi' mekengita', nda' na aan muka' nda' na inum.

¹⁰Naa duuni sakup ni Isus diag Damasco, ngalanen si Ananias. Mendadi kini si Ananias, mikpaita' gupia diniin su Kaunutan si Isus.

"Ananias! sinabi ni Isus."

"Uu Kaunutan, keni dau," laung ni Ananias.

¹¹Kali' pektalu' si Isus diniin, "Pegbuata, angaya ditu karsada piningalan dun Su Melegdeng Karsada. Laaway mu dayun diag balay ni Judasi sala tawan getaw Tarso, ngalanen si Saulo. Pu' iin, menenabi, ¹²muka' duuni pinita' diniin nu Megbebaya' getaw sumiled dia suguden, ngalanen si Ananias, megdepen diniin adun mekengita' puli'."

¹³Dagid kali' sembag si Ananias, "Uu Kaunutan, melaun migukit dinaan mekatag dini Saulo kiin, pilaatanen daw gupia su piglegetawan mu ditu Jerusalem. ¹⁴Muka' bigayan daw nu nga kaunutan nug belian pegbaya'en, daapenen sug launan mekpaingabang dini'a."

¹⁵Dagid sumimbag su Kaunutan si Isus, "Panawa dema tu' tu niin, pu' si Saulo kia, pimili'u mbaal sesugu'en ku megukit mekatag dinaan tu nga kana' getaw Judea, tu nga gadi', sampay tu nga getaw Israel dadema. ¹⁶Muka' pagid paita'u pa diniin ki kelegenay mbiananen meksekat di kesakupen dinaan."

¹⁷Sa' ma'nia, mipanaw dayun si Ananias. Bena' minateng muka' sumiled diag balay kia, dipenanen dayun si Saulo. Miktalu' diniin si Ananias, "Uu Mimated Saulo, sinugu'u nu Kaunutan si Isus, su mitua' dini'a dia karsada su kepanaw mu dini. Naa, iini sinugu'u niin medini ni'a, adun mekengita'a puli', dakus pengepu'an ka nug Balakat nu Megbebaya'." ¹⁸Mitekaw dayun mawa' ki mama' gunap seda' mitabun dia mata ni Saulo, mikengita' puli'. Suminambut megbuat, mikpebunag dayun tubig. ¹⁹Tubus itu minaan si Saulo, dayun mipuli' su sekegen.

Mingukit si Saulo tug Damasco

Mendadi genat itu migbebenwa si Saulo santa' gebii dia nga sakup ni Isus diag Damasco. ²⁰Miditu dayun nga simbaan nu getaw Judea, pingukiten dia pu' si Isus, iin sug Bata' nu Megbebaya'.

²¹Naa sug launan mikedengeg di talu' ni Saulo, misebu'an ilan gupia, laung nilan, “Kana' bain nu migleget gupia tu nga mekpaingabang dini Isus ditu Jerusalem? Muka' kana' baini midini dun, pu' adun daapenen siai nga mikpetuud dini Isus, adun uitenen ditu gedapan nu nga kaunutan nug belian ta ditu Jerusalem?”

²²Dagid migdugang laaki ginuung ni Saulo megukit, kaas ndi' maulakan nu nga getaw Judea megbenwa diag Damasco. Pinepet dinilan ni Saulo pu' si Isus, iin su Tindu' nu Megbebaya' Meglekaunutan.

²³Mendadi bena' santa' gebii, ki nga getaw Judea kini, mikpasad ilan petain nilan si Saulo. ²⁴Dagid duuni getaw mikpesuun dun dini Saulo. Naa gebii gendaw, pegingaten nu getaw Judea su nga genga'an nug lunsud Damasco, adun epa'en nilan sia petayay si Saulo. ²⁵Laak dagid duuni gebii, kali' pegleketau su nga sakup ni Saulo, iwit nilan iin tu gembagel dending nug lunsud kia, inisen nilan dig bukap, dayun nilan tentunay diag liu si Saulo.

Ditu Jerusalem si Saulo

²⁶Mendadi, minuli' na pelum ditu Jerusalem si Saulo, minampu' dayun sia dia nga sakup ni Isus. Dagid mendek ilan diniin, pu' nda' ilan metuuday dun pu' suminakup nain dini Isus. ²⁷Dagid si Bernabe, suminugut dini Saulo. Iwit ni Bernabe si Saulo ditu nga peneligan ni Isus, inukiten dinilan su kekita' ni Saulo ditu Kaunutan dia karsada, su kangayen kiin ditug Damasco. Inukit pagid ni Bernabe dinilan su kekabit nu Kaunutan diniin, sampay su kenibelu' ni Saulo mengukit mekatag dini Isus ditug Damasco. ²⁸Sa' ma'nia, migduma si Saulo dia nga peneligan ni Isus dia Jerusalem. Minibelu' gupia si Saulo megukit mekatag di Kaunutan. ²⁹Dagid sa' miglantugi' si Saulo di nga getaw Judea mektalu' pikebitan nu getaw Grecia, ilan kini, petain nilan sia si Saulo. ³⁰Bena' misuunan nu kepetedan sug delendeman nu getaw Judea kia, iwit nilan si Saulo tu Cesarea, dayun pibundas nilan peleguyay tu Tarso.

³¹Ma'antu, su tibuuk pikumpungan nu nga sakup ni Isus, nda' nai megleget dun dig liwagan Judea, Galilea, muka' Samaria. Kagina pinguliksegan ilan nug Balakat nu Megbebaya', migisegi sinuunan nilan di kekpetuud, minimal ilan megbasa tu Megbebaya' muka' migdugang ilan.

Minangay tug Lida muka' Jope si Pedro

³²Naa si Pedro, saba'en mengepitan tu nga sakup ni Isus di ngag lunsud, minateng diag Lida, mingumbelayan tu piglegetawan nu Megbebaya' dia. ³³Mendadi duuni mipekita'en getaw dia, ngalanen si Eneas, mipilung, walu taun nda' siben pekegbuat diag belilidanen. ³⁴Kali' pektalu' si Pedro diniin, “Naa Eneas, pauli'an ka ni Isukristu. Pegbuata,

pengikpesay muig belilidan mu kiin.” Dayun pegbuat si Eneas. ³⁵Naa su ngag launan getaw pegbenwa diag Lida muka' di Saron, bena' minita' nilan si Eneas mikepanaw na, miagak ilan dayun sumakup tu Kaunutan si Isus.

³⁶Naa duunig libun ditug lunsud Jope mikpetuud dini Isus, ngalanen si Tabita. (Di pikebitan nu getaw Grecia, si Dorcas, ma'ananen gusa.) Kini si Tabita, pinemalanen pepianay su nga getaw, pegebanganen su nga pubri. ³⁷Mendadi mitaang dun, migladu si Tabita, dayun minatay. Bena' mitubus nu ngag dumanen ugasay, bitang nilan sug bangkayen di sugud diag ditaas. ³⁸Naa sug lunsud Jope kia, mesempel diag Lida. Mendadi bena' midengeg nu nga sakup dia Jope pu' diag Lida si Pedro, suminugu' ilan dua' tawan, pimuun nilan dini Pedro, “Kelelaat pediniin ka nami deli!” ³⁹Sa' ma'nia, mingikpes si Pedro, migdunut tu'u dinilan. Bena' minateng dia Jope, pibundas si Pedro dia sugud diag ditaas. Mikipungun dayun dini Pedro su kelaun balulibun. Pekelegenan ilan gupia, pinita' nilan pagid dini Pedro su nga suub muka' duma penepeten pimenai' ni Tabita su tetubu' pa.

⁴⁰Mendadi, piawa' ni Pedro dia sugud sug launan getaw. Minginlulud dayun si Pedro menenabi. Bena' mitubus menenabi, liningay ni Pedro kig bangkay kia, kali' peksabi, “Tabita, pegbuata!” Mingmata si Tabita. Minita'en si Pedro, dayun migbuat. ⁴¹Inulagak ni Pedro megingdeg. Dayun sebiay ni Pedro su nga kelaun mikpetuud kampu' nu ngag balulibun, pigwakilen dayun dinilan si Tabita, mitubu' na puli'. ⁴²Mileep dayun diag lunsud Jope su gukiten dun. Melaun dayun mikpetuud tu Kaunutan si Isus. ⁴³Si Pedro, migbebenwa pa santa' gebii dia Jope diag balay ni Simon, getaw menina' panit.

Si Pedro muka' si Cornelio

10 ¹Naa duuni getaw tu Cesarea, ngalanen si Cornelio, kaunutan nu pikumpungan sundalu nu getaw Roma piningalan dun “Su Pikumpungan nu Getaw Italia.” ²Kini si Cornelio, mikpetuud gupia tu Megbebaya'. Pia kana' getaw Judea, migbasa tu Megbebaya', sampay su nga gapenen. Tatapen pemegayay su nga getaw Judea, muka' menamal menenabi tu Megbebaya'. ³Mendadi duuni gendaw, ginenga' menaungi gendaw, duuni sesugu'en nu Megbebaya' getaw langit pinita' masi' nu Megbebaya' dini Cornelio, mitua' dia suguden. Kali' peksabi su getaw langit, “Cornelio!”

⁴Si Cornelio, tintengen su getaw langit, saba' mindek gupia. Sinaaken diniin, “Sir, ta'i tuyu' mu sia dinaan?”

Kali' sembag su getaw langit, “Su kenenabi mu muka' sug betad mu memegay, tilima' nu Megbebaya', midelendema niin. ⁵Mendadi, sugu' mui sesugu'en mu meditu Jope, adun uiten nilan puli' dinii sala tawan

getaw, si Simon, sala ngalanen si Pedro. ⁶Iin, migbebenwa diag balay nu sala Simon, getaw menina' panit, dia geksid dagat sug balayen."

⁷Naa sa' ma'nia, bena' migawa' dia su getaw langit, miksabi si Cornelio dua' tawan sesugu'enen dakus sala tawani sundalu megilak diniin. Su sundalu, migbasa dadema tu Megbebaya'. ⁸Naa bena' inukitan ilan ni Cornelio di mipenggulaula kia, sinugu'en ilan tu'u mangay ditu Jope.

⁹Mendadi bena' di sala gendaw, saanan dia pailan dalan su nga sinugu' kia muka' mesempel nailan tug lunsud Jope, kini si Pedro, minaik tu gatep menenabi, miktui gendaw. ¹⁰Naa muka' migutem na, mauya'anen sia maan. Laak selianen pa megelat gilak, pinita' masi' nu Megbebaya' diniin ma'niin ¹¹mipuka' sug langit, duun dayuni mitentun dia gupiden ma'niin palas gembagel gumut mikitetan di paat buuk sunguten. ¹²Bitang dia su kelaun gininisan metetubu', sampay mamak muka' manukmanuk. ¹³Duun dayuni midengeg ni Pedro talu', laungen, "Naa, Pedro, pegbuata, titi' mu ki seda'an mu, aan ka dayun!"

¹⁴Dagid kali' sembag si Pedro, "Pelai, uu Kaunutan! Nda'u mainsan aan dun, su melemu'an ami dun sampay su ndi' nami ma'aan nga getaw Judea."

¹⁵Midengeg pa puli' ni Pedro su talu', laungen, "Adin su tinalu' nu Megbebaya' mpia aanen, ndi' mu telu'ay ndi' mu ma'aan." ¹⁶Mendadi ki mipenggulaula kia, telu deksu' pa pauli'ay, dekag pa mibatun na puli' diag langit su gumut.

¹⁷Mendadi selian ni Pedro melibuleng di gulugan nu pinita' diniin kia, mibaangan na nu nga sinugu' ni Cornelio kia sug balay ni Simon, pegindeg nailan dia genga'anen. ¹⁸Miksabi ilan dayun, sinaak nilan, "Diin ma pegbebenwa si Simon, sala ngalanen si Pedro?"

¹⁹Naa segay ni Pedro megulug sia di pinita' diniin kia, tilu'an masi' iin nug Balakat nu Megbebaya', laungen, "Pekineega! Duuni telu tawan getaw minateng, pekpenengaun ka nilan. ²⁰Pegbuata, penauga. Ndi'a pegalalang megdunut dinilan, pu' naani suminugu' dinilan." ²¹Sa' ma'nia, minaug dayun si Pedro, laungen ditu telu tawan kia, "Mabu' naani pekpenengaun niu. Ta' mai tuyu' niu dinaan?"

²²Kali' ilan sembag, "Sinugu' ami nu kaunutan nami si Cornelio. Si Cornelio kiin, mekesuun getaw. Pigbesaanen su Megbebaya', muka' inal dain dema nu kelaun getaw Judea. Naa, duuni sesugu'en nu Megbebaya' getaw langit miktalu' diniin pu' inggaten ka nami meditug balayen, pu' adun medengegen ki gukiten mu." ²³Sa' ma'nia, piseled ilan ni Pedro, adun mektulug pailan dia gebii kia.

Naa bena' miglegendaw, mingikpes si Pedro, tumindung dayun dinilan mpanaw. Duun dademai nga getaw Jope migdunut dinilan, nga kepetedan nilan. Naa si Cornelio kia, saananen mekpedateng dinilan, inggateni ngag beta'anen muka' nga sambaten mekpongung diag balayen.

24 Bena' puli' gendaw, minateng si nga Pedro dia Cesarea. 25 Bena' sungu metulan diag balay si Pedro, sinungkak dayun ni Cornelio, miglaub si Cornelio dia gedapanen, luminu'ud dayun diniin. 26 Laak dagid inulagak ni Pedro, laungen diniin, “Pegindega, pu' sama kilawan mau da laak.” 27 Selian nilan megabitabit, minundas si Pedro dia seled, minita'en su melaun getaw mipungun dia. 28 Kali' pektalu' si Pedro dinilan, “Mendadi yamu nu nga getaw, suunan niu pu' binandu diag betad dinami nu nga getaw Judea, lumamug tu getaw dig lain bansa atawaka mengumbelayan dun. Dagid pisuun na dinaan nu Megbebaya', subay nda'i getaw pemilangen ku milemu'an atawaka kana' penemba'en nu Megbebaya'.^h 29 Kaas sa' piangayu ni Cornelio, nda'u belibaday. Naa mendadi, uu Cornelio, sa' ma'antu, ta' mai tuyu' mu dinaan?”

30 Kali' sembag si Cornelio, “Naa, paat gebii na nandaw genat kenenabi diag balayu, ginenga' menaugi gendaw. Mendadi saanan ku menenabi, mitekaw duuni getaw mitua' di gedapan ku, tumiagi penepetenen, 31 miktalu' dinaan, ‘Cornelio! Tilima' nu Megbebaya' su kenenabi mu, muka' pingebeten su kepepia mu tu nga getaw. 32 Naa sa' ma'antu, sugu' mui getaw mangay ditu Jope, ditu ni Simon sala ngalanen si Pedro. Migbebenwa diag balay nu sala Simon, getaw menina' panit dia geksid dagat.’ 33 Kaas iini miksabiu dun dini'a ganam,” maa' laung pa ni Cornelio. “Naa milelaata dinaan, pu' minangaya dini. Mendadi, dini nami gedapan nu Megbebaya', ki tibuuk pikpungunan nami, adun kineegan nami su gikteb nu pitalu' nu Megbebaya' dini'a.”

Su Pigwali ni Pedro

34 Mendadi, kali' pektalu' si Pedro, “Aa naa, minget misuunan ku na, nda'ig lingken petailen nu Megbebaya'. 35 Adin su megbasa diniin muka' menggulaula melengas, pia ta' bensaay dun, duaten iin nu Megbebaya'. 36 Mendadi, misuunan niu ki tinalu' nu Megbebaya' dinami nga getaw Israel, ki Gempia Petenday, ki kepeseksud di getaw tu Megbebaya' pebian dini Isukristu, su Kaunutan nu tiba'an getaw. 37 Suunan niu pu' degak miktitulu' si Juan mekatag di kekpebunag tubig, duuni mekesalebu' mipenggulaula diag liwagan Galilea sampay Judea. 38 Midengeg niu si Isus getaw Nazaret, sug bigayan nu Megbebaya' Balakaten muka' ginuungen. Kini si Isus, lineepen su tibuuk benwa Judea, pipiananen su nga getaw muka' pineguli'anen su nga pilegetan nu Palin, pu' ibangan iin nu Megbebaya'.”

39 Laung padun ni Pedro, “Mendadi, sug launan pinggulaula ni Isus dia Judea muka' ditu Jerusalem, yamii miketakesi' dun. Dagid kini si Isus,

^h 10:28 Iini gulugan nu pinita' kiin nu Megbebaya' dini Pedro, su ma'niin palas gumut bitangan gininisan metetubu', lumbus mesu'at aanenen.

pinatay nu nga getaw Judea, linansang nilan di kurus. ⁴⁰Bena' di ketelu endawen, pitubu' puli' iin, pitubu' nu Megbebaya', muka' pinita' pa pagid nu Megbebaya' di getaw. ⁴¹Nda'en paita' di tiba'an getaw, pinita'en laak di ngag daansama' mipemili'en, sa'itada dinami nu nga miksalu dema diniin maan muka' minum, su ketubu'en puli'. ⁴²Yami demai sinugu'en megukit dun ki Gempia Petenday tu nga getaw dakus megukit dun pu' iini tindu' nu Megbebaya' mengukum ditu tiba'an getaw tetubu' sa' minatay. ⁴³Iin dademai tinakesi'an nu kelaun pimuunan nu Megbebaya' dengantu, sinulat nilan ditu Misulat Talu'en pu' adin su mekpetuud dini Isus, pedesunen nu Megbebaya' su sala'en, saba' nu pegbaya' ni Isus."

Pingepu'an nug Balakat nu Megbebaya' su nga Kana' Getaw Judea

⁴⁴Mendadi selian ni Pedro megukit, mitekaw pengepu'ay nug Balakat nu Megbebaya' ki kelaunan mikineeg di pitendayen kia. ⁴⁵Su nga getaw Judea mikpetuud dini Isus tumindug dini Pedro genat ditu Jope, misebu'an ilan dun dayun, kagina ki kana' getaw Judea, bigay dadema nu Megbebaya' dinilan pingepu'an ilan nug Balakaten. ⁴⁶Pu' midengeg nilan su nga kana' getaw Judea kia, mipalin su pikebitan nilan, dakus inal nilan su Megbebaya'. Kali' pektalu' si Pedro, ⁴⁷"Naa ki nga getaw kini, pingepu'an nailan nug Balakat nu Megbebaya', maa' dadema gupia dinita. Mendadi kagina ma'antu, duun bai mekebelibad dun, bunagan nailan tubig?" ⁴⁸Sa' ma'nia, suminugu' dayun si Pedro, bunagan ilan tubig tu'us di kesakup nilan dini Isukristu. Tubus itu, ginuut ni nga Cornelio si Pedro, ndi' pa deli' muli' di nga santa' gebii.

Su Ginukit ni Pedro mekatag di Kesakup nu nga Kana' Getaw Judea

11 ¹Naa midengeg nu nga peneligan ni Isus muka' nu ngag дума mimated ditu Judea pu' ki nga kana' getaw Judea, mitelima' nilan dadema su talu' nu Megbebaya'. ²Mendadi bena' midengeg nilan, sug дума sakup, telu'en nilan dayun pu' ki nga kana' getaw Judea kia suminakup na, subay sirkunsisuun dailan dema. Sa' ma'antu, ilan kini, bena' minateng puli' si Pedro ditu Jerusalem, pigbensi nilan si Pedro, laung nilan diniin, ³"Mauma dema mingumbelayan ka ma ditu nga kana' getaw Judea, su nda' mesirkunsisu? Mauma dema dumingan ka padun maan dinilan?" ⁴Sa' ma'nia, gila' dayun ni Pedro pegukit dinilan su kelaun mipenggulaula genat tu pikpuunanen.

⁵Kali' pektalu' si Pedro, "Mendadi, su ditu pau lunsud Jope, minenabiu, mitekaw duun masi'i pinita' nu Megbebaya' dinaan. Minita'u duuni mitentun genat tug langit ma'niin palas gumut mikitetan di paat buuk sunguten, mitena' dia gedapan ku. ⁶Sa' pigipusu diag dialem, minita'u ki nga gininisan metetubu' medengen sa' malig, nga mamak sampay manukmanuk. ⁷Midengegu dayuni talu', laungen, 'Naa, Pedro, pegbuata,

titi' mu ki seda'an mu, aan ka dayun!' ⁸Dagid simbagu, 'Plai, uu Kaunutan! Nda'u mainsan aan dun, su melemu'an ami dun sampay su ndi' nami ma'aan nga getaw Judea.'

⁹"Midengegu pa puli' su miktalu'," maa' laung padun ni Pedro. "Laung nu miktalu', 'Adin su tinalu' nu Megbebaya' ma'aan, ndi' mu telu'ay ndi' mu ma'aan.'" ¹⁰Mendadi ki mipenggulaula kia, telu deksu' pa pauli'ay, dekag pa mibatun na puli' ditug langit sug launanen kia. ¹¹Mendadi su kebatun dun puli' tug langit, iin dademai kedateng nu telu tawan diag balay pektulugan ku. Sinugu' ilan nu sala tawan kaunutan sundalu dia Cesarea, meditu ilan naan. ¹²Muka' tilu'anug Balakat nu Megbebaya', ndi'u mekalangalang megdunut dinilan. Sa' ma'antu, tumindug dadema dinaan meditu Cesarea'i nga genem tawan kepetedan ta kini, miditu ami balay nu getaw suminugu' dinilan, si Cornelio. ¹³Bena' minateng ami ditu, tinalu' ni Cornelio dinami pu' duun masi'i minita'en getaw langit pegindeg diag dialem balayen. Miktalu' daw diniin su getaw langit, 'Sugu' mui getaw mangay ditu Jope, ditu ni Simon sala ngalanen si Pedro. ¹⁴Iin nai mekpetenday dini'a dig bian nu kegawen mu, kampu' nu kelaun gapen mu.'" ¹⁵Laung pa ni Pedro, "Naa mendadi, bena' mikpuunu mekpetenday dinilan, ilan kiin, pingepu'an ilan dayun nug Balakat nu Megbebaya', maa' dadema gupia dinita sug diin kiin. ¹⁶Midelendemu dayun su tinalu' begudiin nu Kaunutan si Isus, laungen, 'Si Juan, migbunag laak tubig di nga getaw. Dagid yamu, bunagen diniu kig Balakat nu Megbebaya'.'" ¹⁷Naa mendadi gempantek," maa' laung padun ni Pedro, "ki nga kana' getaw Judea, pisama nu Megbebaya' sug bigayen dinilan ditug bigayen dinita sug diin kiin, su mikpetuud ita tu Kaunutan ta si Isukristu. Naa kagina ma'antu, naan, kana'u memaag ditu Megbebaya'!"

¹⁸Naa, su nga getaw migbensi dini Pedro kia, bena' midengeg nilan su tinalu'en kia, misikpa' ilan dayun mektalu'. Inal nilan su Megbebaya', laung nilan, "Mendadi sa' ma'antu, masi' ki nga kana' getaw Judea, bigay pagid nu Megbebaya' dinilan keksikesuun nilan muka' kepeduma nilan tu ketubu' nda'i tamanen!"

Su nga Suminakup dini Isus tug Lunsud Antioquia

¹⁹Naa genat tu kepatay kiin ni Esteban, pinemalan peglegetay su nga sakup ni Isus. Sa' ma'antu, mipelak ilan, duuni midepet tu Fenicia, duuni midepet tu pulu' Cipre, muka' duun dademai midepet tug Antioquia. Adin su midepetan nilan, migukit ilan talu' nu Megbebaya' dia, iin laaki inukitan nilan dun su nga getaw Judea. ²⁰Laak diag Antioquia, duuni nga ginukitan nilan dun kana' getaw Judea. Inukit dinilan nu nga sakup ni Isus genat ditu Cipre muka' ditu Cirene su Gempia Petenday mekatag di Kaunutan si Isus. ²¹Kagina bigayan nu Kaunutan Megbebaya' ginuung

su migukit dun, melaun gupia getaw mikpetuud muka' luminingay tu Megbebaya'.

²²Naa su pikumpungan nu nga sakup ni Isus ditu Jerusalem, sa' midengeg nilan pu' mikpetuud na su nga kana' getaw Judea, sinugu' nilan si Bernabe mangay ditug Antioquia. ²³Bena' minateng ditu si Bernabe muka' misima'en pu' tinulung tu'tu nu Megbebaya' su nga sakup ni Isus kana' getaw Judea, liliag dayun gupia si Bernabe. Tinitulu' ni Bernabe dinilan, launan nilan, gela'en nilani ginaa nilan tu kesalig nilan tu Kaunutan. ²⁴Pu' si Bernabe kia, mekesuun getaw, pingepu'an gupia nug Balakat nu Megbebaya', sampay suminalig gupia tu Megbebaya'. Sa' ma'nia, melaun getaw Antioquia miagak sumakup tu Kaunutan si Isus.

²⁵Mendadi si Bernabe, mipanaw ditu Tarso, penengaunen si Saulo kiin. ²⁶Bena' mibaanganen, iwiten puli' ditug Antioquia. Setaun ilan dayun mekpungun dia pikumpungan nu sakup ni Isus, minamal ilan mekpetu'un di nga melaun gupia getaw ditu. Muka' iini puunanen, piningalan dun nu nga getaw su nga sakup ni Isus, nga Kristianu.

²⁷Naa saanan nilan diag Antioquia, duuni nga pimuunan nu Megbebaya' minateng genat tu Jerusalem. ²⁸Mendadi sala tawan dinilan, ngalanen si Agabo, migindeg adun megyaga. Bigayan nug Balakat nu Megbebaya' ginuung, kaas pisuunen pedaan pu' duuni gendaw, mateng pai meliget gutem di tibuuk lumbang. (Kia, minuud di timpu ni Claudio su tampusan gadi' nu getaw Roma.) ²⁹Bena' midengeg nu nga sakup ni Isus diag Antioquia, delendeman nilan dayun, puitan nilan pemegay su nga kepetedan nilan ditu Judea, diadia begayen su gikteb mesukaten. ³⁰Sa' ma'antu, piwit nilan dayun su pemegay nilan tu nga kaunutan nu pikumpungan nu sakup ni Isus ditu Judea, iini migated dun si Bernabe muka' si Saulo.

Migdugang su Kekpeleget di nga Mikpetuud

12 ¹Naa mendadi su timpu kiin, duuni nga sakup ni Isus pilegetan ni Adi' Herodes. ²Pipatay ni Herodes su sala Santiago, pated ni Juan, piputukanen gulu. ³Naa su nga getaw Judea, pinleliag ilan ditu pinggulaula kia ni Herodes. Bena' midengeg ni Herodes pu' pinleliag ilan dun, pidaapen padun si Pedro. (Su kedaap diniin, mitaang dig lumpuk nu getaw Judea piningalan dun sug Lumpuk di Pan nda' Petulinay.) ⁴Mendadi kini si Pedro, bena' midaap, pinikutan dayun, pi'ingat di paat penunan sundalu. Sala penunan, duuni pikpaat tawan. Sug delendeman ni Herodes, ukumenen sia si Pedro ditu gedapan nug launan getaw sa' meglingswang pa sug Lumpuk tug Linius. ⁵Sa' ma'nia, pegingaten pa si Pedro diag dialem pirisuan, laak su pikumpungan nu nga sakup ni Isus, pinenebian nilan namal ditu Megbebaya' si Pedro.

Su Kebeluy ni Pedro tu Pirisuan

⁶Naa bena' gebii, sa'itada sendaw pa su kepegua' ni Herodes dini Pedro dia pirisuan adun ukumenen, kini si Pedro, pektulug, piktimpangan

ingatay dua' tawan sundalu. Binalud si Pedro kadina dua' buuk, muka' duun pa pagidi sundalu pegingat dia genga'an nu pirisuan. ⁷Mendadi, tekaw duuni mitua' dini Pedro sesugu'en nu Kaunutan Megbebaya' getaw langit, muka' midelagan su sugud. Dinapi' dayun nu getaw langit si Pedro adun metanud, laungen, “Pegdedali'a pegbuat!” Mitekaw dayun melenga' su ngag balud dia kemet ni Pedro. ⁸Laung dayun nu getaw langit, “Pegbaling ka muka' penepatusa.” Mikpetuud dun dayun si Pedro. Laung nu getaw langit, “Peksuuba, dunuta dayun dinaan!” ⁹Migdunut tu'u si Pedro diag liu nu pirisuan. Laak nda'en mesuunay sa' mipenggulaula tantu, laungen dun teginepen da laak. ¹⁰Mendadi bena' mibianan nilan sug bekna megingat, dayun su kedua' megingat, minateng ilan dayun tu genga'an putaw bianan pangay diag lunsud. Masi' miksipala laak mpuka' su genga'an. Mikegua' ilan dayun. Bena' mipapas nilan ki sebulus karsada, luminilung dayun su getaw langit.

¹¹Iin pa mitenudan ni Pedro, laungen dig dialem delendemanen, “Aa naa, misuunan ku na pu' metuud! Sinugu' tu'u nu Kaunutan Megbebaya' su sesugu'enen getaw langit gumawen dinaan di gengkeman ni Herodes, sampay di kelaun pedetengen nu nga getaw Judea mpenggulaula sia dinaan.”

¹²Naa bena' misima' ni Pedro su mipenggulaula, miditug balay ni Maria, su gina' ni Juan sala ngalanen si Marcos. Melaun getaw mipungun diag balay kia pu' menenabi. ¹³Mendadi, bena' minateng si Pedro muka' mikpetelubatik diag liu nu genga'an, duun dayuni sesugu'en lumiu dia, delaga ngalanen si Roda, pu' puka'anen. ¹⁴Mi'ilala ni Roda su tingeg ni Pedro, kaas sumiled dayun puli', inukiten dia nga minenabi pu' pegindeg diag liu si Pedro. Laak saba' leliagen, nda'en na puka'ay su genga'an. ¹⁵“Baa, bu'angbu'ang ka!” laung nilan. Laak miglegintuud sug delaga kia. Simbag nilan, “Ini mikpetelubatik su la getaw langit megingat dini Pedro.”

¹⁶Mendadi kini si Pedro, laak menamal mekpetelubatik. Tiga'wan, pinuka'an na nu nga sakup su genga'an, mi'ilala nilan dayun si Pedro. Mipati' ilan mesebu'ay diniin. ¹⁷Sa' ma'nia, pipengamed ilan ni Pedro, inukiten dayun dinilan su kebeluy diniin nu Kaunutan Megbebaya' dia pirisuan. Diksu' ni Pedro su talu'en, “Ukitay niu di kebeluy si Santiago kampu' nu ngag duma kepetedan ta.” Bena' mideksu' mektalu' si Pedro, gumiwa' dia, minangay tug lain benwa.

¹⁸Mendadi su nga sundalu ditu pirisuan, bena' miglegendaw, misasaw ilan gupia sa' mikenduta' dun saan si Pedro. ¹⁹Si Herodes kia, nda' nai nda'en maulikaw, saba'en menengaw dini Pedro. Bena' ndi'en mbaangay, pinsakaanen su nga misingat dini Pedro, dayunen ilan pepatay.

Tubus itu, migawa' si Herodes dia Judea, miditu pelum Cesarea pegbebenwa.

Su Kapatay ni Herodes

²⁰Naa kini si Herodes, melaat gupiai ginaanen tu getaw Tiro muka' tu getaw Sidon. Sa' ma'nia, duuni gendaw mikipungun su nga getaw kia, minadap ilan dini Herodes, miksaak ilan diniin kelinaw. Laak mikpaingabang ilan peguna dini Blasto, su pigwekilan ni Herodes. Bena' mituudan dinilan si Blasto, iin pa miksaak ilan dayun tu'u dini Herodes kelinaw, pu' su ketubu'an nilan, genat di peglegedi'an kia ni Herodes.

²¹Naa bena' su gendaw na nu sesa'en, kini si Herodes, mikseluk pekayan gadi', migingkud dayun dia gingkudanen gadi', migagdat dayun tu nga getaw. ²²Selian ni Herodes mektalu', mimeksay su nga getaw, laung nilan, "Ki tingegen kiin, kana' talu' kilawan, pu' talu' diwata!" ²³Mitekaw dayun pelebu'ay nu sesugu'en nu Megbebaya' getaw langit si Herodes, saba' dinawaten su kegenal nu nga getaw diniin, nda'en sungkin pegbesaay su Megbebaya'. Inuled dayun si Herodes muka' minatay.

²⁴Laak dagid su talu' nu Megbebaya', minamal mesigwag, minamal dadema megdugang su mikpetuud dun.

²⁵Naa si Bernabe muka' si Saulo kiin, bena' mitubus na nilan su ginangay nilan dia, mipuli' ilan genat tu Jerusalem, pidunutan nilan si Juan kia, sala ngalanen si Marcos.

Tindu' nu Megbebaya' muka' Sinugu'en si Bernabe muka' si Saulo

13 ¹Naa su pikumpungan nu nga sakup ni Isus ditug lunsud Antioquia, duuni nga getaw megwali talu' nu Megbebaya', muka' duun dademai nga mekpetu'un. Ilan si nga Bernabe, si Simon (piningalan dun si Maitem), si Lucio (getaw Cirene), si Manaen binata' nu gama' ni Gubirnadur Herodes, muka' si Saulo. ²Ilan kini, duuni gendaw miktamuy ilan ditu Kaunutan muka' mikpuasa ilan. Mendadi selian nilan mektamuy, tilu'an ilan nug Balakat nu Megbebaya', laungen, "Kini si Bernabe muka' si Saulo, tindu'u ilan sesugu'en ku. Kaas pekpain niu ilan, adun baalen nilan ki sugu'an ku dinilan."

³Mendadi bena' mitubus menenabi muka' mekpuasa su nga sakup ni Isus kia, pindepenan nilan si Bernabe muka' si Saulo, pipanaw nilan dayun.

Migukit si nga Bernabe di Gempia Petenday tu Pulu' Cipre

⁴Naa mendadi, kini si Bernabe muka' si Saulo, kagina sinugu' ilan nug Balakat nu Megbebaya' mpanaw, tumigbeng ilan pangay tu Seleucia. Genat tu Seleucia, suminakay ilan dumipag tu pulu' Cipre. ⁵Bena' minateng ilan tug lunsud Salamina, migukit ilan di talu' nu Megbebaya' dia nga simbaan nu getaw Judea. Duma nilan migabang dinilan si Juan kiin, sala ngalanen si Marcos.

⁶Naa bena' midepet si nga Bernabe ditug lunsud Papos, su gekteb nu pulu', duuni mipekita' nilan dia sala tawan mensaled, ngalanan si Bar-Jesus. Kini si Bar-Jesus, getaw Judea, inangkenen pimuunan iin nu Megbebaya'. ⁷Sambaten su gubirnadur di pulu' kia, si Sergio Paulo, metaasi sinuunanen. Mendadi su gubirnadur, sinabinen si Bernabe muka' si Saulo adun medengegen su talu' nu Megbebaya'. ⁸Dagid sa' pigukitan nilan su gubirnadur, kuminuntra dinilan ki mensaled kini, sala ngalanan si Elimas (iini ngalanan di pikebitan nu getaw Grecia). Pinemalan ni Elimas penendingay su gubirnadur adun ndi' mekpetuud. ⁹Mendadi si Saulo kini, sala ngalanan si Pablo, pingepu'an nug Balakat nu Megbebaya'. Pigenlengan ni Pablo si Elimas, ¹⁰kali' pektalu' diniin, "Bata'a nu Palin! Adinadin su melengas, peglekuntraan mu. Sug delendeman mu, lumbus limbung muka' kedupang. Su metuud tinalu' nu Megbebaya', penumbeligen mu dig balus! ¹¹Naa, pelebu'an ka nu Kaunutan Megbebaya', mbutaa, mesingalet ndi' mu maita' su tiag nu gendaw."

Mitekaw dayun menggabuni pegbantay ni Elimas, iini maita'en, medelem. Subay mikpanawpanaw laak menengaw dumanen megulipit diniin. ¹²Mendadi su gubirnadur kia, bena' minita'en su mipenggulaula ni Elimas, mekpetuud dayun dini Isus. Pu' misebu'an ditu pitu'un ni Pablo mekatag di Kaunutan.

Migukit si nga Pablo di Gempia Petenday tug Antioquia, Sakup Pisidia

¹³Naa suminakay na pelum si nga Pablo. Genat tu Papos, duminipag ilan tug lunsud Perga, sakup Panfilia. Bena' minateng ilan ditu, sumiway dinilan si Juan Marcos kiin, mipuli' ditu Jerusalem. ¹⁴Genat Perga, minundas si nga Pablo tug lunsud Antioquia, sakup Pisidia. Mendadi bena' su Gendaw Pelali, miditu ilan simbaan nu getaw Judea, sumiled ilan dia, mingingkud ilan. ¹⁵Mendadi bena' mitubus besaay su Palinta nu Megbebaya' pisulaten dini Moises muka' tu ngag duma pimuunanen dengantu, mimuun dini nga Pablo su nga kaunutan di simbaan, laung nilan, "Uu Mingumpated, sa' duuni kengulikseg niu di nga getaw kini, naa talu' na niu." ¹⁶Mendadi kini si Pablo, migindeg dayun, pipengameden su nga getaw. Kali' pektalu' si Pablo,

"Mendadi yamu nga samau getaw Israel muka' yamu nga kana' getaw Judea megbasa dadema ditu Megbebaya', kineegay niu ki talu'u kini! ¹⁷Su Megbebaya', su pektemuyen ta nu getaw Israel, pimili'en dengantu su nga ginepu'ay ta pepiananen. Naa selian nu nga ginepu'ay ta megbenwa ditug Ehipto, benwa nug lain bansa, piglaun nu Megbebaya' sug bansa ta, kaas migdedengeg gupia. Bena' miniben, pigua' ilan pelum nu Megbebaya' ditu pibian di metaas ginuungen. ¹⁸Genat itu, paat pulu' taun su Megbebaya' miktigel dig betad nilan, sinegay nilan tug limawa'. ¹⁹Bena'

minateng ilan ditu Canaan, pilengan nu Megbebaya' gapuy ki pitu bansa nga getaw dia, adun petengeden di piglegetawanen sug benwa kia. Naa genat tu kedadeng kitu nu ginepu'ay ta tug Ehipto sampay di kedaag nilan tu pitu bansa kia, ²⁰ duun saani paat gatus bu' lima pulu' taun."

Laung padun ni Pablo, "Naa genat itu, duuni nga getaw bigay nu Megbebaya' meglegukum tu nga ginepu'ay ta sampay di timpu nu pimuunan nu Megbebaya' si Samuel. ²¹ Naa bena' migubug ilan tu Megbebaya' gadi', bigayen dayun dinilan meglegadi' si Saulo, bata' ni Cis, kausebaan ni Benjamin, sampay paat pulu' taun pelum. ²² Bena' inawa' pelum nu Megbebaya' si Saulo, iini sinuklinen dun meglegadi' dinilan, si David. Kinii tinalu' nu Megbebaya' mekatag diniin, 'Aa naa, mibaangan ku si David, bata' ni Isai, leliagenu gupia diniin. Adin su mauya'an ku, petuudenen.' ²³ Naa mendadi," maa' laung padun ni Pablo, "kini si Isus, sapu' ni David, iin na tu'u su binaal nu Megbebaya' meglegawen dig bansa Israel, maa' dadema nu pinasaden. ²⁴ Laak su nda' pa pekpuun si Isus tu pembaalenen, migukit si Juan tug launan getaw Israel pu' subay meksikesuun ilan dakus mekpebunag ilan tubig. ²⁵ Mendadi bena' sungu na metubus ni Juan su penggulaulaanen dinig lumbang, sinaaken tu nga getaw, 'Naa, ta' mai ketalu' niu, naan keni, ta'i gasalu? Kana' ma naani pedetengen niu lumusad. Dagid duuni sungu metua', mbinaya' pa dinaan, laak pia su sepatusen, kana'u mbantang mekpeluas dun diniin.' "

²⁶ Laung padun ni Pablo, "Naa, uu Mingumpated, yamu nga samau sapu' ni Abraham muka' yamu nga kana' getaw Judea megbasa dadema ditu Megbebaya', ki kegawen kini, ita nai pimuunan dun nu Megbebaya'! ²⁷ Pu' kada Gendaw Pelali, pegbesaan nu nga samabansa ta muka' nu nga kaunutan ta ditu Jerusalem su sinulat dengantu nu pimuunan nu Megbebaya' ditu Misulat Talu'en. Laak nda' nilan mesabut su pigbasa nilan kia. Kaas kini si Isus, sa' mitua' na, nda' nilan mailala pu' iini mitendu' meglegawen tu getaw. Sa' ma'antu, pipenuud nilan su sinulat kia, iini kenuud dun, inukuman nilan si Isus. ²⁸ Pia nda'idunig dinangat nilan dini Isus laga' na ginaanen, inubug nilan dini Pilato, petain iin. ²⁹ Mendadi bena' migela' nilan penggulaulaay sug launan misulat pedaan mekatag dini Isus, inagwat nilan ditu kurus sug bangkayen, libeng nilan dayun di sangyab. ³⁰ Laak dagid kini si Isus, pitubu' puli' nu Megbebaya'. ³¹ Dayun duuni santa' gebii, mikpaita' puli' iin tu nga gandang tendugen su kangayen tu Jerusalem genat tu Galilea. Su nga mikaita' dun kia, ilan dayuni takesi' migukit dun di nga getaw Israel. ³² Mendadi yami kini," maa' laung padun ni Pablo, "midini ami adun ukiten da nami dema diniu ki Gempia Petenday, ³³ su pinasad nu Megbebaya' ditu ginepu'ay ta, su minuud na nandaw dinita nga sapu' nilan. Iini kenuud dun, pitubu' puli' nu Megbebaya' si Isus. Ma'antui sinulat ditu Misulat Talu' nu Megbebaya', ditu kedua' Bebatan, laung,

'Ya'a sug Bata'u.

Nandaw mibaluy nau Gama' mu.'ⁱ

³⁴Laung padun ni Pablo, "Kinii tinalu' nu Megbebaya' mekatag di kepetubu'en puli' dini Isus, adun ndi' na puli' matay. Laung nu Megbebaya',

'Begayu tu'u diniu su meseligan kepianan pinasadu dini David di gempagen pasad.' "

³⁵Maa' laung padun ni Pablo, "Ma'nia pa pagidi sinulat dia ngag Bebat, laungen,

'Ndi' mu begay melasak diag lebengenig lawas nu meseligan sesugu'en mu.' "

³⁶Laung pa ni Pablo, "Naa saanan tetubu' pa si David kia, pinggulaulanen sug delendeman nu Megbebaya'. Tubus itu, minatay, bitang dayun dig lebeng maa' danu ginepu'ayen, milasak dademaig bangkayen. ³⁷Dagid ki pitubu' puli' kia nu Megbebaya', nda' na melasakig lawasen.

³⁸⁻³⁹"Naa yamu nga samau getaw Israel, kinii pesuun ku diniu, launan niu. Pia dунтан niu sia su Palinta nu Megbebaya' pisulaten dini Moises, ndi' damu gusay mpedasun di sala' niu. Dagid kini si Isus, miksekat diniin ki kepedasun di sala' pegukiten nami diniu. Adin su mekpetuud dini Isus, mpedasun di kelaun sala'en. ⁴⁰Kaas petubud amu, adun ndi' menuud diniu su sinulat nu nga pimuunan nu Megbebaya' dengantu ditu Talu'en, laung nilan,

⁴¹'Bentayay niu pa daan, yamu nga mesudi!
Subay mesebu'an amu, muka' mematay amu!
Pu' penggulaulaan ku di gendawan niu
ki gendi' amu metuudan dun,
pia pegwali diniu!' "

⁴²Naa bena' migawa' si Pablo muka' si Bernabe dia simbaan kia nu getaw Judea, inubug nu nga getaw dini Pablo megukit puli' di sala Gendaw Pelali. ⁴³Sa' mimeguli' si Pablo muka' si Bernabe, melaun getaw migdunut dinilan, mesama su getaw Judea muka' su nga kana' getaw Judea miginetaw na dinilan. Tinitulu'an ilan dayun ni Pablo muka' ni Bernabe, pinguliksegan nilan adun ndi' mpalini kesalig nilan tu tulung nu Kaunutan.

⁴⁴Mendadi bena' su puli' Gendaw Pelali, migela'gela' mekpungun su nga getaw dig lunsud kia, adun mekineeg ilan di talu' nu Megbebaya'. ⁴⁵Dagid ki nga getaw Judea, bena' minita' nilan su melaun getaw mipungun, misigi ilan pati' dini nga Pablo. Pimilas nilan su telu'en ni Pablo muka' pinampalakaan nilan iin. ⁴⁶Dagid kini si Pablo muka' si

ⁱ 13:33 Kig Bebat kini, iin su piningalan dun nu getaw Judea begudiin Salmo, sug bibat nilan adun pektamuy tug Diwata.

Bernabe, suminasal ilan sungkin sumbag. Kali' ilan pektalu', "Paa, yamu kiin, subay miuna amu pedengegay talu' nu Megbebaya'. Digid pimilas niu, ma'ananen ndi' niu pemilangenig lawas niu bantang mpeduma tu ketubu' nda'i tamanen. Mendadi, megawa' nami nandaw diniu, iin pelumi pengukitan nami di talu' nu Megbebaya', ki nga kana' getaw Judea. ⁴⁷Pu' iini sinugu' nu Kaunutan dinami, laungen,

'Tindu'u amu mbaal tilaw mekpedelag tu nga kana' getaw Judea, adun pegukiten niu tug launan getaw di tibuuk lumbang ki kegawen dinilan.' "

⁴⁸Naa bena' midengeg nu nga kana' getaw Judea ki tinalu' kia ni Pablo, liliag ilan gupia. Inal nilan su ginukit ni Pablo mekatag di Megbebaya'. Adin su nga mitendu' nu Megbebaya' mpeduma tu ketubu' nda'i tamanen, mikpetuud ilan dayun.

⁴⁹Mendadi, mileep di tibuuk benwa kia su talu' nu Kaunutan Megbebaya'. ⁵⁰Digid ki nga kaunutan dig lunsud kia muka' su ngag libun meketaasi tindegen megbasa ditu Megbebaya', sinamuk nu nga getaw Judea su ginana nilan, adun peglegetan nilan si Pablo muka' si Bernabe. Sa' ma'antu, inutidan nilan dayun si nga Pablo diag benwa nilan. ⁵¹Saanan ni nga Pablo megawa' dia, ikpug nilan sug lepup lupa' di geksud nilan, takesi'an nilan tu nga getaw dig lunsud kia. Tubus itu, minundas ilan dayun tug Iconio. ⁵²Laak su nga sakup ni Isus diag Antioquia, liliag ilan gupia, muka' pingepu'an ilan nug Balakat nu Megbebaya'.

Migukit si Pablo muka' si Bernabe di Gempia Petenday tug Iconio

14 ¹Mendadi si Pablo muka' si Bernabe, minateng ilan tug Iconio, sumiled ilan dayun tu simbaan nu getaw Judea, migukit ilan dia. Saba' ginuungan gupiai kengukit nilan, melaun gupia getaw mikpetuud dini Isus, nga getaw Judea sampay kana' getaw Judea. ²Digid duuni nga getaw Judea dia, mimilas ilan, suminamuk ilan di ginana nu nga kana' getaw Judea, adun peglekuntraan nilan su nga mikpetuud. ³Miniben megbebenwa dia si nga Pablo, mesasal ilan megukit talu' nu Kaunutan Megbebaya'. Tinakesi'an nu Megbebaya' pu' metuud su pengukiten nilan mekatag di tulungen, pu' bigayan ilan niin ginuung adun melaun mekesalebu' penggulaula muka' tu'us binaal ni nga Pablo. ⁴Digid miksumpaki'ig delendeman nu nga getaw dig lunsud kia. Duuni duminunut di nga getaw Judea kia, duun dademai duminunut tu nga peneligan ni Isus.

⁵Mendadi ki nga getaw Judea muka' su nga kana' getaw Judea kampu' nu nga kaunutan nilan, miksabutsabut ilan, peglegetan nilan sia su nga peneligan ni Isus kia muka' betuun nilan. ⁶⁻⁷Digid bena' misuunan ni nga Pablo, miglaguy ilan tug benwa Licaonia. Ditu nailan pelum migukit

Gempia Petenday ngag lunsud Listra muka' Derbe, sampay tug lumibut benwa.

Ditug Listra muka' Derbe si nga Pablo

⁸Naa diag Listra, duuni getaw pilung genat pa di kegigetawen, nda' mainsan mekepanaw. ⁹Pikineegan nu pilung su talu' ni Pablo. Mendadi misima' ni Pablo pu' ki pilung kini, duuni kesaligen, kaas mesu'at peneguli'ay. ¹⁰Kali' penekeg mektalu' si Pablo, “Pegbuata, petandeng mui gindeg mu!” Suminambut dayun megbuat su getaw kia, mikpanawpanaw dayun. ¹¹Mendadi ki nga melaun getaw dia, bena' minita' nilan su pinggulaula ni Pablo, minekeg ilan mektegas di pikebitan nilan nga getaw Licaonia, laung nilan, “Kuminilawan na su ngag diwata, luminusad ilan dinita!” ¹²Piningalan nilan dayun dini Bernabe su ngalan nug diwata Seus, muka' si Pablo, piningalan nilan dun si Herme, pu' iini metau megukit. ¹³Naa duunig balay pengamuyu'an nu nga getaw kia tug diwata nilan si Seus, dia mesempel genga'an nug lunsud. Sa' ma'nia, miguit sug belian nilan ngag baka muka' pekayan bulak diag balay kia, adun mekanu ilan dini nga Pablo, ilan nu nga melaun getaw.

¹⁴Naa, apelai. Kini si Bernabe muka' si Pablo, bena' misuunan nilan su gulaula nu nga getaw, pinggedit nilan su nga penepeten nilan, minggebek ilan dayun dia titenga' nu tebenan getaw. Miktegas ilan, laung nilan, ¹⁵“Yamu pa di getaw, mauma ini? Yami kini, kilawan dami, miksama dai gasal ta. Midini ami megukit diniu Gempia Petenday, adun teliudan niu su mibulugan niu pektemuyay, adun mekelingay amu ditu tantu Megbebaya', su Mikleb tug langit, Miwat tug lupa', Minaglis tu tubig, Minunag tug dagat muka' Mitang dig lumaun bitang di tibuuk lumbang. ¹⁶Iin, pituyangen dengantu su kelaun bansa nu getaw, pia ta' alandunig liagan nilan pegbetaden nilan. ¹⁷Dagid genat dengantu, mikpailala di nga getaw su Megbebaya', tinakesi'en dun ki kekpepianen diniu. Pu' su kelaun pimula niu mpia aanen, pidupi'anen muka' pisengku'en, bigayan amu niin gaan niu sampay pianan ginaa.”

¹⁸Dagid pia ma'antui tinalu' ni nga Pablo, gusul nilan mbelibaday su nga getaw, megilak dailan sia betang dini Pablo muka' dini Bernabe.

¹⁹Mendadi tubus itu, duuni nga getaw Judea minateng diag Listra genat ditug Antioquia muka' ditug Iconio. Pinalin nilan pelum sug delendeman nu nga getaw dia, binatu nilan dayun si Pablo. Dindel nilan dayun ditug liu nug lunsud, laung nilan dun, minatay na. ²⁰Laak dagid sa' piglidungan si Pablo nu nga sakup ni Isus, migbuat, mipuli' dayun diag lunsud kia. Bena' miksala gendaw, minundas ilan dua' ni Bernabe tug Derbe.

Su Kepuli' ni nga Pablo tug Antioquia

²¹Naa si nga Pablo kini, saba' nilan megukit Gempia Petenday diag lunsud Derbe, melaun getaw pisakup nilan dini Isus. Dekag ilan mipuli'

tug Listra muka' tug Iconio sampay tug Antioquia, sakup benwa Pisidia. ²²Pipagen nilan su kesalig nu nga sakup ni Isus dia, pinguliksegan nilan pu' adun ndi' mpalini kekpetuud nilan. Laung nilan, "Subay melaun kelegenay mbianan ta, dekag paita mpeduma tu Keglekaunutan nu Megbebaya'." ²³Muka' kada pikumpungan nu nga sakup ni Isus, miktendu' si nga Pablo nga kaunutan dun. Dayun ilan minenabi, dunut mikpuasa ilan, bian nilan paingaten nilan su nga kaunutan kini ditu Kaunutan Megbebaya', su seligan nilan.

²⁴Bena' mibianan ni Pablo muka' ni Bernabe sug benwa Pisidia, midepet ilan tug benwa Panfilia. ²⁵Duunig lunsud dia, piningalan dun Perga, dia ilan migukit di Gempia Petenday. Tumigbeng ilan dayun tug Atalia, ²⁶dayun ilan sumakay dumipag puli' ditug Antioquia, sug lunsud tanda' ilan pi'ingat nu ngag duma nilan tu tulung nu Megbebaya', adun mbaluy sug baalen nilan, ki mitubus na dema.

²⁷Naa dekag si nga Pablo minateng diag Antioquia, pinungun nilan dayun su pikumpungan nu nga sakup ni Isus, inukit nilan dayun dinilan sug launan pinggulaula nu Megbebaya' pebian dinilan, su kepanaw nilan. Inukit nilan padun tu nga samasakup nilan su kegbuka' nu Megbebaya' di kekpetuud nu nga kana' getaw Judea. ²⁸Tubus itu, miniben si Pablo muka' si Bernabe mekpungun megbenwa di nga sakup ni Isus dia.

Mikpungun ditu Jerusalem su nga Kaunutan nu nga Mikpetuud

15 ¹Mendadi duuni nga getaw mitua' diag Antioquia genat tu Judea, pitu'unan nilan su nga sakup ni Isus dia, kali' ilan pektalu', "Ndi' amu megawen, subay sirkunsisuun amu, adun medunutan niu su Palinta nu Megbebaya' pisulaten dini Moises." ²Naa bena' ma'niai tinalu' nu nga getaw Judea kini, si Pablo muka' si Bernabe, sumiwal ilan pati' dinilan.^j Bena' nda' ilan peksinengu'ay, tindu' si Pablo muka' si Bernabe meditu Jerusalem, ilan nu nga tendug nilan, adun lingi'an nilan su nga peneligan ni Isus muka' su nga kaunutan nu pikumpungan nu sakup ditu.

³Sa' ma'nia, pipanaw si nga Pablo nu pikumpungan nu sakup ni Isus. Minian ilan dayun tug benwa Fenicia muka' tu Samaria, pegukiten nilan su kelingay nu nga kana' getaw Judea tu Megbebaya'. Liliag dun gupia su kelaun kepetedan inukitan nilan dun. ⁴Mendadi, bena' minateng ilan ditu Jerusalem, pinemba' ilan nu pikumpungan nu sakup ni Isus muka' nu nga peneliganen kampu' nu nga kaunutan nu pikumpungan. Inukit nilan dayun sug launan pinggulaula nu Megbebaya' pebian dinilan. ⁵Dagid duuni nga mikpetuud migindeg, sakup ilan nu pikumpungan nga Pariseo,

^j 15:2 Su nga suminakup dini Isus diag Antioquia, kana' ilan getaw Judea. Tinalu' ni Pablo, migawen ilan miksekat laak di kesalig nilan dini Isus. Kaas ndi' ilan kambat meginetaw Judea.

kali' ilan pektalu', "Ki nga kana' getaw Judea, subay sirkunsisuun ilan dakus titulu' dinilan, dunutan nilan su Palinta nu Megbebaya' pisulaten dini Moises."

⁶Mikpungun dayun su nga peneligan ni Isus muka' su nga kaunutan di pikumpungan nu nga sakup, adun pegyegaan nilan ki tinalu' kia nu nga Pariseo. ⁷Bena' miniben nailan meglantugi' dun, kini si Pedro, migindeg, kali' pektalu', "Yamu Mingumpated, suunan niu pu' begudiin pimili'an ita nu Megbebaya', naan dayuni pimili' adun ukitan ku di Gempia Petenday ki nga kana' getaw Judea, adun petuuden nilan. ⁸Naa suunan nu Megbebaya' sug delendeman nu getaw, kaas tinakesi'anen su kekpetuud nu nga kana' getaw Judea, pu' pipengapu'en dinilan sug Balakaten, maa' danu kepepengapu'en dun dinita. ⁹Piglepeng ilan niin dinita, inugasanen su sala' nilan miksekat di kekpetuud nilan. ¹⁰Naa sa' ma'antu, mauma dema pengindanan niu su Megbebaya'? Pu' sa' pesirkunsisuun niu ki nga mikpetuud kia, puit niu sia dinilan su nda' megaga uitay nu ginepu'ay ta, muka' ita dema, nda' ta dema megaga. ¹¹Ndi' pia! Ita, mikesalig ita tu Megbebaya' dakus migawen ita, miksekat di tulung nu Kaunutan ta si Isus. Ki nga kana' getaw Judea, ma'antu dadema."

¹²Mikeneng dayun su kelaun getaw mipungun dia. Pikineegan nilan dayun su gukiten ni Bernabe muka' ni Pablo mekatag di mekesalebu' pinggulaula muka' tu'us binaal nu Megbebaya' pebian dinilan selian nilan dia ngag benwa nu kana' getaw Judea. ¹³Bena' mideksu' ilan mektalu', si Santiago, suminalak dayun, laungen, "Naa, yamu Mingumpated, talentenay niau! ¹⁴Inukit na ni Simon su kektelipuun nu Megbebaya' di gabangen tu nga kana' getaw Judea, pu' duun na dinilani binaalen daniin piglegetawan. ¹⁵Misangu' dun dadema su sinulat dengantu nu nga pimuunan nu Megbebaya' ditu Misulat Talu'en, laung nilan,

¹⁶ 'Tubus itu mpuli'u, laung nu Kaunutan Megbebaya',
muka' puli'an ku petindegay su peglegedi'an ni David.
Petindegen ku su miniben na megeba',
pepegenen ku puli'.

¹⁷ Kiin, adun lumingay dinaan su kelaun duma getaw,
sampay su nga kana' getaw Judea inggatu mbaal piglegetawan ku.

¹⁸ Iini tinalu' nu Kaunutan Megbebaya', pisuunen dengantu di nga
getaw.' "

¹⁹Laung padun ni Santiago, "Mendadi danaan, delendeman ku, ki nga kana' getaw Judea luminingay na tu Megbebaya', ndi' ta nailan semuken.^k ²⁰Laak puitan tailan sulat, titulu' ta dinilan pu' ndi' mpia aanen su milemu'an saba' ginilak dig ledawan. Ndi' dadema mpia

^k **15:19** Sa'itada su nga kana' getaw Judea mikpetuud na dini Isus, ndi' ilan tegelen meginetaw Judea.

megdusa, dakus ndi' mpia aanen su pinatay dig lengek, sampay sug dugu'. ²¹Pu' kitu nai kaibenen, pigbesaan nu nga getaw Judea dia nga simbaan nilan su Palinta nu Megbebaya' pisulaten dini Moises. Kada Gendaw Pelali, pektitulu'en dig launan lunsud ki palinta kiin ni Moises."

Su Sulat Piwit tu nga Kana' Getaw Judea Mikpetuud dini Isus

²²Naa sa' ma'antu, su nga peneligan ni Isus, su nga kaunutan, kampu' nu tibuuk pikumpungan nu nga sakup ni Isus, pimili' nilan ki sugu'en nilan megdunut dini Pablo muka' dini Bernabe mangay ditug Antioquia. Iini pimili' nilan si Silas muka' si Judas, sala ngalanan si Barsabas, pegbesaan ilan gupia nu nga mikpetuud. ²³Kinii sulat piwit dinilan.

"Yami nga peneligan ni Isus muka' nga kaunutan di pikumpungan nu nga sakupen mimated diniu, suminulat ami diniu diag Antioquia, diag benwa Siria, muka' diag benwa Cilicia, yamu nu nga kepetedan nami kana' getaw Judea. ²⁴Mendadi, midengeg nami pu' duunig duma nami suminamuk diniu, pilaat nilani ginaa niu pibian nu tinalu' nilan diniu. Laak ki tinalu' nilan kiin, kana' titulu' genat dinami. ²⁵Kaas iinig delendeman piksinengu'an nami gupia, memili' ami sugu'en nami mangay dia niu, tundug ilan dini petailen nami Bernabe muka' si Pablo. ²⁶Naa si Bernabe muka' si Pablo kini, minatay ilan sia saba' nu gabang nilan tu Kaunutan ta si Isukristu. ²⁷Mendadi, iini sinugu' nami mangay diniu, kini si Judas muka' si Silas, adun medengeg da niu dema dig baba' nilan sug bitang dadema di sinulat kini. ²⁸Sinangu' nami sug delendeman nug Balakat nu Megbebaya', ndi' nami mpia titulu'en diniu su mbegatan amu dun, subay laak ki gempia penggulaulaan kini. ²⁹Ndi' mpia aanen niu sug betang ginilak dig ledawan. Ndi' dadema mpia aanen niu sug dugu' sampay su pinatay dig lengek. Muka' ndi' dadema mpia ki megdusa amu. Sa' pegliaun niu itu, gempiai mpenggulaula niu. Daal daitu."

³⁰Mendadi, pipanaw su nga megated tu sulat, tumigbeng ilan tu'u tug Antioquia. Bena' pinungun nilan su tibuuk pikumpungan nu nga sakup ni Isus dia, bigay nilan dayun dinilan su sinulat. ³¹Bena' mibasa nu nga sakup kia, mipati' ilan leliagay ditu tinitulu' dinilan kia. ³²Sa' si Judas muka' si Silas kia, nga megwali talu' nu Megbebaya', minamal ilan mektitulu' tu nga kepetedan dia. Pingamu' nilan su ginaa nu nga getaw dia, migiseg dayuni kekpetuud nilan. ³³Naa bena' miniben ilan dia, piuli' nu kepetedan su nga sinugu' di gempia ginaa. ³⁴[Laak si Silas, delendemenan mbilin pa dia.]

³⁵Naa si Pablo muka' si Bernabe, migbebenwa pailan diag Antioquia, miktitulu' ilan muka' migukit tu talu' nu Kaunutan Megbebaya'. Melaun dademaig duma nilan.

Sumiway dini Bernabe si Pablo

³⁶Naa, bena' duuni santa' gebii, kali' pektalu' si Pablo dini Bernabe, "Naa, mpuli' ita ditu, laawan ta su kepetedan ditug launan lunsud kitu

tanda' ta pigukit su talu' nu Kaunutan, adun mesuunan ta su kebetang nilan.”³⁷Mauya'an dayun ni Bernabe, uiten nilan tendug nilan si Juan kiin, sala ngalanen si Marcos.³⁸Dagid si Pablo, delendemenan melengas ndi' petendugen, pu' su ditu pailan Panfilia, sumiway dinilan si Marcos, nda' na duma dinilan mangay megukit.³⁹Mendadi, miksuay si Pablo muka' si Bernabe, miksuay ilan dayun. Si Bernabe, iwiten tendugen si Marcos, suminakay ilan dumipag tu pulu' Cipre.⁴⁰Si Pablo, pimili'en tundug diniin si Silas. Bena' pi'ingat ilan nu kepetedan tu tulong nu Megbebaya', mipanaw ilan dayun.⁴¹Lineep dayun ni Pablo sug benwa Siria muka' Cilicia, pigisegen su kekpetuud nu nga pikumpungan nu sakup ni Isus dia.

Migdunut dini nga Pablo si Timoteo

16¹Ma'antu, minundas puli' si nga Pablo ditug Derbe muka' Listra. Duuni sakup ni Isus diag Listra, ngalanen si Timoteo. Su gina'en, getaw Judea mikpetuud na dini Isus, laak su gama'en, getaw Grecia.²Si Timoteo kini, inal nu kepetedan diag Listra muka' Iconio.³Mendadi mauya'an ni Pablo, tendugen padun si Timoteo. Pisirkunsisu dayun ni Pablo si Timoteo, iini pikpuunanen su kesirkunsisunen dun, pu' adun ndi' mpemilas nu nga getaw Judea. Pu' sug launan getaw Judea dia, misuunan nilan pu' su gama' ni Timoteo, getaw Grecia.⁴Mendadi saanan nilan mengepitan dia ngag lunsud, tinitulu'an nilan tu nga mikpetuud dia su nga pigdelendem kia nu nga peneligan ni Isus muka' nu nga kaunutan di pikumpungan nu sakupen ditu Jerusalem.⁵Sa' ma'nia, migiseg su kekpetuud nu pikumpungan nu nga sakup dia. Muka' gendawgendaw, migdugang ilan.

Su Pinita' nu Megbebaya' dini Pablo tu Troas

⁶Mendadi minian laak si nga Pablo dig benwa Frigia muka' Galacia, pu' pimaag ilan nug Balakat nu Megbebaya' megukit talu'en dia prubinsya Asia kia.⁷Bena' minateng ilan tug dulunan nug benwa Misia, minundas ilan sia tu prubinsya Bitinia, laak nda' buang dinilan nug Balakat ni Isus.⁸Sa' ma'nia, minian laak ilan dayun diag benwa kia, tumigbeng ilan tu Troas.⁹Mendadi selian nilan dia Troas, duuni gebii, duuni pinita' nu Megbebaya' dini Pablo, getaw Macedonia pegindeg, megubug diniin, laungen, “Dipag amu dini Macedonia, ebangay niu ami!”¹⁰Bena' mipaita' dini Pablo ia, migdedali' ami dayun mundas tu Macedonia, pu' mituudan ami dun, tindu' ami nu Megbebaya' megukit di Gempia Petenday tu nga getaw ditu.¹

¹ 16:10 Si Lucas, su suminulat dig libro kini, ginamiten dini su penggelal “ami”. Kaas mesuunan ta, minampu' na dini Pablo si Lucas.

Su Kesakup ni Lydia

¹¹Naa suminakay ami dayun genat ditu Troas, minandeng ami dumipag ditu Samotrasia. Bena' sala gendaw, minundas ami ditu Neapolis. ¹²Genat dia Neapolis, tumiwad ami pangay ditug lunsud Filipos, gembagel gupia lunsud dia Macedonia, lunsud sakup Roma. Duuni santa' gebii migbebenwa ami dia Filipos kia. ¹³Bena' su Gendaw Pelali, lumiu ami dig lunsud kia, miditu ami geksid tubig, pu' delendeman nami, duuni pektebu'an nu getaw Judea dia sa' menenabi ilan. Naa bena' mingingkud ami dia, mingukit ami tu ngag libun mipungun dia. ¹⁴Mendadi duuni sala tawan di nga mikineeg dinami kia, ngalanan si Lydia, getaw Tiatira, mendedagang penepeten tinina' gempula. Kini si Lydia, megbasa tu Megbebaya'. Naa pidelendem nu Megbebaya' diniin, pektalenenan gupia su talu' ni Pablo. ¹⁵Binunagan dayun tubig si Lydia, ilan nu nga gapenen. Bena' mitubus, inggat ami dayun ni Lydia, laungen dinami, "Sa' laung niu suminaligu tu'u tu Kaunutan, ditu amu balayu pegbebenwa." Miguut ami dayun niin.

Su Kepirisu ni nga Pablo

¹⁶Naa duuni gendaw, selian pegangay pami dia penenebian nu nga getaw, duuni misungkak nami delaga. Kig delaga kini, gulipen, pingepu'an menulay, kaas mengengatuk. Duminatu' dayun su nga getaw mingulipen diniin miksekat di kengatuken. ¹⁷Mendadi tumindug dayun dinami ni Pablo sug delaga kia, kali' pegbeksay, laungen, "Ki nga getaw kini, sesugu'en ilan nu Tampusan Metaas Megbebaya'! Petenday nilan diniu kig bian nu kegawen diniu!" ¹⁸Gendawgendaw, iin nai migbatag ia. Mendadi duuni gendaw, misesawan dun si Pablo. Liningayen dayun kig delaga kini, tilu'anan dayun su pegiba'anan, "Di pegbaya' ni Isukristu, sugu'en ku ya'a, pegawa'a diniin!" Iin dayuni kegawa' nu menulay. ¹⁹Dagid sa' misuunan nu nga migulipen dun pu' nda' nai melaam nilan dun, pidaap nilan si Pablo muka' si Silas, dayun nilan biglasay tu tebu'an adun padap nilan tu nga kaunutan. ²⁰Bena' piadap nilan tu nga kuis, laung nilan dayun, "Ki nga getaw kini, getaw Judea. Miksamuk ilan dig lunsud ta kini. ²¹Mikpetu'un ilan betad ndi' ta medawat, muka' ndi' ta dema mpia dunutan, pu' sakup Roma ita." ²²Migabang dayun lumumpak dini nga Pablo su nga melaun getaw.

Mendadi, pinggedit nu nga kuis su penepeten ni Pablo muka' ni Silas, sinugu' nilan dayun pembedasen ilan. ²³Bena' melaun na badas dinilan, pinirisu ilan dayun. Tinitulu' tu pegingat tu pirisuan, peksiba'an ilan peligenay. ²⁴Sa' mitelu'an su pegingat dia pirisuan, bitangen si nga Pablo dia mititenga' sugud nu pirisuan, dakus pitungi geksud nilan.

²⁵Mendadi duun saan miginenga'i gebii, minenabi si Pablo muka' si Silas dakus migbebat ilan kegenal tu Megbebaya', pikineegan ilan nu

ngag duma pinikutan. ²⁶Mitekaw dayun meglinug metikteg, mikegyug su gintudan tu pirusuan. Migela' dayun mpuka' su nga takep, muka' milenga' dadema su ngag balud nu nga pinikutan.

²⁷Naa ki micingat dun kia, bena' mitanud muka' minita'en su nga takep mipuka' na, laungen dun migela' mbeluy su nga pinikutan. Sa' ma'nia, bikutanen sug badungen, megeget sia. ²⁸Dagid si Pablo, minekeg megbeksay, laungen, “Ndi'a pegeget! Kini dami, launan nami!”

²⁹Miksaak sulu'i megingat kia, migapas dayun suled dia sugud kia. Miglaub dayun di gedapan ni nga Pablo, sinaaban pati'. ³⁰Inagaken ilan dayun megawa' dia pirusuan. Sinaaken dayun dinilan, “Sir, alandun mai baalen ku, adun megawenu?”

³¹Kali' ilan sembag, “Petuuda tu Kaunutan si Isus, adun megawen ka, sampay su gapen mu.” ³²Dayun ukitay ni nga Pablo su talu' nu Megbebaya' tu megingat kia, kampu' nug launan getaw diag balay kia. ³³Naa, pia miklak na meginenga'i gebii, minangay mengugas di gangel ni nga Pablo su megingat kini. Dayun mikpebunag tubig, kampu' nu kelaun gapenen. ³⁴Iwit dayun nu megingat si Pablo muka' si Silas ditug balayen, dayun nilan ilakay di gaan. Naa liliag dayun gupia su megingat di pirusuan, ilan nu tibuuk salapenan kia, saba' mikpetuud nailan tu Megbebaya'.

³⁵Mendadi bena' miglegendaw, suminugu' su nga kuis di nga pulis mangay ditu megingat tu pinirisu, pimuun nilan diniin, beluyenen si nga Pablo. ³⁶Bena' midengeg nu megingat kia, laungen dini Pablo, “Pimuun nu nga kuis, beluyen amu. Naa panaw amu, gempia dai ginaa niu.”

³⁷Dagid kali' pektalu' si Pablo di nga pulis kia, “Paa, pimbadas ami nilan di gedapan nu nga getaw, nda' ami ukumay. Asa sakup Roma ami! Pinirisu ami nilan dayun. Naa nandaw, beluyen bami nilan di meglud? Paa, ndi' mesu'at! Su nga kuis kia, subay medini ilan megbeluy dinami!”

³⁸Sa' ma'antu, inukit nu nga pulis ditu nga kuis ki tinalu' kia ni Pablo. Bena' misuunan nu nga kuis pu' sakup Roma si Pablo muka' si Silas, mindek ilan. ³⁹Miditu ilan ni nga Pablo, minengi ilan pedasun dinilan. Pibeluy nilan dayun si nga Pablo muka' pinengi nilan dun, gua' ilan dig lunsud kia. ⁴⁰Migawa' dia pirusuan si nga Pablo, mipuli' ilan ditug balay ni Lydia. Bena' mingulikseg ilan di kepetedan dia, mipanaw na si Pablo muka' si Silas.

Ditu Tesalonica si nga Pablo

17 ¹Naa minian si nga Pablo muka' si Silas dig benwa Ampipolis muka' Apolonia, dayun minundas ilan tu Tesalonica, ditu tanda' duuni simbaan nu getaw Judea. ²Mendadi minangay si Pablo tu simbaan, maa' dadema nug betaden, dayun taman telu deksu' Gendaw Pelali, migyagayaga tu nga getaw dia mekatag di Misulat Talu' nu Megbebaya'.

³Pigwali dinilan ni Pablo su talu' nu Megbebaya', muka' inalapen duni tu'usanen dun pu' su Tindu' nu Megbebaya' Meglekaunutan, subay minatay muka' mitubu' puli'. Kali' pektalu' si Pablo dinilan, “Kini si Isus, ki petendain ku diniu, iin na tu'u su Tindu' nu Megbebaya' Meglekaunutan.” ⁴Naa sug duma getaw dia simbaan kia, mituudan ilan dun, minampu' ilan dayun dini Pablo muka' dini Silas, sampay melaun libun meketaasi gelalen muka' nga getaw Grecia megbasa tu Megbebaya'.

⁵Dagid ki nga getaw Judea, mingimbegu ilan dini nga Pablo. Pinungun nilani nga mekelela' getaw medupang, adun semuken nilani tibuuk lunsud kia. Linumpakan nilan dayun sug balay nu sala tawan ngalanen si Jason, pu' pegua'en nilan sia dia si Pablo muka' si Silas, uiten nilan sia tu gedapan nu melaun getaw. ⁶Bena' nda' nilan mbaangay, dindel nilan ditu gedapan nu nga kaunutan dig lunsud si Jason dakus ngag duma mekpetuud. Mimeksay ilan, “Ki nga getaw kini, pisasaw nilan sug liwagan benwa! Naa nandaw, minateng nailan pelum dini, ⁷dakus pinemba' ilan ni Jason kini diag balayen. Launan nilan, mimilas ilan tu palinta nu tampusan gadi' nu getaw Roma si Cesar, laung nilan daw duuni sala gadi', ngalanen si Isus.” ⁸Bena' midengeg nu nga getaw muka' su nga kaunutan nug lunsud, misasaw gupiai ginaa nilan. ⁹Bena' pisunggud nilan si nga Jason, biluy ilan dayun.

Su Kelaguy ni nga Pablo tug Berea

¹⁰Mendadi bena' miglegebii, pilaguy nu nga mikpetuud si Pablo muka' si Silas tug lunsud Berea. Naa dekag nailan minateng ditu, tuminuun ilan tu simbaan nu getaw Judea. ¹¹Naa ki nga getaw Judea diag Berea kia, mekesuun ilan, batul nu nga getaw ditu Tesalonica kia. Pinemba' nilan gupia su pitenday dinilan, muka' gendawgendaw penilungen nilan su Misulat Talu' nu Megbebaya', adun mesuunan nilan sa' metuud su pektelu'en ni Pablo, sa' ndi'. ¹²Melaun dinilan mikpetuud, duuni ngag libun getaw Grecia metaasi tindegen muka' ngag laki. ¹³Dagid ki nga getaw Judea ditu Tesalonica, bena' midengeg nilan pu' megukit padun si Pablo talu' nu Megbebaya' ditug Berea, miglendug ilan, pisamuk nilan dayun pati' su ginaa nu melaun getaw dia. ¹⁴Sa' ma'antu, pilaguy ganam nu nga mikpetuud si Pablo tu geksid dagat. Laak si Silas muka' si Timoteo, mibilin pailan diag Berea. ¹⁵Su nga tumindug dini Pablo gikteb tu Atenas, sa' minuli' ilan diag Berea, pimuun ni Pablo dinilan, ndi' meglangan si Silas muka' si Timoteo meglendug diniin.

Ditug Atenas si Pablo

¹⁶Naa selian ni Pablo megelat dini Silas muka' dini Timoteo diag Atenas, mipati' gupia melibuleng si Pablo sa' minita'en mileep ledawanig lunsud kia. ¹⁷Mendadi, miditu dayun simbaan nu getaw Judea si Pablo,

piglantugi'anen su nga getaw Judea dia, kampu' nu nga kana' getaw Judea megbasa dadema tu Megbebaya'. Mesama dadema dia nga tebu'an, adin sug duuni getaw mpekita'en.

¹⁸Naa duun pagidi nga mekpetu'un, piningalan dun ngag Epikureo muka' ngag Estoiko, miglantugi' ilan pagid dini Pablo. Sinaak nu ngag дума, “Alandun siai pektelu'en ni metakabul getaw kini?” Simbag nug дума, “Mama' megukit mekatag di ngag diwata nda' ta pa mailala.” Iini mitalu' nilan duni ma'nia, pu' migukit si Pablo mekatag dini Isus muka' pagid mekatag di ketubu' puli' nu getaw. ¹⁹Mendadi, iwit nilan si Pablo tu gedapan nu nga kunsial nug lunsud nilan, piningalan dun su pikumpungan nilan kia, sug Areopago. Kali' ilan pektalu' dini Pablo, “Mauya'an nami sia, ulugen mu dinami kig begu tinitulu' mu kiin. ²⁰Ki ngag дума telu'en mu, iin pa nami medengeg, kaas mesuunan nami sia su guluganen.” ²¹(Pu' su nga getaw Atenas kia sampay su ngag lain getaw migbenwa dia, nda' pai dunig lain pinggulaula nilan, megukit laak ilan muka' mekineeg dig begu sinuunan.)

²²Mendadi, migindeg si Pablo dia gedapan nug Areopago kia, kali' pektalu', “Yamu nga getaw Atenas, minita'u su kegbasa niu gupia tu ngag diwata. ²³Pu' su kepanawpanawu dinig lunsud niu, pegbentayan ku su nga pengamuyu'an niu, duuni minita'ui gentudan gilak sinulatan, ‘Pengamuyu'an tug Diwata nda' nami Mailala.’ Naa mendadi,” maa' laung padun ni Pablo, “kig diwata pektemuyen niu kiin, su laung niu nda' niu mailala, iinen na gupiaig diwata petendain ku diniu. ²⁴Su Megbebaya', su Miwat dig lumbang muka' Mitang tug launan bitang dun, su Kaunutan di gekleb langit bu' lupa', ndi' megbenwa di pengamuyu'an pigbaal nu kilawan. ²⁵Iin, ndi' dadema ebangan nu getaw, pu' nda'i kulangen, kagina iini megbegay ketubu' muka' ginaa muka' kelaunanen di tiba'an getaw. ²⁶Iin dademai miwat dig launan bansa nu getaw, sala tawan dai pikpuunanen dun. Tindu'en dadema su timpu nu nga nasud, muka' pigbatalbatalen su gikteb dulunan nug benwa nilan di tibuuk lumbang. ²⁷Iini pinggulaulanen duni ma'antu, pu' adun penengaun nilan su Megbebaya', adun sia mbaangan nilan iin, saba' ilan menelubatik diniin. Laak dagid su Megbebaya', kana' melayu' dinita, saladua'. ²⁸Ma'antu su misulat,

‘Iini puun nu ketubu' ta, iini puun nu kekuleg ta muka' ginaa ta.’
Maa' danu tinalu' nu menenubad diniu, laung nilan,
‘Bata' ita tu'u nu Megbebaya.’”

²⁹Laung padun ni Pablo, “Naa mendadi, kagina bata' ita nu Megbebaya', ndi' ta mpia pegdelendemen pu' su Megbebaya', mama' ledawan binaal nu getaw, kig binaal bulawan, bulawan selapi', atawaka batu, lumbus tinawan laak nu kilawan. ³⁰Su nda' ta pa mailala su Megbebaya', nda'en pengebetay su gulaula ta. Laak dagid nandaw, pinalintanen pu' subay

meksikesuun su tiba'an getaw di tibuuk lumbang. ³¹Pu' miksesa' su Megbebaya' di gendaw peglepengenen ukumay su tiba'an getaw pebian di sala tawan getaw tindu'en mengukum dun. Ki sala tawan kiin, tinu'usan nu Megbebaya', iini tinu'usen dun, pitubu'en puli' ki getaw kiin!”

³²Naa bena' midengeg nu nga getaw su tinalu' ni Pablo mekatag di ketubu' puli' nu minatay, miksudaw dini Pablo sug duma. Laak laung nu ngag duma, “Mekineeg pami puli' dini'a mekatag di telu'en mu kini.”

³³Mendadi, migawa' si Pablo dia nga kunsial kia. ³⁴Duuni nga minampu' diniin dakus mikpetuud dini Isus. Sala tawan dinilan si Dionisio, kunsial dig Areopago kia, muka' sala tawan dademaig libun, si Damaris, sampay duun dademai ngag duma getaw mikpetuud.

Ditu Corinto si Pablo

18 ¹Genat itu, migawa' si Pablo diag Atenas, minundas dayun tu Corinto. ²Mitaanganen dia sala tawan getaw Judea, ngalanen si Aquila, daan benwanen su Ponto. Begu dateng si Aquila dia Corinto genat tug Italia, ilan nu sawanen si Priscila, pu' pinalinta nu tampusan gadi' si Claudio, subay mawa' diag Roma su kelaun getaw Judea. Naa linaawan ni Pablo si nga Aquila kia, ³dayun migbebenwa dinilan, migduma dinilan mengimbaal, pu' miksamaig bian nilan malap ketubu'an nilan, panday ilan megbaal bebelayan luna. ⁴Dayun kada Gendaw Pelali, migyaga si Pablo dia simbaan nu getaw Judea, pengmetuudanan su nga getaw Judea sampay su nga getaw Grecia.

⁵Naa dekap minateng si Silas muka' si Timoteo genat ditu Macedonia, minamal megukit si Pablo ditu nga getaw Judea, takesi'anen dinilan pu' si Isus su Tindu' nu Megbebaya' Meglekaunutan. ⁶Dagid bena' pimilas nu nga getaw Judea kia su tinalu' ni Pablo dakus pinampalaksan nilan iin, ikpagan dayun ni Pablo su penepetenen, tu'us tumiliud dadema dinilan. Kali' pektalu' si Pablo dinilan, “Naa, sa' ndi' namu duaten nu Megbebaya', metibaba' da laak niu. Naan, nda' nai sala'u dun. Mendadi genat nandaw, iin nai pegukitan ku ki nga kana' getaw Judea.” ⁷Sa' ma'nia, migawa' dayun si Pablo dia, miditu pelum balay ni Tito Justo, kana' getaw Judea laak megbasa tu Megbebaya'. Sug balayen, misaing dia simbaan nu getaw Judea. ⁸Naa si Crispo, su kaunutan di simbaan kia, mikpetuud tu Kaunutan si Isus, kampu' nu tibuuk salapenanen. Melaun dademaig duma getaw dia Corinto mikedengeg ditu talu' ni Pablo dakus mikpetuud dun, mikpebung ilan dayun tubig.

⁹Mendadi duuni gebii, mikpaita' dini Pablo su Kaunutan Megbebaya'. Kali' pektalu' dini Pablo su Kaunutan, “Naa mendadi, ndi'a mendek. Penamala megukit, ndi' mu mesikpa'ay. ¹⁰Pu' naanig duma mu. Nda'i sala tawan mekeka'id dini'a. Pu' melaun pai baalen ku piglegetawan ku dinig lunsud kini.” ¹¹Ma'antu, migbebenwa pa si Pablo dia setaun bu' ginenga', megukit di talu' nu Megbebaya' tu nga getaw dia.

¹²Mendadi su timpu ni Galio gubirnadur tindu' nu nga getaw Roma dia Grecia, ki nga getaw Judea, piksalabuukan nilan lumpakay si Pablo, pinguit nilan dayun iin tu pengukuman. ¹³Kali' ilan pektalu', "Ki getaw kini, pengmetuudanen sia su nga getaw, adun dunutan nilan kig betad mektamuy tu Megbebaya', ki binandu ditu palinta!"

¹⁴Sa' sumbag na sia si Pablo, kali' pektalu' si Galio di nga getaw Judea kia, "Ay, yamu di nga getaw Judea, sa' pinenggi' mikesala' atawaka migdupangi getaw kini, naa mesu'at da sia mektigelu diniu. ¹⁵Laak kagina piglisu'an laak ini mekatag di penggelal muka' gelal dakus palinta niu, naa yamui metau dun. Mpauku misala di ma'nia!" ¹⁶Piawa'en ilan dayun dia pengukuman. ¹⁷Ginapus dayun nu nga sakup ni Galio si Sostenes, su kaunutan di simbaan nu getaw Judea, pimbedasan nilan dayun diag lenu'an nu pengukuman. Laak nda' pengebetay ni Galio kia.

Su Kepuli' ni Pablo tug Antioquia

¹⁸Tubus itu, duuni santa' gebii migbebenwa pa dia kepetedan si Pablo. Migudas dinilan dayun miditu Cencrea, adun sumakay pangay tu Siria. Migdunut diniin si Priscila muka' si Aquila. Laak su dia pa Cencrea si Pablo, mikpekis dimpulu, tu'us pinuuden su pinasaden tu Megbebaya'. ¹⁹Naa minateng ilan diag Efeso, dia ilan dayun miksuay ni nga Aquila. Si Pablo, sumiled tu simbaan nu getaw Judea dia, migyagayaga dayun dinilan. ²⁰Ginuut nilan sia diniin ndi' pa mundas, laak nda' peliag si Pablo. ²¹Sa' migudas dinilan, laungen, "Sa' iin su mauya'an nu Megbebaya', mpuli' dau dini niu." Sa' ma'nia, suminakay na pelum genat diag Efeso.

²²Bena' minateng si Pablo dia Cesarea, tumiwad dayun ditu Jerusalem, mingumbelayan pa dia pikumpungan nu nga sakup ni Isus, dayun minundas ditug Antioquia. ²³Naa bena' minibeniben dia, mipanaw na puli' si Pablo, mingepitan diag benwa Galacia muka' Frigia, paisegenen su kesalig nu kelaun sakup ni Isus dia.

Migukit si Apolos tug Efeso muka' tu Corinto

²⁴Naa duuni getaw Judea ngalanen si Apolos, daan benwanen sug Alejandria, mitua' diag Efeso. Kini si Apolos, metau megdalan di telu'enen, muka' miulugen gupia su Misulat Talu' nu Megbebaya'. ²⁵Piktu'unan dadema dig Bianan nu Kaunutan si Isus, kaas gila'eni ginaanen megukit muka' mekpetu'un mekatag dini Isus. Lumbus metuud su gukitenen, laak daal dai misuunanen, gikteb tu kegbunag tubig piktu'un ni Juan. ²⁶Mendadi misasal megukit si Apolos dia simbaan nu getaw Judea. Laak sa' midengeg ni Priscila kia muka' ni Aquila, iwit nilan ditug balay nilan, pigiseg nilan dayuni sinuunanen mekatag dig Bianan nu Megbebaya'. ²⁷Tubus itu, pigdelendem ni Apolos dumipag

ditug benwa Grecia. Pinguliksegan nu kepetedan diag Efeso, mikpuit ilan dayun sinulat tu nga sakup ni Isus ditu Grecia, pu' adun telima'en nilan si Apolos. Naa bena' minateng dia Grecia si Apolos, su nga mikpetuud ditu sekat tu tulung nu Megbebaya', ibanganen gupia. ²⁸Pu' miulakanen talu' su nga getaw Judea, minalap tu'usen dun dia Misulat Talu' nu Megbebaya' pu' si Isus su Tindu' nu Megbebaya' Meglekaunutan.

Ditug Efeso si Pablo

19 ¹Naa selian ni Apolos dia Corinto, si Pablo, minian diag binuidan, dayun tumigbeng ditug Efeso. Bena' minateng dia, duuni nga sakup ni Isus mipekita'en. ²Kali' saak dinilan si Pablo, "Pingeputan mamu nug Balakat nu Megbebaya' sikna mikpetuud amu?"

Simbag nilan, "Baa, nda' nami medengeg pu' duunig Balakat nu Megbebaya'."

³Sinaak ni Pablo, "Naa sa' ma'nia, sa' binunagan amu tubig, ta' alanduni pituud niu?"

Kali' ilan sembag, "Pituud nami su kegbunag ni Juan tubig."

⁴Kali' pektalu' si Pablo, "Su kegbunag ni Juan tubig tu nga getaw, kitui tu'us di keksikesuun nilan. Muka' padun tinalu' ni Juan tu nga getaw Israel pu' petuuden nilan ki sungu mateng mbinaya' diniin, sa'itada si Isus."

⁵Mendadi ki nga sakup ni Isus kia, bena' midengeg nilan ki tinalu' kia ni Pablo, mikpebunag ilan puli' tubig, tu'us di kesakup nilan tu Kaunutan si Isus. ⁶Bena' dipenan ilan ni Pablo, pingeputan ilan tu'u nug Balakat nu Megbebaya'. Mikekabit ilan dayun dig lain pikebitan dakus migwali ilan talu' nu Megbebaya'. ⁷Duun saani sepulu' bu' dua' tawanig laun nilan.

⁸Tubus itu, minangay si Pablo tu simbaan nu getaw Judea, minibelu' dayun megukit tu nga getaw dia, gikteb telu bulan. Minamal megyagayaga dinilan, pingmetuudanan sia ilan mekatag di kesakup tu Keglekaunutan nu Megbebaya'. ⁹Laak sug duma dun, meketegasi gulunen, mimilas ilan, dakus piglaat telu'an nilan dia gedapan nu tibuuk pikumpulan sug Bianan nu Kaunutan si Isus. Sumiway dayun dinilan si Pablo, muka' pisuayen dadema dinilan su nga sakup ni Isus. Guminalin si Pablo ditu gusekilaan ni Tirano, gendawgendaw dayun migyaga dia. ¹⁰Iin nai migbatag sampay dua' taun, kaas su talu' nu Megbebaya', midengeg nug launan getaw dig benwa Asia kia, su nga getaw Judea sampay su nga kana' getaw Judea.

Su ngag Bata' ni Esceva

¹¹Mendadi, mekesalebu' gupiai pinggulaula nu Megbebaya' pebian dini Pablo. ¹²Su nga pegladu, sa' uiten dinilani panwilu ni Pablo atawaka ginabas penepetenen, metekaw ilan mauli'ay, dakus mautidan dinilani

menenulay. ¹³Mendadi, duuni nga getaw Judea megleepleep dig benwa megutid di menenulay, indanan da nilan dema sembayay su ngalan ni Isus. Miktalu' ilan di menenulay, “Utidan ku amu di pegbaya' ni Isus, su pegukiten ni Pablo.” ¹⁴Duuni pitu tawan mekpatad, ngag bata' nu Tampusan Metaas Belian nu getaw Judea ngalanen si Esceva, ma'antu dademai pinggulaula nilan.

¹⁵Dagid su menulay, sa' inutidan sia nu ngag bata' ni Esceva kia, miktalu' dinilan, “Si Isus, mi'ilalau, muka' si Pablo dema. Laak yamu, adin amu getaw?”

¹⁶Linumpakan dayun nu piglegetan nu menulay kiai ngag bata' ni Esceva kini, dinaagen ilan gela', mikelaguy ilan dayun diag balay kia, milebasan ilan muka' ingelan. ¹⁷Bena' misuunan nu nga getaw diag Efeso su mipenggulaula, mindek ilan gupia, su nga getaw Judea dakus su kana'. Inal dayun nu nga getaw su Kaunutan si Isus. ¹⁸Melaun mikpetuud mitua' dayun dini nga Pablo, pegukiten nilan su melaat gulaula nilan. ¹⁹Duun paduni nga mensaled, pinungun nilan su ngag libru nilan sinulat dun su nga ginis saled, sinsulan nilan dayun dia gedapan nu nga mikpetuud. Piglekwinta dayun sug laga' nu ngag libru kia, lima pulu' ngibu denario. ²⁰Ma'nia, minamal gusay mesigwag su talu' nu Kaunutan Megbebaya', ndi' megaga nu nga getaw su ginuungen.

Su Samuk tug Efeso

²¹Tubus itu si Pablo, delendemanen biananen puli' su Macedonia muka' Grecia, dayun mundas tu Jerusalem. Laung ni Pablo, “Dayun genat ditu Jerusalem, subay maita'u sug Roma.” ²²Sa' ma'nia, sinugu' ni Pablo meguna tu Macedoniaig dua' tawan megabang diniin, si Timoteo muka' si Erasto. Iin, mibilin pa diag Asia.

²³Naa di gendaw kiin, misasaw gupia sug lunsud Efeso saba' dig Bianan nu Kaunutan si Isus. ²⁴Pu' duuni getaw menensal dig bulawan selapi', ngalanen si Demetrio, megbaal balaybalay penunggilinganen sug balay pengamuyu'an dig diwata libun, ngalanen si Diana. Melaun miselapi' nu nga tinindanan ni Demetrio. ²⁵Mendadi kini si Demetrio, pinungunen su tinindananen dakus su sama menensalen, kali' pektalu' dinilan, “Yamu nga getaw, misuunan niu iini puun nu kegdatu' ta, su pendayan ta kini. ²⁶Mendadi, minita' niu dakus midengeg niu su pinggulaula ni Pablo kiin. Laungen, sug ledawan pigbaal nu kilawan, kana' tantu diwata. Melaun getaw mituudan dun, dinig Efeso sampay di tibuuk Asia. ²⁷Naa sa' ma'antu, mbuus meglaatig dengeg nu pindayan ta, muka' meglaat dadema su kegbasa nu getaw tug balay pengamuyu'an ta tu mekesalebu' diwata si Diana. Pidag pa tanan, mbuus mbeleng sug dengeg ni Diana, sug diwata pektemuyen nu tiba'an getaw dinig Asia sampay su tiba'an getaw dig dibabaw lumbang!”

²⁸Naa bena' midengeg nu nga melaun getaw ki tinalu' kia ni Demetrio, mitutung ilan gangit. Minekeg ilan dayun megbeksay, laung nilan, “Mekesalebu' diwata si Diana, su pektemuyen nu getaw Efeso!”

²⁹Misasaw dayun su tibuuk lunsud. Migdengan dayun gubek dia tebu'an su nga getaw, piminteng nilan dia si Gayo muka' si Aristarco, dua' tawan getaw Macedonia, tendug ni Pablo. ³⁰Naa si Pablo, mauya'anen sia madap tu nga getaw kia, dagid nda' begay nu nga sakup ni Isus dia. ³¹Duun dademai nga kaunutan dig benwa Asia kia, sambat ni Pablo, pimuun nilan si Pablo, ndi' na mekpaita' dia tebu'an.

³²Naa ditu tebu'an, misasaw gupia su nga getaw. Sug duma, salaig beksainen, sug duma, sala pelum, pu' su tiba'anen, duun dai misuunanen, sa' ta' alanduni pikumpungan nilan. ³³Naa duuni getaw, ngalanen si Alejandro, piadap nu nga getaw Judea. Pipengamed sia ni Alejandro su nga getaw, adun kineegan nilan sia su sembagen. ³⁴Laak sa' mi'ilala nilan pu' getaw Judea iin, mimegdengan ilan memeksay taman dua' uras, laung nilan, “Mekesalebu' diwata si Diana, su pektemuyen nu getaw Efeso!”

³⁵Mendadi tiga'wan, su sikritaryu dig lunsud kia, pipengameden su nga getaw. Kali' dayun pektalu', “Yamu nga samau getaw Efeso! Suunan nug launan getaw pu' ita nu nga getaw Efeso, itai megingat tug balay pengamuyu'an tu mekesalebu' diwata si Diana, muka' ita dademai megingat tu me'elig batu kiin milabu' genat tug langit. ³⁶Naa kagina nda'i getaw mekepemalaw dun, subay mengamed amu, pu' mbuus mekesaba' amu. ³⁷Pu' iwit niu dini kig dua' tawan kini, asa nda'i melaat gulaula nilan ditug balay pengamuyu'an ditug diwata ta, muka' nda' nilan dema tampalaksaay sug diwata ta kiin. ³⁸Naa sa' duunig dangat ni nga Demetrio, ilan nu samapandayen, naa melengas ditu nilan pengukuman dengaray, pu' duuni nga kuis dia. ³⁹Laak sa' duun pai mauya'an niu, melengas pausay niu ditu pikumpungan nu kunsial. ⁴⁰Pu' mbuus itai tempuan di keglekesasaw kini nandaw, dayun nda'iduni mesembag ta dun.” ⁴¹Bena' mideksu' su talu' nu sikritaryu, piuli'en su nga getaw mikipungun dia.

Minangay tu Macedonia muka' Grecia si Pablo

20 ¹Bena' misikpa' su kesasaw kia, si Pablo, pinungunen su nga sakup ni Isus. Mingamu' dayun si Pablo dinilan, dayun migudas dinilan muka' mipanaw pangay tu Macedonia. ²Naa selianen mian di ngag benwa di gelet Efeso muka' Macedonia, pinemalanen penguliksegay su nga sakup ni Isus dia. Ma'antu, minateng tu Grecia, ³migbebenwa dayun dia seled telu bulan. Bena' sungu sumakay si Pablo pangay tu Siria, midengegen pu' duunig delendeman nu nga getaw Judea, petain nilan iin sia. Kali' pegleketau si Pablo, miksimpuli' mian dia Macedonia.

⁴Tumindug diniin si Sopater getaw Berea, bata' ni Piro, dakus dua' tawan getaw Tesalonica si Aristarco muka' si Segundo, si Gayo getaw Derbe, dua' tawan getaw Asia si Tiquico muka' si Trofimo, dayun su tampusanen si Timoteo. ⁵Miguna ilan dinami mpanaw, pigelatan ami nilan ditu Troas. ⁶Bena' miglinggwang sug Lumpuk di Pan nda' Petulinay, suminakay ami dia Filipos. Bena' lima endaw ami meksakay, midepetan nami ilan ditu Troas. Minapit ami dayun dia laga' sala simana.

Su Tampusan Keguliug ni Pablo tu Troas

⁷Naa bena' gebii Sabadu, mikpungun ami maan dig lebungan kiin gindan di kepatay ni Isus. Si Pablo, miktitalu' di nga getaw mipungun, miniben mektalu', depet miginenga'i gebii, pu' delendemanen, mpanaw na sa' megendaw. ⁸Melaun sulu' dia sugud pikpungunan nami diag ditaas.

⁹Mendadi, duunig begu getaw pegingkud diag dungawan, ngalanen si Eutico. Bena' metaas gupiaig yaga ni Pablo, tulugen gupia si Eutico kini, mitenangan dayun muka' milabu' tu silung, genat di ketelu angka'en. Kali' nilan ingebangay, masi' minatay na. ¹⁰Dagid pinaugan dayun ni Pablo si Eutico kini, dinunggu'anen, dayunen epelay. Kali' pektalu' si Pablo tu ngag dumanen dia, “Ndi' amu melibuleng, pu' kini da su gimuuden.” ¹¹Mendadi minaik na pelum si Pablo, pimetanen su pan, dayun ilan maan. Bineeg ni Pablo megabitabit dinilan, sampay migendaw. Mipanaw dayun si Pablo. ¹²Sug begu getaw milabu', inated nu ngag dumanen tug balayen, mitubu' na. Miamu' dayun gupia su ginaa nu ngag dumanen.

Minundas si nga Pablo tu Mileto genat tu Troas

¹³Mendadi iini sabut nami, meguna ami sumakay tug Ason, dayun si Pablo, sumakay sa' mateng dia. Pu' daniin, mian dig lupa'an. ¹⁴Naa bena' mipekita' nami tu'u si Pablo diag Ason, pisakay nami, dayun ami mundas pangay tu Mitilene. ¹⁵Genat tu Mitilene, suminakay ami puli', dayun sendaw pa, minateng ami ditu Quio. Bena' sala gendaw na pelum, duminggu' ami ditu Samo. Di kedua' endawen, midepet ami ditu Mileto. ¹⁶Pu' delendeman ni Pablo, liaun nami sug lunsud Efeso, adun ndi' ami melangan dia prubinsya Asia. Pu' megdedali' si Pablo, taginaanen mateng ami sia ditu Jerusalem, megdeksu' sug Lumpuk Pentecostes.

Su Talu' ni Pablo Pingumbilinen tu nga Kaunutan nu Sakup diag Efeso

¹⁷Naa si Pablo, su diin pa Mileto, mimuun tu nga kaunutan di pikumpungan nu nga sakup ditug Efeso, sinabinen ilan. ¹⁸Naa bena' minateng ilan, kali' pektalu' si Pablo dinilan, “Naa mendadi, kig betadu saanan ku dumuma diniu genat tu gendaw nu kedadengu dini prubinsya

Asia, misuunan na niu gupia. ¹⁹Pinuudu su sugu'an nu Kaunutan Megbebaya' dinaan. Minegdu' pati'ig lua'u, pibaba'uib lawasu, saanan migleginis su kengindan dinaan sekat di kegleget dinaan nu nga getaw Judea. ²⁰Misuunan da niu dema pu' gila'u telu'ay diniu su mpianan amu dun, piktitulu'an ku amu di gedapan sampay ditu ngag balay niu. ²¹Su nga getaw Judea mesama su kana', mikpegadu dinilan pu' subay meksikesuun ilan, subay lumingay ilan tu Megbebaya' muka' sumalig tu Kaunutan ta si Isus."

²²Laung ni Pablo, "Mendadi, mangay nau tu'u tu Jerusalem, penuuden ku su sugu'an dinaan nug Balakat nu Megbebaya'. Naa ndi'u suunan ki mpenggulaula dinaan sa' matengu ditu. ²³Suunan ku laak su pigad dinaan nug Balakat nu Megbebaya' pu' medetengan ku tu kelaun lunsud mbianan ku, pirusuunu dia muka' peglegetanu. ²⁴Dagid danaan, ndi'u petailen su ketubu'u, bilangen ku nda'i gatagen, sa' laak mpenuudu ki sinugu'an dinaan, megela'u tubusay su pibaal dinaan nu Kaunutan ta si Isus, sa'itada su kegukitu di Gempia Petenday mekatag di tulung nu Megbebaya'."

²⁵Kali' padun pektalu' si Pablo, "Naa mendadi naan, miglepleepu diniu, migukitu diniu mekatag di kesakup tu Keglekaunutan nu Megbebaya'. Mendadi, misuunan ku pu' pia sala tawan diniu, ndi' na niau pelum mpekita' puli'. ²⁶Kaas paladpalad taman talu'u diniu nandaw, sa' duun diniui mbeleng tug linaw gapuy, kana' na danaan sala'. ²⁷Pu' kiin, gila'u pesuun diniu su tibuuk delendeman nu Megbebaya'. ²⁸Kaas talentenay niu ki ndi' mpalini kekpetuud niu, muka' talentenay da niu dema su nga samasakup niu, su pibaya' diniu nug Balakat nu Megbebaya'. Ingatay niu su nga maa' karniru nu Megbebaya', su binaalen piglegetawanen pebian di keganti' dun nu ginaa nug Bata'en. ²⁹Naa misuunan ku sa' megawa' nau diniu, duun dayuni lumamug diniu nga malig metetubu' mendapa' di karniru, ndi' nilan lelaatan su nga karniru nu Megbebaya'.^m ³⁰Duun dademai nga samasakup niu mekpetu'un diniu melaat, adun sia pesuain nilan su nga sakup ni Isus, mesakup nilan dayun. ³¹Kaas peglengilam amu, muka' ndi' niu selingaway pu' gebii gendaw seled telu taun, miktitulu'u diniu sampay minegdu'ig lua'u."

³²Mendadi, diksu' na ni Pablo su talu'en, laungen, "Mendadi nandaw, saligu namu ditu Megbebaya' muka' ditu pitenday diniu mekatag di tulungen, su mekpaiseg tu kekpetuud niu muka' megbegay diniu kepianan pitengeden di nga kelaun pinaas piglegetawanen. ³³Su kegдумau diniu, nda'u mayak tu ga'us nu getaw, pia su kwartanen bulawan atawaka pelata sampay su penepetenen. ³⁴Suunan niu pu'

^m 20:29 Ki nga malig metetubu' mendapa' di karniru, piulugan dun ni Pablo ki nga mekpetu'un dig balus.

pikula'an gulasu, adun naani meksukat tu ketubu'an ku muka' tug danu ngag dumau. ³⁵Su kelaun pinggulaulau, pinita'u dun diniu pu' subay meglasay ita adun mebangan ta su nga ndi' mekegaga. Pu' subay ndi' ta selingawan su tinalu' kiin nu Kaunutan si Isus, laungen, 'Ki getaw megbegay, iini liliag, batul nu getaw begayan.' ”

³⁶Bena' mideksu' telu'ay ni Pablo, migela' ilan dayun menginlulud muka' menenabi. ³⁷Mikengaduy dayun su nga kelaun dumanen, dunut ipel nilan si Pablo muka' pingelekan nilan. ³⁸Iini miuba' ilan dun pati', pu' saba' nu tinalu' ni Pablo kia pu' ndi' na nilan puli' mpekita'. Inated nilan dayun ditug bangsa'en si Pablo.

Su Kepanaw ni Pablo tu Jerusalem

21 ¹Naa dekap ami migudas, suminakay ami, minandeng ami dumipag ditu Cos. Bena' migendaw, minundas pami ditug Rodas. Genat dia, minundas ami ditu Patara. ²Dia Patara, mibaangan namiig bangsa' pegangay tu Fenicia, suminakay ami dayun. ³Bena' midayag namii pulu' Cipre, luminiku' ami dapit lintu, minundas ami dayun ditu Siria. Duminggu' ami dia Tiro, pu' duunig lulan pelusaden dia. ⁴Pinengaw namii nga mikpetuud dia, pitu gebii ami dayun minapit dia nilan. Naa duuni nga sakup dia, ginuungan ilan puun tug Balakat nu Megbebaya', kaas minegul ilan dini Pablo pu' ndi' na mundas tu Jerusalem. ⁵Dagid bena' mipapasi guliug nami dinilan, migudas ami, pu' minundas ami gusay. Launan nilan, migela' ilan dumunut dinami diag liu nug lunsud, kampu' nu nga sawa nilan muka' bata' nilan. Minginlulud ami dayun dia pentad dagat menenabi, ⁶dayun ami megudas. Bena' suminakay ami, minuli' ilan dema.

⁷Mendadi genat dia Tiro, minundas ami ditu Tolemaida. Linaawan nami su kepetedan dia, sendaw ami mingumbalay dia nilan. ⁸Bena' migendaw, sumikat ami pelum, minundas ami ditu Cesarea. Bena' minateng ami dia, mingintulugan ami dayun ditug balay ni Felipe su megukit di Gempia Petenday, sala tawan di pitu tawan kiin pimili' kanugdiin dia Jerusalem mekilas di ketubu'an. ⁹Duuni paat tawan bata' ni Felipe lumbus delaga, metau ilan megwali di talu' nu Megbebaya'. ¹⁰Mendadi, selian nami dia nga santa' gebii, duuni getaw tumigbeng dia genat tu Judea, ngalanen si Agabo, pimuunan dadema nu Megbebaya'. ¹¹Mikpesempel dinami si Agabo kia, inalapen sug baling ni Pablo, iin dayuni binaluden dig baingkenen muka' di gek suden. Kali' pektalu', “Kinii tinalu' nug Balakat nu Megbebaya'. Ki gapu' nug baling kini, ma'nini'i kegbalud diniin nu getaw Judea dia Jerusalem, dayun nilan pegwekilay tu nga kana' getaw Judea.”

¹²Bena' midengeg nami ki tinalu' kia ni Agabo, ginuut nami sia si Pablo, yami nu kepetedan dia, pu' ndi' sia mundas ditu Jerusalem.

¹³Dagid sumimbag si Pablo, “Mauma dema ini, mingaduy mamu muka' piuba' niui ginau? Naan kini, minuya' nau, sa' kana' laak pikutanu dia Jerusalem, pia matayu dia saba' nu kesakupu tu Kaunutan si Isus.”

¹⁴Mibulugan laak ami megleguut dini Pablo, misikpa' nami. Laung nami dayun, “Adin sug liagan nu Kaunutan Megbebaya', iini penuuden.”

¹⁵Tubus itu nda' maiben, mingikpes ami, minundas ami dayun tu' u pangay tu Jerusalem. ¹⁶Duuni nga sakup dia Cesarea migdunut dinami, inated ami nilan ditug balay ni Masun, getaw Cipre, pu' pektulugan namiig balayen. Miniben na si Masun mikpetuud.

Kuminita' dini Santiago si nga Pablo

¹⁷Mendadi su kedadeng nami ditu Jerusalem, didialan ami gupia nu kepetedan dia. ¹⁸Bena' migendaw, minangay ami ni Pablo kumita' dini Santiago, mikpungun dadema dia su kelaunan kaunutan di pikumpulan nu nga sakup. ¹⁹Bena' mitubus ilan ni Pablo pegbesaay, gila'en gupia ukitay dinilan su kelaun pinggulaula nu Megbebaya' di nga kana' getaw Judea pebian diniin. ²⁰Bena' midengeg nilan, inal nilan su Megbebaya'. Kali' ilan pektalu' dini Pablo, “Uu Mingumpated Pablo, misuunan mu pu' kana' laak santa' ngibu tawani sama ta getaw Judea mikpetuud na. Ilan, minimal pailan dumunut tu Palinta nu Megbebaya' pisulaten dini Moises. ²¹Dagid duuni pisuun dinilan daw pu' piku'unan mu daw su kelaun getaw Judea megbenwa dig lain benwa, belengen daw nilan ki Palinta kia, ndi' mu na daw pesirkunsisu su ngag bata' nilan, muka' ndi' mu ilan daw pedunuten tug betad nu getaw Judea. ²²Naa enduta'en ta ma dun? Pu' gempantek, medengeg pa nilan su kedadeng mu dini. ²³Mendadi danami, melengas pema'nini' mu. Duuni paat tawan kini, duuni pinasad nilan ditu Megbebaya'. ²⁴Melengas dumunuta dinilan mangay mekanu, pekanu amu dayun adun mawa' su kelemu'ay niu, dayun ya'ai gumastu dun sa' mekpekis ilan dimpulu nilan. Sa' ma'nia, mesuunan dayun nug launan getaw pu' su midengeg nilan mekatag dini'a, nda'i metuud dun, pu' ya'a, dinunutan mu dadema su Palinta ni Moises. ²⁵Laak ki nga kana' getaw Judea kia mikpetuud na, piwitan nami ilan surat, adun mesuunan nilan sug delendeman nami pu' ndi' mpia aanen kig betang ginilak dig ledawan, sampay sug dugu' muka' su pinatay dig lengek. Muka' pegliaun nilan kig dusa.”

²⁶Mendadi kini si Pablo, duminunut tu'u di nga paat tawan kia. Bena' migendaw, mikanu ilan tu'u adun mawa' su kelemu'ay nilan. Dayun sumiled si Pablo tu Penedapan tu Megbebaya', adun siudenen su gendaw nu keapas nu kelemu'ay nilan, pu' ilakan dayun betangig lawas nilan.

Dinaap si Pablo dia Penedapan tu Megbebaya'

²⁷Mendadi bena' sungu mpapasi pitu endaw, duuni nga getaw Judea genat tu prubinsya Asia, minita' nilan si Pablo dia Penedapan

tu Megbebaya'. Sinasaw nilan dayun su nga melaun getaw, muka' ginapus nilan si Pablo. ²⁸Mimeksay ilan, laung nilan, “Uy, yamu getaw Israel! Ebangay niu ami! Pu' ki getaw kini, iin su migleleep dig benwa mekpetu'un di tiba'an getaw adun meksudi' ilan dinita nu getaw Judea muka' meksudi' dailan dema di Palinta ni Moises sampay di Pengedapan kini tu Megbebaya'. Pidag pa, duuni nga kana' getaw Judea giwiten dini Pengedapan tu Megbebaya', milemu'an dun ki pinaas Pengedapan kini.” ²⁹(Ini tinalu' nilan dun ma'antu, pu' mundiin, minita' nilan si Trofimo, getaw Efeso, tumindug dini Pablo diag lunsud, kaas laung nilan dun, iwit ni Pablo suled dia Pengedapan tu Megbebaya'.)

³⁰Misasaw dayun su tibuuk lunsud Jerusalem. Mibalu' dayun dia Pengedapan su kelaun getaw, ginapus nilan si Pablo, biniglas nilan dayun diag liu nu Pengedapan, tinakep dayun su genga'anen. ³¹Bena' petain na nilan sia si Pablo, inukitan su kaunutan nu kelaun sundalu pu' misasawi tibuuk Jerusalem kia. ³²Iin, suminambut dayun mekpungun sundalu muka' nga kaunutan nilan, minggebek ilan dayun dia tebenan getaw. Bena' minita' ilan nu nga melaun getaw kia, miksikpa' ilan membadas dini Pablo. ³³Mikpesempel dayun dini Pablo su kaunutan kia nu kelaun sundalu, dinaapen dayun si Pablo muka' sinugu'en beluden kadina dua' buuk. Sinaak dayun nu kaunutan, “Adin getaw ini kini, muka' ta'i sala'en?” ³⁴Sug duma getaw, salai telu'enen, sug duma, sala pelum. Bena' ndi' melaam nu kaunutan sundalu su metuud saba' nu sasak nilan, sinugu'en uiten si Pablo diag balay sundalu. ³⁵Bena' minateng ilan dia tugda' egdan, subay sinipit si Pablo nu nga sundalu, pu' mbuus mesaba' nu nga getaw misasaw. ³⁶Migela' dailan gusay meglendug, kali' ilan pemeksay, “Petain! Petain!”

Sumimbag si Pablo

³⁷Naa sa' sungu na peseleday si Pablo diag dialem balay, sinaaken di kaunutan kia, “Megdadi sa' duuni telu'en ku dini'a?”

Laung dayun nu kaunutan, “Aw, metawa mektalu' pikebitan nu getaw Grecia? ³⁸Masi' kana'a nu getaw Ehipto kitu, su mingatu di gubirnu sug diin, dayun inagaken tug limawa' su paat ngibu tawan kitu, lumbus memunu'an?”

³⁹Kali' sembag si Pablo, “Naan, getaw Judea mau, daan benwau su Tarso, sakup Cilicia, sakupu di gembagel lunsud. Naa penengiin ku dini'a sa' megdadi, megyaga pau di nga getaw kini.”

⁴⁰Bena' mibuka' nu kaunutan, migindeg si Pablo dia gegdan, pipengameden su nga getaw. Bena' mingamed ilan, miktalu' si Pablo dinilan di Hinebreo.

22 ¹Kali' pektalu' si Pablo, “Yamu nga Mekegulang muka' yamu nga Mingumpated, kelelaat kineegay niu ki sembagu kini! ²Bena'

midengeg nilan si Pablo megyaga dinilan di pikebitan nilan Hinebreo, labi nailan miamed. Kali' gusay pektalu' si Pablo,

³“Mendadi naan, getaw Judea mau, migigetawu tu Tarso sakup Cilicia, laak diniinu Jerusalem mibagel. Piktu'unanu ni Gamaliel, piktu'unen gupia dinaan su Palinta dinunutan nu ginepu'ay ta. Minamalu mekpetuud ditu Megbebaya', ma'niin nu kenamal niu mekpetuud dun, launan niu dini nandaw. ⁴Piglegetan ku su nga sakup nug Bianan kiin sampay ginaa nilan. Pimbaludu ilan muka' pinirisuu, libun laki. ⁵Meketakesi' dun ki Tampusan Metaas Belian muka' su tibuuk Pikumpungan nu Metaas Gukum kini. Pu' bigayanu nilan sulat uiten ku sia tu kepetedan ta ditug Damasco. Sa' ma'antu, mipanawu tu'u pangay ditu, pu' adun daapen ku pa pagid sia su nga sakup ni Isus dia, pembeluden ku ilan sia muka' pengeteden ku dini Jerusalem, adun ukumen ilan.”

Inukit ni Pablo su Kesakupen dini Isus

(Pinggulaula 9:1-19; 26:12-18)

⁶Pibundas gusay ni Pablo su talu'en, laungen, “Mendadi saba'u mpanaw, bena' sunguu mesebang diag Damasco, mabu' taasendaw saan, mitiaganu tekaw tiag genat tug langit. ⁷Mibelilidu dayun tug lupa'. Duun dayuni midengegu tingeg, laungen, ‘Uu Saulo! Mauma dema peglegetan mau?’ ⁸Kali'u sembag, ‘Ta' taway dun ka?’ Kali' pelum sembag, ‘Naan si Isus, getaw Nazaret, ki peglegetan mu.’

⁹“Naa ki tiag kia,” maa' laung padun ni Pablo, “minita' nu nga tendugu, laak nda' nilan medengeg su talu' nu mikabit dinaan. ¹⁰Sinaaku dayun, ‘Mekenduta' mau dun, uu Kaunutan?’ Kali' sembag dinaan su Kaunutan, ‘Pegbuata, bundasa diag Damasco, dayun sa' mateng ka dia, telu'en dini'a ki kelaunan tindu' dini'a baalen mu.’” ¹¹Laung ni Pablo, “Naa kagina minlamengi pegbantayu saba' nu tiag kia, inulipitu laak nu ngag dumau kia mundas diag Damasco.

¹²“Naa duuni getaw diag lunsud kia ngalanen si Ananias, megbasa tu Megbebaya', mekesuun getaw, pu' dinunutanen gupia su Palinta ni Moises. Kini si Ananias, pegbesaan gupia nug launan getaw Judea pegbenwa diag Damasco. ¹³Iini mitua' dinaan, migindeg dia gupidu, kali' pektalu' dinaan, ‘Uu Mingumpated Saulo, mekengita'a na!’ Mitekawu dayun mekengita', minita'u dayun iin. ¹⁴Kali' pektalu' si Ananias, ‘Su Megbebaya', su pektemuyen nu ginepu'ay ta, tindu'a niin adun pesuun dini'a kig delendemanen, dakus maita' mu ki mekesuun Sesugu'enen kiin sampay medengeg mui tantu tingegen. ¹⁵Pu' ya'a dayuni tumakesi' diniin tu tiba'an getaw, iini ukiten mu su minita' mu muka' su midengeg mu. ¹⁶Mendadi, ta' mai kelangan ta kini? Pegbuata, bunagan ka tubig, maugasan dayun su sala' mu puun tu kengamu' mu diniin.’”

Su Kektendu' dini Pablo Megukit tu nga Kana' Getaw Judea

¹⁷Laung padun ni Pablo, “Naa bena' mipuli'u dini Jerusalem, selian ku menenabi ditu Penedapan, duuni pinita' nu Megbebaya' dinaan, ¹⁸masi'

su Kaunutan si Isus, tinalu'en dinaan, 'Pegdedali'a megawa' di Jerusalem, pu' su takesi' mu mekatag dinaan, ndi' duaten nu nga getaw dini.'

¹⁹“Kali'u sumpat, 'Laak dagid uu Kaunutan, su getaw dini Jerusalem, misuunan nilan gupia pu' su mikpetuud dini'a, dinaapu ilan dia nga simbaan nu getaw Judea, pinikutan ku ilan dayun muka' pibadasu. ²⁰Muka' padun su kebunu' dini Esteban su tuminakesi' dini'a, naan, diaanu pegindeg, sinangu'u su kebunu' dun, pegingaten ku su nga penepeten nu nga mikpatay dun.’”

²¹“Dagid tinalu' dinaan nu Kaunutan, 'Panawa. Sugu'en ku ya'a mpanaw tu melayu' benwa, ditu nga kana' getaw Judea.’ ”

²²Mendadi piktalenten nu nga getaw si Pablo, gikteb laak tu tinalu'en kia pu' sinugu' iin meditu nga kana' getaw Judea. Dagid bena' midengeg nilan itu, minekeg ilan pati' memeksay, laung nilan, “Petaini getaw kiin! Kana' bantang metubu' dig dibabaw lumbang!” ²³Minamal ilan memeksay, migekepasekpas ilan penepeten nilan dakus mikpalintuk ilan lupa'. ²⁴Su kaunutan nu kelaun sundalu, sinugu'en peseleden si Pablo diag balay kia muka' petuga'en sia dig badas, pu' adun mesuunan nilan su pikpuunan nu kemeksay nu nga getaw mekatag diniin.

²⁵Dagid bena' binalud nilan si Pablo adun bedasen, laung ni Pablo ditu kaunutan di sundalu pegindeg dia, “Ki getaw sakup Roma, kana' ba kuntra bala'ud petuga'en, sa' nda' pa ukumay?”

²⁶Bena' midengeg nu kaunutan kia, linaawanan su kaunutan nu kelaun sundalu. Kali' saak diniin, “Paa, ta' maig baalen mu kiin? Ki getaw kiin, sakup Roma ma!”

²⁷Mikpesempel dayun dini Pablo su kaunutan nu kelaun sundalu kia, kali' saak diniin, “Naa metuud ba, sakupa Roma?”

Simbag ni Pablo, “Iin da.”

²⁸Laung nu kaunutan, “Ki kebaluyu sakup Roma, gembagel gupiaig binayadu dun.

“Dagid naan,” maa' laung ni Pablo, “sikna na migigetawu.”

²⁹Migdedali' dayun megawa' dia su nga mekpetuga' sia dini Pablo. Su kaunutan kia, bena' misuunanen masi' mipebaludeni sakup Roma, mindek dema.

Minadap si Pablo tu Pikumpungan nu Metaas Gukum nu Getaw Judea

³⁰Naa su kaunutan kia nu kelaun sundalu, mauya'anen mesuunanen tantu su pikpuunan nug dinangat nu getaw Judea mekatag dini Pablo. Mendadi bena' migendaw, piubadan nu kaunutan si Pablo, muka' pisabinen su nga kaunutan nug belian muka' su tibuuk Pikumpungan nu

ⁿ 22:20 Piulugan dun ni Pablo, sa' mesima' nu getaw Jerusalem sug begu betaden mekesuun, mabu' metuudan ilan tu pengukitene dinilan mekatag dini Isus.

Metaas Gukum nu getaw Judea. Piateden dayun si Pablo, pi'indegen dia gedapan nilan.

23 ¹Mendadi, kini si Pablo, pingenglananen su nga Metaas Gukum kia, kali' pektalu' dinilan, “Genat kaika'ayu sampay nemun, nda'i pegbiksu'an ku di gedapan nu Megbebaya!” ²Bena' midengeg nu Tampusan Metaas Belian, si Ananias, tinalu'en dayun di nga sakupen pegindeg dia gupid ni Pablo, depi'en nilan sug baba' ni Pablo. ³Laung ni Pablo tu Metaas Belian, “Ya'a kiin, tautawa da mekesuun, ukuman ka pa nu Megbebaya! Mauma mingkuda kiin mengukum dinaan mekatag di Palinta ni Moises, asa ya'a, mimilasa dun, pu' pidapi' mau?”

⁴Laung dayun nu nga getaw pegindeg dia gupid ni Pablo, “Penampalaksan mu masi' ki Tampusan Metaas Belian?”

⁵Kali' sembag si Pablo, “Aw, yamu kepetedan ku, nda'u mesuunay pu' iini Tampusan Metaas Belian. Pu' sinulat ditu Misulat Talu' nu Megbebaya', laung, ‘Subay ndi' mu tampilkan su kaunutan niu.’”

⁶Mendadi misima' ni Pablo pu' sug duma getaw dia, Saduseo ilan, dakus duun dademai nga Pariseo. Minekeg dayun mektalu' si Pablo dinilan, “Yamu kepetedan ku getaw Israel! Naan, Pariseo mau, bata'u dema Pariseo. Dayun nandaw, miukum niau pelum saba' nu kekpedatengu dun pu' metubu' puli' su nga minatay!”

⁷Lemen laak mideksu' telu'ay ni Pablo, mimeksual dayun su nga Pariseo muka' su nga Saduseo, miksimawi' su pikumpulan nilan kia. ⁸(Pu' su nga Saduseo, telu'en nilan pu' ndi' metubu' puli'i getaw, muka' ndi' nilan petuuden pu' duuni sesugu'en nu Megbebaya' getaw langit, sampay diwata. Laak sug launanen kia, mituudan dun gela' su nga Pariseo.) ⁹Mendadi, minimal dayuni kesasaw. Duuni nga mekpetu'un di Misulat Palinta nu Megbebaya' migindeg dia gedapan nilan, Pariseo ilan. Miglegintuud ilan dayun, laung nilan, “Ki getaw kini, nda'iduni mesima' nami sala'en! Mabu' duun daani getaw langit atawaka diwata mikabit diniin!”

¹⁰Milebian dayuni kesasaw nu nga getaw, mindek dayun su kaunutan nu kelaun sundalu, mbuus peksibintengan nilan si Pablo. Sinugu'en dayuni nga sundalu menaug dia piktebenan getaw, adun ui'en nilan dinilan si Pablo, eteden nilan puli' ditug balay nu nga sundalu.

¹¹Naa bena' migendaw, dayun miglegebii, su Kaunutan Megbebaya', masi' migindeg dia gupid ni Pablo muka' miktalu' diniin, laungen, “Ndi'a mendek! Tuminakesi'a dinaan dini Jerusalem, ma'nia dadema su ketakesi' mu ditu pagid Roma.”

Su Sabut Binaan sia si Pablo

¹²Naa bena' migendaw na pelum, duuni nga getaw Judea mikpungun, miksabut ilan, suminapa ilan tu Megbebaya', ndi' daw ilan maan muka'

ndi' ilan minum, subay binesaan nilan pa si Pablo. ¹³Kana' da paat pulu' tawan ilan ki miksabut kia. ¹⁴Mendadi ilan kini, minadap ilan tu nga kaunutan nug belian dakus su ngag duma kaunutan nu getaw Judea, kali' ilan pektalu' dinilan, “Suminapa ami tu Megbebaya', ndi' nami inaman su gaan, taman ndi' nami mpatay si Pablo. ¹⁵Mendadi, yamu kampu' nu Pikumpungan nu Metaas Gukum, melengas pemuun niu tu kaunutan nu kelaun sundalu nu nga getaw Roma, pateden diniu si Pablo. Pemuun niu diniin pu' saakan niu daw si Pablo mekatag dig dangat diniin. Dagid dekag pa mesebang diniu si Pablo, yami kini, minuya' nami mengapa' diniin petayay.”

¹⁶Dagid duuni manak ni Pablo, bata' nu pateden libun, midengegen sug delendeman nilan kia pegepa'en nilan si Pablo. Iin, miditu dayun balay nu nga sundalu, inukiten dayun dini Pablo. ¹⁷Miksabi dayun si Pablo sala tawan sundalu, laungen dayun diniin, “Ated mui gembata' kini ditu kaunutan niu, pu' duuni telu'enen diniin.” ¹⁸Kali'en egakay ditu kaunutan, laung nu sundalu, “Sinabiu ni Pablo, ki pinikutan kia, sinugu'u niin uiten dini'a ki gembata' kini, pu' duun daw telu'enen dini'a.”

¹⁹Inulipit dayun nu kaunutan su gembata' kia, pisuayen di melayu'layu', sinaaken dayun diniin, “Naa, alanduni telu'en mu dinaan?”

²⁰Kali' sembag su gembata', “Su getaw Judea daw, miksabut ilan ubugen daw nilan dini'a lema', si Pablo kiin, pated mu ditu gedapan nu Pikumpungan nu Metaas Gukum, pu' tautau saakan pa nilan daw. ²¹Laak kelelaat dini'a daw, ndi' mu ilan petuuday, pu' kana' da paat pulu' tawan ilan daw, mingandam ilan mengapa' dini Pablo. Suminapa ilan ndi' ilan maan muka' ndi' ilan minum, gekteb ndi' pa nilan mpatay si Pablo. Naa minuya' na daw ilan, pegelatan daw nilan laak su kesugu' mu dun.”

²²Piawa' dayun nu kaunutan su manak ni Pablo kia. Laak tinalu'en pa diniin, “Nda'i ukitan mu dun, pia sala tawan, pu' pisuunan mau dun kini.”

Pigwakil si Pablo tu Gubirnadur si Felix

²³Naa su kaunutan nu kelaun sundalu kia, miksabi dua' tawan sundalunen, kali' dayun pektalu' dinilan, “Pepengandam niuig dua' gatus tawan sundalu adun mangay ilan tu Cesarea, duma nilani pitu pulu' tawan sundalu sumakay kebayu' muka' dua' gatusi meguit teliaman. Sekat amu buus medalemdalem nai gebii. ²⁴Andam da niu demai kebayu' sekayan ni Pablo, dayun ingat niu gupia iin, ated niu ditu ni Gubirnadur Felix. ²⁵Suminulat dayun dini Felix su kaunutan sundalu, ma'nini'.

²⁶“Ditu ni'a, pegbesaan Gubirnadur Felix, naani mikpesulat dini'a, si Claudio Lisias. Gempia gendaw dini'a. ²⁷Mendadi ki getaw kini piwitu dini'a, dinaap nu nga getaw Judea, dayun sa' sungu nilan petayay, misepenan ku ilan. Naa pisuun dinaan pu' sakup Roma iin, kaas piawi'u

di nga sundalu kia. ²⁸Piatedu dayun tu Pikumpungan nu nga Metaas Gukum nilan, adun mesuunan ku tantu sug dangat nilan diniin. ²⁹Naa misuunan ku dayun, nda'iduni sala' nu getaw kiin laga' na ginaanen atawaka pirusuun laak. Kig dinangat nilan, masi' piglisu'an nug danilan palinta. ³⁰Naa bena' pisuun dinaan pu' duuni sabut nu getaw binesaan nilan sia si Pablo kiin, nda'u lenganay pated dini'a iin, pimuun ku tu ngag dumangat dun, subay dengaten nilan di gedapan mu. Daal daitu.”

³¹Mendadi, dinunutan dayun nu nga sundalu su sinugu' nu kaunutan nilan kia. Inated dayun nilan si Pablo tug Antipatris gebii kia. ³²Bena' migendaw na, su sala penunan sundalu laak mpanaw, miksimpuli' nailan tug balay nilan dia Jerusalem, binilin nilan su nga sundalu sumakay pelum di kebayu', ilani mundas megated dini Pablo. ³³Bena' minateng ilan tu Cesarea, pigwakil nilan si Pablo ditu gubernadur muka' bigay nilan diniin su sulat kia. ³⁴Bena' mibasa nu gubernadur, sinaakanen si Pablo sa' ta' prubinsyaay dunig daan benwanen. Bena' misuunanen pu' daan benwanen su Cilicia, ³⁵laungen dini Pablo, “Kineegan ku ki sembag mu sa' mateng su ngag duminangat dini'a.” Sinugu'en dayun pegingaten si Pablo tug balay nu gubernadur si Herodes.

Dinangat nu nga Getaw Judea si Pablo

24 ¹Genat itu bena' lima gebii, tumigbeng dia Cesarea su Tampusan Metaas Belian si Ananias, dumaneni nga kaunutan nu getaw Judea muka' sala tawani gabugadu, ngalanen si Tertulo. Mendadi, bena' minadap ilan ditu gubernadur si Felix, binuka' nilan dayun kig dangat nilan dini Pablo. ²Bena' sinabi si Pablo, dinangat dayun ni Tertulo, kali' pektalu',

“Uu pegbesaan Felix! Melinaw gupiaig benwa nami nemun mikpuun di kelengas nu keguit mu tug benwa. Melaun dademai kepia mu di nasud nami. ³Mendadi, liliag ami tu kelaun kepia mu kia, kaas mikpaladpalad ami dini'a. ⁴Naa adun ndi'a melangan dinami kini, penengiin ku dini'a, kelelaat kineegay mui talu' nami kini dedeli'en nami talu' dini'a. ⁵Ki getaw kini, batik nami dun mekesasaw di nga getaw, pisamuken su nga getaw Judea di tibuuk lumbang, iin dadema su kaunutan di pikumpungan Nazareno kiin. ⁶Naa bena' peglemu'anen sia su Penedapan tu Megbebaya' ditu Jerusalem, dinaap nami, [adun ukumen nami sia mekatag di Palinta nami. ⁷Dagid mitua' su kaunutan nu kelaun sundalu, si Lisias, pinendegen pati' ui'ay dinami si Pablo kini. ⁸Dayun sinugu' ni Lisias, madap dini'a su nga duminangat dun]. Naa sa' saakan mu, mesuunan mu gupia diniin sug launan puunan nug dangat nami kini diniin.” ⁹Su nga getaw Judea, sinangu' da nilan dema kig dinangat kia dini Pablo, piglegintuud nilan gela'.

Sumimbag si Pablo di Gedapan ni Felix

¹⁰Mendadi kini si Pablo, tindu' na nu gubernadur sumbag. Kali' pektalu' si Pablo,

“Mendadi, uu pegbesaan Felix, liliagu sumbag dini'a, pu' suunan ku pu' miniben ka meglegukum di nasud nami. ¹¹Naa melemu mu mesima' su metuud, pu' nandaw, sepulu' bu' dua' gebii laak genat di kedituun ku Jerusalem adun mektamuy. ¹²Naa ki nga getaw Judea kini, nda'u nilan maita' meksual di getaw dia Penedapan tu Megbebaya', nda'u nilan dadema maita' mekpesasaw tu nga getaw dia nga simbaan nilan, pia adin diag lunsud kia. ¹³Muka' padun ndi' nilan mpaita' kig dangat nilan nandaw dinaan, nda'i petu'usan nilan dun dini'a. ¹⁴Laak naan, engkenen ku gupia dini'a, ndi'u pegbuniini gikteb nu kektamuyu tu Megbebaya' piktamuy nu ginepu'ay nami, pektemuyen ku iin pebian dig Bianan piningalan dun nu nga getaw Judea kini su piksuayan betad. Asa mekpetuudu gusay dig launan Palinta nu Megbebaya' pisulaten dini Moises muka' tu ngag duma pimuunanen dengantu. ¹⁵Mendadi, kinii pedetengen ku tu Megbebaya', metubu' puli' su nga getaw, su mekesuun sampay su mikesala', iin dadema su pedetengen nu nga getaw Judea kini. ¹⁶Kagina ma'antu, gela'en ku namali ginaw di nda'i kegbiksu'u di gedapan nu Megbebaya' sampay di gedapan nu getaw.”

¹⁷Pibundas gusay ni Pablo su talu'en, “Mendadi, bena' duuni santa' taun, minuli'u ditu Jerusalem adun uiten ku su kwarta gabangu tug bansau, muka' adun mekanuu tu Megbebaya'. ¹⁸Saanan ku dia, mitaanganu nu nga getaw Judea, mitubusu mekanu dia Penedapan tu Megbebaya', nda'i pinungun ku getaw muka' nda' dademai kesamuk. ¹⁹Laak duuni getaw Judea genat tug Asia mikaita' dinaan dia, melengas ilan siai dumangat dinaan di gedapan mu, sa' pinenggi' duunig dangat nilan. ²⁰Atawaka ki nga getaw Judea kini, melengas telu'en nilan su misima' nilan sia sala'u, su dinangatu nilan ditu gedapan nu Pikumpungan nu Metaas Gukum. ²¹Mabu' iin laaki metuud, saanan ku megindeg dia gedapan nilan, minekegu mektalu', laung ku, 'Inukum niau nandaw saba' kekpētuudu dun pu' metubu' puli' su nga minatay.' ”

²²Mendadi si Felix, linanganen dayun su gukumanen, pu' duuni misuunanen mekatag dig Bianan kia. Laung ni Felix di nga getaw Judea kia, “Sa' mateng na su kaunutan nu kelaun sundalu si Lisias, ukumen ku naig dinangat niu kini.” ²³Sinugu'en dayun su kaunutan di sundalunen, ingaten pa nilan si Pablo, laak taang dun, pegua'en da nilan, muka' suangen dadema pegebanan si Pablo nu nga sambaten.

Minadap si Pablo dini Felix muka' dini Drusila

²⁴Naa duuni santa' gebii, si Felix, mitua' na pelum dia, ilan nu sawanen si Drusila, getaw Judea. Piangay dayun ni Felix si Pablo, kineeganen dayun su tinalu' ni Pablo mekatag di kekpētuud dini Kristu Isus. ²⁵Dagid bena' duunig yaga ni Pablo mekatag di kekesuun muka' tu kegbena'beni' di gayak sampay mekatag di Gendaw nu Kengukum

nu Megbebaya' di tiba'an getaw, mindek si Felix, laungen dini Pablo, “Pegbuata na deli'. Sebiin ku da ya'a sa' nda' nai kelangan ku.” ²⁶Sala pa delendeman ni Felix, ganguten dun sia lekaten ni Pablo kwarta sug lawasen, kaas tatapen sebiay megabitabit si Pablo.

²⁷Laak bena' mipapas naig dua' taun, suminukli pelum dini Felix gubernadur si Porcio Festo. Sa' migawa' si Felix, binilinen si Pablo dia pirisuan, kekpeleliagen tu nga getaw Judea.

Minengi si Pablo Ukumen ni Cesar, su Tampusan Gadi' nu Getaw Roma

25 ¹Naa kini si Festo, telu gebii genat di kaingkuden dia Cesarea, mipanaw dayun ditu Jerusalem. ²Mendadi ki nga kaunutan nug belian muka' ki ngag duma kaunutan nu getaw Judea, duminangat ilan dini Festo mekatag dini Pablo. Migubug ilan diniin, ³miksaak ilan gimu, pateden sia si Pablo dia Jerusalem, pu' duun puli'ig delendeman nilan, pengepa'en pa nilan si Pablo petayay dig dalan. ⁴Laak kali' sembag si Festo, “Naa pegingaten na si Pablo di pirisuan ditu Cesarea, dayun naan, sunguu meditu. ⁵Sa' ma'nia, adin sug duuni pegbaya'en diniu, melengas megdunut dinaan tugbeng ditu. Dayun sa' duuni sala' nu getaw kiin, subay dia dengaray.”

⁶Naa bena' labi na sala simana dia si Festo, tumigbeng puli' tu Cesarea. Mendadi bena' minateng dia, bena' migendaw, miningkud dia pengukuman si Festo, sinabinen dayun si Pablo. ⁷Sa' minateng dia si Pablo, migindeg dia peglidunganen ki nga getaw Judea kia minateng genat tu Jerusalem. Minamal ilan dayun dumangat diniin, laak nda'i petu'usan nilan dun. ⁸Dagid si Pablo, sumimbag, laungen, “Nda'u pemilas ditu Palinta nu getaw Judea, nda' dau dema pekesala' ditu Penedapan tu Megbebaya' sampay nda' pau padun pekesala' ditu tampusan gadi' nu getaw Roma si Cesar.”

⁹Laak dagid si Festo kini, peleliagenen sia su nga getaw Judea, kaas sinaaken dini Pablo, “Meliaga da gelinenig dangat dini'a di gedapan ku ditu Jerusalem?”

¹⁰Kali' sembag si Pablo, “Dini nau pegindeg gedapan nu pengukuman ni Cesar, ki mbantang pengukuman dinaan. Suunan mu gupia, nda'iduni sala'ud di nga getaw Judea. ¹¹Sa' pinenggi' pimilasug sug bala'ud atawaka mikesala'ud laga' na ginau, naa pia petain nau. Laak dagid sa' nda'i metuuden kig dinangat nilan kini dinaan, naa nda'i mekegwakil dinaan dinilan.” Diksu' ni Pablo, “Mendadi, penengiin ku, ukumenu ditu gedapan ni Cesar.”

¹²Mendadi kini si Festo, bena' migyagayaga ilan nu ngag limbangen, sumimbag dini Pablo, “Mendadi, pinengi mu ukumen ka ditu gedapan ni Cesar, dituun ka na tu'u ukumay.”

Iwit si Pablo tu Gedapan ni nga Agripa muka' Berenice

¹³Tubus itu duuni santa' gebii, minateng dia Cesarea si Adi' Agripa muka' si Berenice, minangay ilan megbasa tug begu gubernadur, si

Festo. ¹⁴Naa mendadi bena' minibeniben ilan dia, inukitan ilan ni Festo mekatag dini Pablo. Kali' pektalu' si Festo, “Duuni getaw binilin ni Felix kiin pinikutan dini. ¹⁵Su ditu pau Jerusalem, dinangat iin nu nga kaunutan nug belian muka' nu ngag дума kaunutan nu getaw Judea, pinengi nilan, ukumen ku sia. ¹⁶Laak tinalu'u dinilan pu' kana' betad ta getaw Roma, ki getaw dinangat, pegwakil ditu nga duminangat dun subay pegedapen pailan, adun mekesembag su dinangat. ¹⁷Mendadi sa' minateng ilan dini, nda'u lenganay. Sa' migendaw, miningkudu dayun dia pengukuman, piangayu si Pablo. ¹⁸Laung ku dun melaat gupiai gulaulanen, laak bena' migindeg su nga duminangat dun, nda'i mitalu' nilan sala'en, ¹⁹duun laaki piksisu'an nilan mekatag dig danilan betad muka' mekatag di getaw ngalanen si Isus, minatay na, laak dagid laung ni Pablo tetubu'. ²⁰Naa kagina ndi'u metau mukum dun sa' ma'antu, sinaaku dini Pablo sa' liaganen gelinen ditu Jerusalem sug dangat. ²¹Laak pinenginen, pegingaten pa, adun ukumen ni Cesar. Sa' ma'antu, sinugu'u pikutan pa dini si Pablo, sampay matengi kepatedu diniin ditu ni Cesar.”

²²Laung ni Agripa dini Festo, “Naan, mauya'an ku medengegu gupia ki talu' nu getaw kiin.”

“Naa lema', medengeg mu da,” simbag ni Festo.

²³Naa bena' migendaw, minateng na pelum si Agripa muka' si Berenice. Migimakay ilan gupia, pigbesaan ilan gupia nu nga getaw selian nilan suled diag balay pengukuman. Dia dadema su nga kaunutan nu kelaun sundalu muka' su nga metaas linekian dig lunsud kia. Mendadi bena' mipungun ilan, piangay ni Festo si Pablo. ²⁴Kali' dayun pektalu' si Festo, “Uu Adi' Agripa muka' launan niu nga mikpungun dinami dini, kini minita' na niu ki getaw dinangat nug launan getaw Judea dini Cesarea muka' ditu Jerusalem, beksain nilan pu' kana' na laung mbantang mektetubu' pa si Pablo kini dinig dibabaw lumbang. ²⁵Laak dagid danaan, nda'i misima'u sala'en laga' na ginaanen. Mendadi kagina pinenginen dengaten tu gedapan ni Cesar, delendeman ku, puiten ku tu'u ditug Roma. ²⁶Laak dagid nda'iduni misuunan ku gempia sulaten ku ditu ni Cesar mekatag diniin. Mendadi yamu nga getaw muka' labi na ya'a, uu Adi' Agripa, kagina ma'antu, inatedu iin dini gedapan niu, adun sa' mesaakan ta, duun nai gempiau sulaten metenday ditu ni Cesar. ²⁷Pu' danaan, ndi' mesu'at duuni pinikutan puitu ditu, subay pedumaan dadema puit sug dinangat dun.”

Su Sembag ni Pablo di Gedapan ni Agripa

26 ¹Miktalu' si Agripa dini Pablo, “Naa mendadi, mesu'at na meksembaga.” Tinggal dayun si Pablo sug baingkenen, mikpuun dayun sumbag. Kali' pektalu' si Pablo,

²“Uu Adi' Agripa! Gempia palad mekesembagu nandaw dini gedapan mu mekatag di kelaun dinangat nu nga getaw Judea dinaan, ³kagina metaasi sinuunan mu dig betad muka' di piglisu'an nu getaw Judea. Mendadi penengiin ku dini'a, kelelaat pektigel mu ki sembagu kini.

⁴“Mendadi, misuunan nug launan getaw Judea su pigbetadu genat pa di kaika'ayu, saanan ku ditu ngag beta'an ku, sampay su dituunu na Jerusalem. ⁵Sa' mesaakan mu ilan, medengeg mu da siai sembag nilan, miniben na nilan suunay muka' metakesi'an nilan, sa' sia mauya'an nilan, pu' piksiba'an ku gupia duntay sug betad nu getaw Judea, sakupu nu pikumpulan Pariseo. ⁶Muka' nandaw, kini nau mikindeg, pegukumenu mekatag di kekpedatengu tu kenuud nu pinasad kiin nu Megbebaya' tu nga ginepu'ay ta. ⁷Asa iin dademai pedetengen nu sepulu' bu' dua' bansa nu getaw Israel, selian nilan mektamuy tu Megbebaya' gebii gendaw. Mendadi, uu Adi', masi' getaw Judeai duminangat dinaan kini saba' di kekpedatengu dun! ⁸Naa, yamu ngag dumau dini, mauma dema ndi' amu metuudan dun pu' petubu'en puli' nu Megbebaya' su nga minatay?”

⁹Laung padun ni Pablo, “Mendadi naan, duuni gendaw mituudanu dun pu' melengas menamalu kumuntra dini Isus kiin getaw Nazaret. ¹⁰Kaas piglegetan ku su nga sakupen ditu Jerusalem. Melaun piglegetawan nu Megbebaya' pinikutan ku, bigayanu pegbaya' nu nga kaunutan nug belian nu getaw Judea, muka' sa' inukuman ilan laga' na ginaa nilan, sinangu'u. ¹¹Tatapu ilan pemedasay dia nga simbaan, pisilutu ilan adun sia penampalaksan nilan su kekpetuud nilan kia. Mibaga gupiai ganggitu dinilan, kaas piglegetan ku ilan sampay di ngag lunsud tug lain benwa.”

Migukit si Pablo mekatag di Kesakupen dini Isus
(*Pinggulaula 9:1-19; 22:6-16*)

¹²Laung padun ni Pablo, “Ma'antu, minangayu ditug Damasco, pigwekilanu muka' sinugu'u nu nga kaunutan nug belian nu getaw Judea. ¹³Mendadi, uu Adi', bena' diaanu dalan miktui gendaw, tekaw mitiaganu tiag genat tug langit, medelag pa di gendaw. Mitiagan dun dadema su nga tendugu. ¹⁴Dayun ami gela' mibelilid diag lupa', duuni midengegu tingeg pekabit dinaan di pikebitan nami nga getaw Judea, laungen, ‘Uu Saulo! Mauma dema peglegetan mau? Kig badas dinaan, libaneg dini'a.’ ¹⁵Kali'u pektalu', ‘Ta' taway dun iin?’ Sumimbag su Kaunutan, laungen, ‘Naa si Isus, ki peglegetan mu. ¹⁶Dagid pegbuata, gindega. Pu' mikpaita'u dini'a kini adun tendu'en ku ya'a sesugu'en ku. Muka' pagid tendu'en ku ya'a mekpesuun di nga getaw tu kekpaita'u dini'a nandaw dakus tu kekpaita'u dini'a genat nandaw. ¹⁷Guunen ku ya'a tu kepeleget dini'a nu nga getaw Judea mesama su kana' getaw Judea, pu' sugu'en ku ya'a mangay dinilan ¹⁸pu' adun paita' mu dinilan su metuud, adun megawa' ilan di medelem dayun lumingay ilan tu metuud muka'

medelagan ilan dun, dakus megawa' ilan di gengkeman ni Satanas, lumingay ilan tu Megbebaya'. Pedesunen ilan dayun di sala' nilan pebian di kekpetuud nilan dinaan, dayun mpeduma ilan tu nga pinaas piglegetawan ku.' ”

Migukit si Pablo mekatag dig Baalenen

¹⁹Laung padun ni Pablo, “Naa sa' ma'antu, uu Adi' Agripa, nda'u pemilasay ki pinita' dinaan kia genat tug langit. ²⁰Mikpuunu dayun megukit diag Damasco, dayun genat itu, migukitu ditu Jerusalem muka' ditu tibuuk benwa Judea sampay ditu nga kana' getaw Judea. Inukitu dinilan pu' subay meksikesuun ilan muka' lumingay ilan tu Megbebaya', dakus pembetaden nilan su mbantang di getaw miiksikesuun. ²¹Naa kiai puunanen, dinaapu nu getaw Judea ditug Balay Penedapan tu Megbebaya', petainu nilan sia. ²²Laak pigebanganu nu Megbebaya' sampay nandaw, kaas mikedingegu dini nandaw tumakesi' diniu nga metaas getaw mesama di gembaba'. Muka' ki ginukitu kini nandaw, iin da gupia su ginukit nu nga pimuunan nu Megbebaya' dengantu kampu' ni Moises, su pisuun nilan pedaan pu' mpenggulaula di maiben gendaw. ²³Laung nilan subay matay su Tindu' nu Megbebaya' Meglekaunutan, muka' subay iini mauna metubu' puli', adun petendayanen su nga getaw Judea mesama su nga kana' getaw Judea, adun medelagan ita nu kegawenen dinita.”

²⁴Selian ni Pablo sumbag, migbeksay si Festo diniin, laungen, “Pablo, mibu'ang ka! Milebiani kektu'un mu, kaas mibu'ang ka!”

²⁵Kali' sembag si Pablo, “Uu pegbesaan Festo, kana'u mibu'ang! Ki pektelu'en ku kini, minget metuud. ²⁶Si Adi' Agripa, misuunanen daig launanen kini, kaas nda'u medapa' megukit dun di gedapanen. Misuunan ku nda'iduni mileglud diniin, pu' nda' penggulaula di meleglud.” ²⁷Laung padun ni Pablo, “Uu Adi' Agripa, mikpetuuda ba tu nga sinulat nu nga pimuunan nu Megbebaya' dengantu? Aa, suunan ku mituudan ka dun!”

²⁸Suminaak si Agripa dini Pablo, “Aba, dedeli'en mau sia baalay Kristianu?”

²⁹Kali' sembag si Pablo, “Maiben sa' medali', iini penengiin ku tu Megbebaya', ya'a Sir muka' kig launan niu mekineeg dinaan dini nandaw, meksamasama ita sia sumakup dini Isus, asa naan laak salau da beluden!”

³⁰Mendadi, migbuat su gadi' muka' su gubirnadur, sampay si Berenice muka' su ngag duma nilan pegingkud. ³¹Bena' mipalus ilan dia, migyagayaga ilan dayun, saladua' miktalu', “Ki getaw kiin, nda'i sala'en laga' na ginaanen atawaka pirisuun laak.” ³²Laung ni Agripa dini Festo, “Mesu'at na sia beluyeni getaw kiin, sa' kana' da sia minengi ukumen ditu gedapan nu tampusan gadi' si Cesar.”

Sumikat si nga Pablo Pangay tug Roma, Sakup Italia

27 ¹Naa bena' delendeman ni nga Festo pesekain ami pangay ditug Italia, si Pablo, ilan nu ngag duma pinikutan, pigwakil nilan di kaunutan nu sundalu. Ki kaunutan kini, ngalanen si Julio, piningalan dun su pikumpungan sundalunen, “Su Pikumpungan nu Tampusan Gadi' si Cesar.” ²Sa' ma'nia, suminakay ami dig bangka' genat tug Adramito sungu meksekat pangay tu ngag lunsud dig benwa Asia. Mendadi, sumikat ami dayun, duma nami si Aristarco, getaw Macedonia, lunsuden su Tesalonica. ³Naa bena' migendaw, minapit ami ditu Sidon. Lilaatan ni Julio kia si Pablo, bigayen mangay mengumbelayan ditu nga sambaten diag lunsud kia, adun ebanan nilan iin. ⁴Minundas ami dayun meksakay ditu melimbengan nu pulu' Cipre, pu' misensung nami su genus. ⁵Bena' duminipag ami tug dagat dia dapit Cilicia muka' Panfilia, midepet ami tu Mira, sakup Licia. ⁶Selian nami dia, mibaangan nu kaunutan sundaluig bangka' genat tug Alejandria pangay tug Italia, pisakay ami dayun.

⁷Naa duuni santa' gebii miksilegya' ami mpanaw, mesumaya' gupiai kaigin nami, gusul dami muka' mitanda' tu Nido. Bena' ndi' ami mekebundas saba' metiktegi genus misensung nami, mikangay ami dia melimbengan nu pulu' Creta, mibianan nami dayun su Peksuungan Salmon. ⁸Melegen pa paduni kebundas nami, subay piangay nami tu gembabaw sug bangka', midepet ami dayun tug luguk dagat piningalan dun su Melengen Luguk, mesempel tug lunsud Lasea.

⁹Naa kumalenged milangan nami gupia, mekebinasa sa' mundas ami, pu' minayan na su gendaw mekpuasa. Mendadi si Pablo, tinitulu'anen sia su ngag duma nami, laungen, ¹⁰“Yamu nga kaunutan, misima'u pu' sa' mundas ita, duuni mesaitan dinita sampay melaun lulan mbeleng, dakus duun dinitai megbaya'baya' dun.” ¹¹Dagid piktalentedan nu kaunutan sundalu su tinalu' nu meguit tug bangka' muka' nu gapu'en, batul nu tinalu' ni Pablo. ¹²Naa kagina ndi' mpia bilinan barkuig luguk kia sa' timpu metegdaw, melaun duma nami laung nilan melengas sukat nami, adun pulu' medepet ami pa sia tu Fenicia, ditu ami dayun megbebenwa saanan nu timpu metegdaw. Pu' ki Fenicia kia, luguk dia Creta, mitubang di sindapan.

Su Salindapak diag Laud

¹³Mendadi, bena' suminambelsambeli genus genat di dapit gilidan nu gendaw, laung nilan dun mbaluy na sug delendeman nilan. Binatan nilan dayun su pundu muka' sumikat ami, inabay nami su gembabaw di pulu' Creta kia. ¹⁴Dagid nda' maiben, misagut ami metiktegi gupia genus genat tug binuidan, piningalan dun, “Su Genus genat di Silangan.”

¹⁵Misensung nug bangka' nami su genus, ndi' nami dayun mekebundas, subay piyun nami dayun di genus kig bangka'. ¹⁶Selian nami mian dia melimbengan nu maika' pulu' piningalan dun Cauda, binatang nilan sug buti pegbiglasen nug bangka', laak melegen gupia betunen. ¹⁷Igbed nilan dayun tali kig bangka' adun ndi' mbengkal, ikup nilan dayun sug layagen, pu' mendek ilan mesenlad ditu gembabaw ditu dapit Libya. Sinulut nami dayun su genus. ¹⁸Minamal mekiwangiwang kig bangka' saba' nu nga nabek. Kali' pegendaw, kinulangan nilan su ngag lulan, linabu' nilan tug dagat. ¹⁹Di ketelu endawen, kinulangan nilan padun lebu'ay diag dagat su pengimbaalan nug bangka'. ²⁰Duun dayuni santa' gebii, nda' maita' su gendaw muka' bitun, bigyuan ami gupia, kaas tiga'wan, nda'idun nai pedetengen nami megawen ami.

²¹Mendadi bena' miniben nda' ka'aaan su nga getaw, kini si Pablo, minadap dinilan, kali' pektalu', "Yamu ngag dumau, melengas sia pituud niau, nda' ita sia sekat genat ditu Creta, nda'idun siai mbeleng di nga pimetang ta muka' nda'idun siai mesaitan. ²²Laak talu'u diniu nandaw, gempiai ginaa niu! Pu' nda'i sala tawan diniu matay, mbeleng su laak bangka'. ²³Pu' kagebii, duuni migindeg dia gupidu getaw langit sesugu'en nu Megbebaya', ki Kaunutan ku pektemuyen ku. ²⁴Miktalu' dinaan su getaw langit, laungen, 'Ndi'a mendek, Pablo! Pu' subay madapa pa tu tampusan gadi' si Cesar. Pu' bigay dini'a nu Megbebaya', megawen su kelaun tendug mu kia sumakay.'" ²⁵Laung pa ni Pablo, "Naa kagina ma'antu, gempia daani ginaa niu! Pu' mituudanu tu Megbebaya', menuud gupia ki pisuun dinaan kia. ²⁶Laak medeksa' ita di pulu'."

²⁷Mendadi bena' su kepaat pulu' gebiinen, sinulut ami salindapak ditug dagat Mediteraneo. Bena' miginenga'i gebii, pingantap nu nga sesugu'en dig bangka' kia, mesempel nami di geksid. ²⁸Tikad nilan dayuni kedalemen, dua' pulu' depa. Bena' misiginsigin, sepulu' bu' lima depa na laak. ²⁹Mindek ilan dayun mesuntuk ami dig batu, kaas miglabu' ilan paat buuk pundu dia gulinen. Pinenabi nilan dayun ki kesebang na nu gendaw. ³⁰Mikelaguy dayun sia su nga sesugu'en dig bangka' kia, pilusad nilan sug buti diag dagat, tautau lebu'en nilani pundu diag dulungen. ³¹Dagid laung ni Pablo ditu kaunutan sundalu muka' tu nga sundalunen, "Ndi' amu megawen, subay bilinen ilan dinig bangka'." ³²Dekag pinutuk nu sundalu su nga tali dig buti, pilabu' nilan dayun diag dagat.

³³Naa bena' puti' delagay na, ginuut ni Pablo sug launan getaw bata' maan ilan, laungen, "Sepulu' bu' paat gebii nandawi kegali' niu tug benwa, nda' pai ka'aaan niu. ³⁴Kaas penengiin ku diniu, bata' maan amu, adun mekesikad amu. Pu' nda'i sebaluig buuk di gulu niu mbeleng." ³⁵Tubusen telu'ay, minalap si Pablo pan, dayun mekpaladpalad tu Megbebaya' di gedapan nug launan nilan. Pimetanen su pan, dayun pekaan. ³⁶Mendadi sug launan dumanen, miamu'amu' nailan, mika'aaan

ilan dayun dema. ³⁷Yami nga suminakay dig bangka' kia, dua' gatus bu' pitu pulu' bu' enem tawan ami. ³⁸Mendadi degag ilan mibesug, bileng nilan su kelaun trigo, adun megaan sug bangka'.

Su Kegeba' nug Bangka' Sikayan ni nga Pablo

³⁹Mendadi kali' pegendaw, su nga sesugu'en kia dig bangka', nda' nilan mailala sug benwa, laak minita' nilanig luguk duuni pentadanen, delendeman nilan dayun, sa' sia megaga nilan, dunggu' ami dia. ⁴⁰Bileng nilan dayun diag dagat su nga pundu, dunut inubad nilan su tali iniket tug bensalan. Binatun nilan dayun sug layag diag dulung adun sembelen nu genus, mi'igin ami tu'u pangay dia geksid. ⁴¹Laak misenlad ami di gembabaw. Milebeng sug dulungen, ndi' dayun mekaigin. Misaba' dayun nu nabek su gulinen.

⁴²Kali' pegleketau su nga sundalu, gela'en nilan sia petayay ki nga pinikutan kia, adun mbuus ndi' ilan lumanguy mekelaguy. ⁴³Laak dagid su kaunutan sundalu kia, mauya'anen ndi' matay si Pablo, kaas misagapa' ilan niin. Sinugu'en su metau lumanguy, sumampak ilan diag dagat, dayun lumanguy ilan tu geksid. ⁴⁴Su ndi' metau lumanguy, sinugu'en megabanan tu tabla muka' tu peta nug bangka'. Ma'antu, migela' ami mesiket tu geksid, nda'i mikendun dun.

Su Kesiket ni nga Pablo dia Pulu' Malta

28 ¹Mendadi degag ami misiket, misuunan nami dayun su ngalan nug benwa kia, Malta. ²Su nga getaw dangen dia, mekesuun ilan gupia dinami. Mipenemba' ami nilan, mikpeleket ilan gapuy, pu' minugdakig dupi', metegdaw gupia.

³Mendadi kini si Pablo, mingayu sebegbed, inuklaken tu gapuy. Duun dayuni mamak gumiwa' saba' mainit, mingulibed di kemet ni Pablo.

⁴Bena' minita' nu nga getaw dangen dia, diadia miktalu', "Aa, ki getaw kini, minget memunu'an. Nda' ma melaatay diag dagat, laak mbinasa dun ini, metibaba'en." ⁵Dagid si Pablo, inikpigen su mamak, misegbu dayun tu gapuy, nda' da pekendun dun si Pablo. ⁶Pekpelaban dayun nu ngag dumanen, mengebag atawaka metigbak. Laak sa' miniben na nilan pekpelabay muka' nda' gusay pekendun dun, mipalinig delendeman nilan, laung nilan dayun, "Masi' getaw kini, diwata!"

⁷Naa su kaunutan di pulu' kia, ngalanen si Publio, duunig lupa'en mesempel di kisiketan nami kia. Pinemba'en ami, pipiananen ami telu gebii diag balayen. ⁸Mendadi su gama' ni Publio, pegladu, ndi' mekegbuat saba' mipanas muka' migudu. Sumiled si Pablo tu sugud nu migladu, minenabi dayun megdepen diniin, piuli'anen. ⁹Dekag mipenggulaula, su kelaun migladu dia pulu' kia, suminungkak ilan dini Pablo, migela' ilan dayun mauli'ay. ¹⁰Melaun dayuni pimegay nilan

dinami, muka' ki kesakay nami pelum genat dia, bitang nilan diag
bangka' nami sug launan sukat nami di kepanaw nami.

Minundas si nga Pablo ditug Roma

¹¹Bena' telu bulan pelum, suminakay ami puli', sikayan namiig bangka'
genat tug Alejandria pitenlen dadema dia pulu' kia mitaang di timpu
metegdaw. Kig bangka' kia, piningalan dun “Gapid Diwata.”

¹²Mendadi midepet ami tu Siracusa, telu gebii ami dayun dia. ¹³Genat
dia, sumikat ami pelum, minundas ami ditug Regio. Genat itu bena'
migendaw, misagut ami genus genat di gilidan gendaw, kaas di kedua'
endawen, ugat pami medenggu' tu Puteoli. ¹⁴Duuni kepetedan mipekita'
nami dia, inggat ami nilan megbebenwa dia nilan sala simana. Tubus itu,
minundas nami ditug Roma.

¹⁵Naa su nga kepetedan ditug Roma, bena' midengeg nilan pu'
minateng ami diag Italia, mipanaw ilan gikteb dia Tebu'an Apio muka'
dia Telu Buuk Pektulugan, adun sumungkak dinami. Bena' mikita'
dinilan si Pablo, mikpaladpalad tu Megbebaya', miamu'amu' dayun gupia.

Ditug Roma si Pablo

¹⁶Mendadi ma'antu, bena' minateng ami tu'u ditug Roma, biwang
dini Pablo megbenwa dig balayen, dumanen da laaki sala tawan sundalu
meginat diniin.

¹⁷Naa di ketelu endawen mateng dia, inggat ni Pablo mekpungun dia
su nga kaunutan nu getaw Judea. Bena' mipungun nailan, kali' pektalu'
si Pablo dinilan, “Uu Mingumpated, naan kini, pia nda'i sala'u tu nga
sama ta getaw Judea sampay tug betad nu nga ginepu'ay ta, pia ma'antu,
pinirisuu ditu Jerusalem, pigwakilu dayun tu getaw Roma. ¹⁸Bena'
sinaakanu nu nga getaw Roma kia, beluyenu nilan sia, pu' nda'i misima'
nilan sala'u laga' na ginau. ¹⁹Laak dagid su nga getaw Judea, pimilas
nilan gupia, kaas mitegelanu dayun menengi ukumenu tu gedapan nu
tampusan gadi' si Cesar. Asa ndi'u dumangat di samatawu dig bansa ta.
²⁰Kaas iini inggatu dun amu, adun mekpekita' ita muka' megabitabit ita.
Mendadi ki pedetengen ta nu nga getaw Israel, iini binaludu dun kadina
kini, saba' nu kesakupu diniin.”

²¹Kali' pektalu' su nga kaunutan nu getaw Judea kia dini Pablo, “Naa,
nda'i midawat nami sulat genat ditu Judea mekatag dini'a, muka' nda'
dademai minateng dini kepetedan ta megukit melaat gulaula mu. ²²Laak
mauya'an nami mekineeg dini'a, pu' misuunan nami, libaken dig liwagan
benwa ki pikumpungan niu kia.”

²³Sa' ma'nia, mikpasad ilan di gendaw, dayun melaun gupia
getaw mekpungun diag balay pegbenwanan ni Pablo. Migukit dayun
dinilan si Pablo patay sendaw, migwali dinilan mekatag di kesakup tu

Keglekaunutan nu Megbebaya'. Pingmetuudanen ilan sia mekatag dini Isus, inalapen su Palinta nu Megbebaya' pisulaten dini Moises muka' tu ngag дума pimuunanen dengantu. ²⁴Duun dayuni mituudan dun, duuni mpauk mekpetuud. ²⁵Mendadi mimegawa' ilan dia, miksumpaki'ig delendeman nilan. Laak sebulus pai piktalu' ni Pablo dinilan, laungen, “Metuud su tinalu' nug Balakat nu Megbebaya' ditu ginepu'ay niu, su pisulaten tu pimuunanen si Isaias ditu Misulat Talu'en, ²⁶laungen,

‘Ki nga getaw kini, laaway mu, talu' mu dayun dinilan,
Menamal damu mekineeg, laak ndi' amu mekesabut.
Menamal damu mengenleng, laak ndi' amu mekengita'.

²⁷Pu' sug delendeman nilan, mimilas gupia.

Sinseng nilani nga telinga nilan,
pideng nilani mata nilan.
Sa' kana' da ma'nia, mekengita' ilan sia
muka' mekedengeg ilan sia,
dayun mekesabut ilan,
muka' lumingay ilan puli' sia dinaan, laung nu Megbebaya',
adun peneguli'an ku ilan.’ ”

²⁸Mendadi, diksu' ni Pablo su tinalu'en kia, laungen, “Mendadi, pesuun ku diniu, iin nai pitendayan tu kegawen nu Megbebaya', ki kana' getaw Judea. Ilan, mektalente ilan dun!” ²⁹[Bena' mideksu' ni Pablo telu'ay, migawa' dayun dia su nga getaw Judea, mipati' ilan meksinualay.]

³⁰Mendadi, migbebenwa pa dia si Pablo sampay dua' taun, diag balay pilitianen. Adin su mingumbelayan diniin, penemba'enen. ³¹Minamal megukit mekatag di kesakup tu Keglekaunutan nu Megbebaya' muka' mekpetu'un mekatag di Kaunutan si Isukristu. Minibelu' gupia megukit si Pablo, nda'i mekesagapa' diniin.